

नमो नमो निग्मलदंसणस्स

पू. आनंद-क्षमा-ललित-सुशील-सुधर्मसागर गुरुभ्यो नमः

१७

चंदपन्नत्ति- छड्डं उवंगसुत्तं

Proof correction is not done

मुनि दीपरत्नसागर

Date : / / 2012

Jain Aagam Online Series-17

पाहुडं	पाहुड-पाहुडं	सुत्तं	गाहा	अणुककमो	पिड्डको
पढमं	८	१-२०	१-१९	१-३४	०२
बीयं	३	२१-२३	-	३५-३७	११
तच्चं	-	२४-	-	३८-	१५
चउत्थं	-	२५-	-	३९-	१६
पंचमं	-	२६-	-	३९-	१७
छट्ठं	-	२७-	-	४१-	१८
सत्तमं	-	२८-	-	४२-	१९
अट्ठमं	-	२९-	-	४३-	१९
नवमं	-	३०-३१	-	४४-४५	२१
दसमं	२२	३२-७०	२०-३३	४६-१०१	२४
एक्कारसमं	-	७१-	-	१०२-	४०
बारसमं	-	७२-७८	३४-	१०३-११०	४१
तेरसमं	-	७९-८१	-	१०७-११३	४५
चउद्दसमं	-	८२-	-	११४-	४७
पन्नरसमं	-	८३-८६	-	११५-११८	४८
सोलसमं	-	८७-	-	११९-	४९
सत्तरसमं	-	८८-	-	१२०-	४९
अट्टारसमं	-	८९-९९	३५-	१२१-१३२	५०
एगूणवीसड्मं	-	१००-१०१	३६-९२	१३३-१९७	५३
वीसड्मं	-	१०२-१०७	९३-१०७	१९८-२१८	६०
Proof correction is not done					

१७

चंदपन्नत्ति- छड्डं उवंगसुत्तं

◦ पढमं पाहुडं ◦

◻ पढमं-पाहुडपाहुडं ◻

- [१] जयति नवनलिनकुवलय-वियसियसयवत्तपत्तलदलच्छो |
वीरो गयंदमयगल-सललियगयविककमो भयवं ||
- [२] नमिउण असुरसुर गरुलभुयग परिवंदिए गयकिलेसे |
अरिहे सिद्धायरिए उवज्झाए सव्वसाहू य ||
- [३] फुडवियडपागडत्थं वोच्छं पुव्वसुयसारणीसंदं |
सुहुमगणि ण नोवदिद्वं जोइसगणरायपन्नत्ति ||
- [४] नामेण इंदभूतित्ति गोतमो वंदिउण तिविहेणं |
पुच्छइ जिनवरवसहं जोइसगणरायपन्नत्ति ||
- [५] कइ मंडलाइ वच्चइ तिरिच्छा कि वगच्छइ |
ओभासइ केवइयं सेयाइ किं ते संठिई |
- [६] कहिं पडिहया लेसा कहं ते ओयसंठिती |
के सूरियं वरयंति कहं ते उदयसंठिती |
- [७] कतिकद्धा पोरिसिच्छाया जोगे किं ते आहिए |
के ते संवच्छराणादी कइ संवच्छराइ य |
- [८] कहं चंदमसो वुड्ढी कया ते दोसिणा बहू |
के सिग्घगई वुत्ते कहं दोसिणलक्खणं |
- [९] चयणोववाते उच्चत्ते सूरिया कति आहिया |
अनुभावे के व सेवुत्त एवमेयाइं वीसई |
- [१०] वड्ढोवुड्ढी मुहत्ताण-मद्धमंडलसंठिई |
के ते चिण्णं परियरइ अंतरं किं चरंति य |
- [११] ओगाहइ केवइयं केवइयं च विकंपइ |
मंडलाण य संठाणे विक्खंभो अट्ट पाहुडा |
- [१२] छप्पं च य सत्तेव य अट्ट य तिण्णि य हवंतिपडिवत्ती |
पढमस्स पाहुडस्स उहवंति एयाओ पडिवत्ती |
- [१३] पडिवत्तीओ उदए तह अत्थमणेसु य |
भेयघाए कण्णकला मुहत्ताण गईइ य |
- [१४] निक्खममाणे सिग्घगई पविसंते मंदगईइ य |
चूलसीइसयं पुरिसाणं तेषिं च पडिवत्तीओ |
- [१५] उदयम्मि अट्ट भणिया भेयघाए दुवे य पडिवत्ती |
चत्तारि मुहुत्तगईए हुंति तइयम्मि पडिवत्ती |

- [१६] आवलिय मुहुत्तग्गे एवंभागा य जोगासा ।
कुलाइं पुन्नमासी य सण्णिवाए य संठिई ।
- [१७] तारगग्गं च नेया य चंदमग्गत्ति यावरे ।
देवताण य अज्झयणे मुहुत्ताण नामयाइ य ।
- [१८] दिवसा राइ वुत्ता य तिहि गोत्ता भोयणाणि य ।
आइच्च-चार मासा य पंच संवच्छराइ य ।
- [१९] जोइसस्स दाराइं नक्खत्तविजएवि य ।
दसमे पाहुडे एए बावीसं पाहुडपाहुडा ।

[२०] तेणं कालेणं तेणं समएणं मिहिला नामं नयरी होत्था-रिद्धत्थिमिय-समिद्धा पमुइयजणजाणवया जाव पासादीया दरिसणिज्जा अभिरूवा पडिरूवा, तीसे णं मिहिलाए नयरीए बहिया उत्तरपुरत्थमि दिसीभाए एत्थ णं माणिभद्धे नामं चेइए होत्था-वण्णओ, तीसे णं मिहिलाए नयरीए जियसत्तू नामं राया, धारिणी नामं देवी वण्णओ, तेणं कालेणं तेणं समएणं तम्मि माणिभद्धे चेइए सामी समोसढे, परिसा निग्गया धम्मो कहिओ जाव राया जामेव दिसं पाउब्भूए तामेव दिसं पडिगए ।

[२१] तेणं कालेणं तेणं समएणं समणस्स भगवओ महावीरस्स जेढे अंतेवासी इंदभूती नामं अणगारे गोयमेगोत्तेणं सत्तुस्सेहे जाव पज्जुवासमाणे एवं वयासी- ।

[२२] ता कहं ते वड्ढोवुड्ढी मुहुत्ताणं आहितेति वएज्जा ता अट्ट एगूणवीसे मुहुत्तसए सत्तावीसं च सट्ठिभागे मुहुत्तस्स आहितेति वएज्जा ।

[२३] ता जया णं सूरिए सव्वब्भंतराओ मंडलाओ सव्वबाहिरं मंडलं उवसंकमित्ता चारं चरइ सव्वबाहिराओ वा मंडलाओ सव्वब्भंतरं मंडलं उवसंकमित्ता चारं चरइ एस णं अद्दा केवइयं राइंदियग्गेणं आहितेति वएज्जा

[२४] ता एयाए णं अद्दाए सूरिए कइ मंडलाइं चरइ ता चुलसीयं मंडलसयं चरइ-बासीतं मंडलसयं दुक्खुत्तो चरइ तं जहा- निक्खममाणे चेव पविसमाणे चेव दुवे य खलु मंडलाइं सइं चरइ तं जहा- सव्वब्भंतरं चेव मंडलं सव्वबाहिरं चेव मंडलं ।

[२५] जइ खलु तस्सेव आदिच्चस्स संवच्छरस्स सइं अट्टारसमुहुत्ते दिवसे भवइ सइं अट्टारसमुहुत्ता राती भवति सइं दुवालसमुहुत्ते दिवसे भवइ सइंदुवासमुहुत्ता राती भवति पढमे छम्मसे अत्थि अट्टारसमुहुत्ताराती भवति नत्थि अट्टारसमुहुत्ते दिवसे अत्थि दुवालसमुहुत्ते दिवसे नत्थि दुवाल-समुहुत्ता राती दोच्चे छम्मासे अत्थिअट्टारसमुहुत्ते दिवसे नत्थि अट्टारसमुहुत्ता राती अत्थि दुवालसमुहुत्ता राती नत्थि दुवालसमुहुत्ते दिवसे पढमे वा छम्मासे दोच्चे वा छम्मासे नत्थि पन्नरसमुहुत्ते दिवसे भवति नत्थि पन्नरसमुहुत्ता राती भवति तत्थ णं को हेतूति वएज्जा ता अयण्णं जंबुदीवे दीवे सव्वदीवसमुद्धानं सव्वब्भंतराए जाव परिकखेवेणं पन्नत्ते ता जया णं सूरिए सव्वब्भंतरमंडलं उवसंकमित्ता चारं चरइ तया णं उत्तमकड्डपत्ते उक्कोसए अट्टारसमुहुत्तेदिवसे भवइ जहणिया दुवालसमुहुत्ता राती भवति से निक्खममाणे सूरिए नवं संवच्छरं अयमाणे पढमंसि अहोरत्तंसि अब्भितराणंतरं मंडलं उवसंकमित्ता चारं चरइ तया णं अट्टारसमुहुत्ते दिवसे भवइ दोहिं एगट्ठिभागमुहुत्तेहिं ऊणे दुवालसमुहुत्ता राती भवति दोहिं एगट्ठिभाग-मुहुत्तेहिं अहिया से निक्खममाणे सूरिए दोच्चंसि अहोरत्तंसि अब्भितरं तच्चं मंडलं उवसंकमित्ता चारं चरइ ता जया णं सूरिए अब्भितरं तच्चं मंडलं उवसंकमित्ता चारं चरइ तया णं अट्टारसमुहुत्ते दिवसे भवइ चउहिं एगट्ठिभागमुहुत्तेहिं ऊणे दुवालसमुहुत्ता राती भवति चउहिं एगट्ठिभागमुहुत्तेहिं अहिया एवं खलु एएणं उवाएणं निक्खममाणे सूरिए तयाणंतराओ -

पाहुडं-१, पाहुडपाहुडं-१

तयाणंतरं मंडलाओ मंडलं संकममाणे संकममाणे दो-दो एगड्विभागे मुहुत्तस्स एगमेगे मंडले दिवस-खेत्तस्स निवुड्ढेमाणे-निवुड्ढेमाणे रयणिखेत्तस्स अभिवुड्ढेमाणे-अभिवुड्ढेमाणे सव्वबाहिरमंडलं उवसंकमित्ता चारं चरइ, ता जया णं सूरिए सव्वब्भंतराओ मंडलाओ सव्वबाहिरं मंडलं उवसंकमित्ता चारं चरइ तथा णं सव्वब्भंतरं मंडलं

पणिहाय एगेणं तेसीएणं राइंदियसएणं तिण्णिछावट्ठे एगड्विभागमुहुत्ते सए दिवसखेत्तस्स निवुड्ढित्ता रयणिखेत्तस्स अभिवुड्ढित्ता चारं चरइ तथा णं उत्तमकट्ठपत्ता उक्कोसिया अट्टारसमुहुत्ता राती भवति जहण्णए दुवालसमुहुत्ते दिवसे भवइ एस णं पढमे छम्मासे एस णं पढमस्स छम्मासस्स पज्जवसाणे से पविसमाणे सूरिए दोच्चं छम्मासं अयमाणे पढमंसि अहोरत्तंसि बाहिराणंतरं मंडलं उवसंकमित्ता चारं चरइ ता जया णं सूरिए बाहिराणंतरं मंडलं उवसंकमित्ता चारं चरइ तथा णं अट्टारसमुहुत्ता राती भवति दोहिं एगड्विभागमुहुत्तेहिं ऊणा दुवाससमुहुत्ते दिवसे भवइ दोहिं एगड्विभागमुहुत्तेहिं अहिए से पविसमाणे सूरिए दोच्चंसि अहोरत्तंसि बाहिरं तच्चं मंडलं उवसंकमित्ता चारं चरइ ता जया णं सूरिए बाहिरं तच्चं मंडलं उवसंकमित्ता चारं चरइ तथा णं अट्टार-समुहुत्ता राती भवति चउहिं एगड्विभागमुहुत्तेहिं ऊणा दुवालस मुहुत्ते दिवसे भवइ चउहिं एगड्विभागमुहुत्तेहिं अहिए एवं खलुएणुवाएणंपविसमाणे सूरिए तयाणंतराओ जाव मुहुत्ते एगमेगे मंडले रयणिखेत्तस्स निवुड्ढेमाणे-निवुड्ढेमाणे दिवसखेत्तस्स अभिवुड्ढेमाणे-अभिवुड्ढेमाणे सव्वब्भंतरं मंडलं उवसंकमित्ता चारं चरइ ता जया णं सूरिए सव्वबाहिराओ मंडलाओ सव्वब्भंतरं मंडलं उवसंकमित्ता चारं चरइ तथा णं सव्वबाहिरं मंडलं पणिहाय एगेणं तेसीएणं राइंदियसएणं तिण्णिछावट्ठे एगड्विभागमुहुत्ते सए रयणि-खेत्तस्स निवुड्ढित्ता दिवसखेत्तस्स अभिवुड्ढित्ता चारं चरइ तथा णं उत्तमकट्ठपत्ते उक्कोसए अट्टारसमुहुत्ते दिवसे भवइ जहण्णिया दुवालसमुहुत्ता राती भवति एस णं दोच्चे छम्मासे एस णं दोच्चस्स छम्मासस्स पज्जवसाणे एस णं आदिच्चे संवच्छरे एस णं आदिच्चस्स संवच्छरस्स पज्जवसाणे इति खलु तस्सेव आदिच्चस्स संवच्छरस्स सइं अट्टारसमुहुत्ते दिवसे भवइ सइं अट्टारसमुहुत्ता राती भवति सइं दुवाल-समुहुत्ते दिवसे भवइ सइं दुवालसमुहुत्ता राती भवति पढमे छम्मासे अत्थि अट्टारसमुहुत्ता राती नत्थि अट्टारसमुहुत्ते दिवसे अत्थि दुवालसमुहुत्ते दिवसे नत्थि दुवालसमुहुत्ता राती दोच्चे छम्मासे अत्थि अट्टारसमुहुत्ते दिवसे नत्थि अट्टारसमुहुत्ता राती अत्थि दुवालसमुहुत्ता राती नत्थि दुवालसमुहुत्ते दिवसे पढमे वा छम्मासे दोच्चे वा छम्मासे नत्थि पन्नरसमुहुत्ते दिवसे नत्थि पन्नरसमुहुत्ता राती नन्नत्थ राइंदियाणं वड्ढोवुड्ढीए मुहुत्ताणं वा चयोवचएणं नन्नत्थ अणुवायईए गाहाओ भाणियव्वओ ।

◦ पढम पाहुडे पढमं पाहुड पाहुडं समत्तं ◦

॥ बीयं पाहुडपाहुडं ॥

[२६] ता कहं ते अद्धमंडलसंठिती आहितेति वएज्जा तत्थ खलु इमे दुवे अद्धमंडलसंठिती पन्नत्ता तं जहा- दाहिणा चएव अद्धमंडलसंठिती उत्तरा चएव अद्धमंडलसंठिती ता कहं ते दाहिणा० ता अयण्णं जंबुद्धीवे दीवे सव्वदीवसमुद्दाणं सव्वब्भंतराए जाव परिकखेवेणं ता जया णं सूरिए सव्वब्भंतरं दाहिणं अद्धमंडलसंठितिं उवसंकमित्ता चारं चरइ तथा णं उत्तमकट्ठपत्ते उक्कोसए अट्टारसमुहुत्तेदिवसे भवइ जहण्णिया दुवालसमुहुत्ता राती भवति से निक्खममाणे सूरिए नवं संवच्छरं आयमाणे पढमंसि अहोरत्तंसि दाहिणाए अंतराए भागाए तस्सादिपदेसाए अब्भितराणंतरं उत्तरं अद्धमंडलसंठितिं उवसंकमित्ता चारं चरइ जया णं सूरिए अब्भितराणंतरं उत्तरं अद्धमंडलसंठितिं उवसंकमित्ता चारं चरइ तथा णं अट्टारसमुहुत्ते दिवसे भवइ दोहिं एगड्विभागमुहुत्तेहिं ऊणे दुवालसमुहुत्ता राती भवति दोहिं

एगद्विभागमुहुत्तेहिं अहिया से निक्खममाणे सूरिए दोच्चंसि अहोरत्तंसि उत्तराए अंतराए भागाए
तस्सादिपदेसाए अब्भितरं तच्चं दाहिणं
पाहुडं-१, पाहुडपाहुडं-२

अद्धमंडलसंठितिं उवसंकमित्ता चारं चरइ ता जया णं सूरिए अब्भितरं तच्चं दाहिणं अद्धमंडलसंठितिं उवसंकमित्ता चारं चरइ तथा णं अद्वारसमुहुत्ते दिवसे भवइ चउहिं एगद्विभागमुहुत्तेहिं ऊणे दुवालसमुहुत्ता राती भवति चउहिं एगद्विभागमुहुत्तेहिं अहिया एवं खलु एएणं उवाएणं निक्खममाणे सूरिए तथाणंतराओ तथाणंतरं तंसि तंसि देसंसि तं तं अद्धमंडल संठिति संकममाणे संकममाणे दाहिणाएओ अंतराए भागाए तस्सादिपदेसाए सव्वबाहिरं उत्तरं अद्धमंडलसंठिति उवसंकमित्ता चारं चरइ ता जया णं सूरिए सव्वबाहिरं उत्तरं अद्धमंडलसंठितिं उवसंकमित्ता चारं चरइ ता जया णं सूरिए सव्वबाहिरं उत्तरं अद्धमंडलसंठितिं उवसंकमित्ता चारं चरइ तथा णं उत्तमकडुपत्ता उक्कोसिया अद्वारसमुहुत्ता राती भवति जहण्णाए दुवालसमुहुत्ते दिवसे भवइ एस णं पढमे छम्मासे एस णं पढमस्स छम्मासस्स पज्जवसाणे से पविसमाणे सूरिए दोच्चं छम्मासं अयमाणे पढमंसि अहोरत्तंसि उत्तराए अंतराए भागाए तस्सादिपदेसाए बाहिराणंतरं दाहिणं अद्धमंडलसंठितिं उवसंकमित्ता चारं चरइ ता जया णं सूरिए बाहिराणंतरं दाहिणं अद्धमंडलसंठितिं उवसंकमित्ता चारं चरइ तथा णं अद्वारसमुहुत्ता राती भवति दोहिं एगद्विभागमुहुत्तेहिं ऊणा दुवालसमुहुत्ते दिवसे भवइ दोहिं एगद्विभागमुहुत्तेहिं अहिए से पविसमाणे सूरिए दोच्चंसि अहोरत्तंसि दाहिणाए अंतराए भागाए तस्सादिपदेसाए बाहिरंतरं तच्चं उत्तरं अद्धमंडलसंठितिं उवसंकमित्ता चारं चरइ ता जया णं सूरिए बाहिरं तच्चं उत्तरं अद्धमंडलसंठितिं उवसंकमित्ता चारं चरइ तथा णं अद्वारसमुहुत्ता राती भवति चउहिं एगद्विभागमुहुत्तेहिं ऊणा दुवालसमुहुत्ते दिवसे भवइ चउहिं एगद्विभागमुहुत्तेहिं अहिए एवं खलु एएणं उवाएणं पविसमाणे सूरिए तथाणंतराओ जाव संकममाणे उत्तराए अंतराए भागाए तस्सादिपदेसाए सव्वब्भितरं दाहिणं अद्धमंडलसंठितिं उवसंकमित्ता चारं चरइ ता जया णं सूरिए सव्वब्भितरं दाहिणं अद्धमंडलसंठितिं उवसंकमित्ता चारं चरइ तथा णं उत्तमकडुपत्ते उक्कोसए अद्वारसमुहुत्तेदिवसे भवइ जहण्णिया दुवालसमुहुत्ता राती भवति एस णं दोच्चे छम्मासे एस णं दोच्चस्स छम्मासस्स पज्जवसाणे एस णं आदिच्चे संवच्छरे एस णं आदिच्चस्स संवच्छरस्स पज्जवसाणे ।

[२७] ता कहं ते उत्तरा अद्धमंडलसंठिती आहितेति वएज्जा ता अयं णं जंबुद्वीवे दीवे सव्वदीवसमुद्धानं सव्वब्भितराए जाव परिक्खेवेणं ता जया णं सूरिए सव्वब्भितरं उत्तरं अद्धमंडलसंठितिं उवसंकमित्ता चारं चरइ तथा णं उत्तमकडुपत्ते उक्कोसेए अद्वारस मुहुत्ते दिवसे भवइ जहण्णिया दुवालसमुहुत्ता राती भवति जहा दाहिणा तहा चेव नवरं-उत्तरद्विओ अब्भितराणंतरं दाहिणं उवसंकमति दाहिणाओ अब्भितरं तच्चं उत्तरं उवसंकमति एवं खलु एएणं उवाएणं जाव सव्वबाहिरं दाहिणं उवसंकमति सव्वबाहिरं दाहिणं उवसंकमित्ता दाहिणाओ बाहिराणंतरं उत्तरं उवसंकमति उत्तराओ बाहिरं तच्चं दाहिणं तच्चाओ दाहिणाओ संकममाणे-संकममाणे जाव सव्वब्भितरं उवसंकमति तहेव एस णं दोच्चे छम्मासे एस णं दोच्चस्स छम्मासस्स पज्जवसाणे एस णं आदिच्चे संवच्छरे एस णं आदिच्चस्स संवच्छरस्स पज्जवसाणे गाहाओ ।

◦ पढमे पाहुडे बीयं पाहुडपाहुडं समत्तं ◦

▣ तच्चं पाहुडपाहुडं ▣

[२८] ता के ते चिन्नं पडिचरइ आहितेति वएज्जातत्थ खलु इमे दुवे सूरियाभारहे चेव सूरिए एरवए चेव सूरिए ता एते णं दुवे सूरिया तीसाए तीसाए मुहुत्तेहिं एगमेगं अद्धमंडलं चरंति सट्टिए-पाहुडं-१, पाहुडपाहुडं-३

सट्टिए मुहुत्तेहिं एगमेगं मंडलं संघातेति ता निक्खममाणा खलु एते दुवे सूरिया नो अण्णमण्णस्स चिण्णं पडिचरंति पविसमाणा खलु एते दुवे सूरिया अण्णमण्णस्स चिण्णं पडिचरंति तं सतमेगं चोयालं तत्थ णं को हेतूति वएज्जा ता अयण्णं जंबुद्धीवे दीवे सव्वदीवसमुद्धानं सव्वब्भंतराए जाव परिक्खेवेणं तत्थ णं अयं भारहए चेव सूरिए जंबुद्धीवस्स दीवस्स पाईणपडिणायताए उदीणदाहिणायताए जीवाए मंडलं चउवीसएणं सएणंछेत्ता दाहिणपुरत्थिमिल्लंसि चउभागमंडलंसि वाणउत्तिं सूरियगताइं चिण्णइं पडिचरइ उत्तरपच्चत्थिमिल्लंसि चउभागमंडलंसि एककाणउत्तिं सूरियागताइं जाइं सूरिए अप्पणं चेव चिण्णाइं पडिचरइ तत्थ अयं भारहे सूरिए एरवयस्स सूरियस्स जंबुद्धीवस्स दीवस्स पाईणपडीणायताए जाव छेत्ता उत्तरपुरत्थिमिल्लंसि चउभागमंडलंसि वाणउत्तिं सूरियगताइं जाइं सूरिए परस्स चिण्णाइं पडिचरइ दाहिणपच्चत्थिमिल्लंसि चउभागमंडलंसि एककाणउत्तिं सूरियगताइं जाइं सूरिए परस्स चेव चिण्णाइं पडिचरइ तत्थ अयं एरवए सूरिए जंबुद्धीवस्स दीवस्स पाईणपडीणायताए जाव छेत्ता उत्तरपुरत्थिमिल्लंसि चउब्भगमंडलंसि बाणउत्तिं सूरियगताइं जाइं सूरिए अप्पणा चेव चिण्णाइं पडिचरइ दाहिणपुरत्थिमिल्लंसि चउभागमंडलंसि एककाणउत्तिं सूरियगताइं जाइं सूरिए अप्पणा चेव चिण्णाइं पडिचरइ तत्थ अयं एरावतिए सूरिए भारहस्स सूरियस्स जंबुद्धीवस्स दीवस्स पाईणपडिणायताए जाव छेत्ता दाहिणपच्चत्थिमिल्लंसि चउभागमंडलंसि बाणउत्तिं सूरियगताइं सूरिए परस्स चिण्णाइं पडिचरइ उत्तरपुरत्थिमिल्लंसि चउभागमंडलंसि एककाणउत्तिं सूरियगताइं जाइं सूरिए परस्स चेव चिण्णाइं पडिचरइ ता निक्खममाणा खलु एते दुवे सूरिया नो अण्णमण्णस्स चिण्णं पडिचरंति पविसमाणा खलु एते दुवे सूरिया अण्णमण्णस्स चिण्णं पडिचरंति सतमेगं चोयालं गाहाओ ।

◦ पढमे पाहुडे तच्चं पाहुडपाहुडं समत्तं ◦

▣ चउत्थं पाहुडपाहुडं ▣

[२९] ता केवतियं एते दुवे सूरिया अण्णमण्णस्स अंतरं कट्टु चारं चरंति आहिताति वएज्जा तत्थ खलु इमाओ छ पडिवत्तीओ तत्थ एगे एवमाहंसु-ता एगं जोयणसहस्सं एगं च तेत्तीसं जोयणसत्तं अण्णमण्णस्स अंतरं कट्टु सूरिया चारं चरंति आहिताति वएज्जा-एगे एवमाहंसु एगे पुण एवमाहंसु-ता एगं जोयणसहस्सं एगं च चउतीसं जोयणसयं अण्णमण्णस्स अंतरं कट्टु सूरिया चारं चरंति आहिताति वएज्जा-एगे एवमाहंसु एगे पुण एवमाहंसु-ता एगं जोयणसहस्सं एगं च पणतीसं जोयणसयं अण्णमण्णस्स अंतरं कट्टु सूरिया चारं चरंति आहिताति वएज्जा-एगे एवमाहंसु एवं एगं दीवं एगं समुद्धं एगे पुण एवमाहंसु एगे पुण एवमाहंसु-ता तिण्णि दीवे तिण्णि समुद्धे अण्णमण्णस्स अंतरं कट्टु सूरिया चारं चरंति आहिताति वएज्जा-एगे एवमाहंसु, वयं पुण एवं वयामो-ता पंच पंच जोयणाइं पणतीसं च एगट्ठिभागे जोणस्स एगमेगे मंडले अण्णमण्णस्स अंतरं अभिवड्ढेमाणा वा निवड्ढेमाणा वा सूरिया चारं चरंति आहिताति वएज्जा तत्थ णं को हेतूति वएज्जा ता अयण्णं जंबुद्धीवे दीवे सव्वदीवसमुद्धानं सव्वब्भं-तराए जाव परिक्खेवेणं पन्नत्ते ता जया णं एते दुवे सूरिया सव्वब्भंतरमंडलंउवसंकमित्ता चारं चरंति तया णं नवणउत्तिं जोयणसहस्साइं छत्त चत्ताले जोयणसए अण्णमण्णस्स अंतरं कट्टु चारं चरंति आहिताति वएज्जा तया णं उत्तमकट्टुपत्ते

उक्कोसए अद्वारसमुहुत्ते दिवसे भवइ जहण्णिया दुवालसमुहुत्ता राती भवति ते निक्खममाणा सूरिया नवं
संवच्छंर अयमाणा पढमंसि अहोरत्तंसि अब्भितराणंतरं मंडलं उवसंकमिक्ता
पाहुडं-१, पाहुडपाहुडं-४

चारं चरंति ता जया णं एते दुवे सूरिया अब्भितराणंतरं मंडल उवसंकमिक्ता चारं चरंति तथा णं नवणवतिं
जोयणसहस्साइं छच्च पणयाले जोयणसए पणवीसं च एगद्धिभागे जोयणस्स अण्णमण्णस्स अंतरं कट्टु चारं
चरंति आहिताति वएज्जा तथा णं अद्वारसमुहुत्ते दिवसे भवइ दोहिं एगद्धिभागमुहुत्तेहिं ऊणे दुवाल-समुहुत्त
राती भवति दोहिं एगद्धिभागमुहुत्तेहिं अहिया ते निक्खममाणा सूरिया दोच्चंसि अहोरत्तंसि अब्भितरं तच्चं
मंडलं उवसंकमिक्ता चारं चरंति ता जया णं एते दुवे सूरिया अब्भितरं तच्चं मंडलं उवसंक-मिक्ता चारं
चरंति तथा णं नवणवतिं जोयणसहस्साइं छच्च इक्कावण्णे जोयणसए नव य एगद्धिभागे जोयणस्स
अण्णमण्णस्स अंतरं कट्टु चारं चरंति आहिताति वएज्जा तथा णं अद्वारसमुहुत्ते दिवसे भवइ-चउहिं
एगद्धिभागमुहुत्तेहिं ऊणे दुवालसमुहुत्ता राती भवति चउहिं एगद्धिभागमुहुत्तेहिं अहिया एवं खलु
एतेणुवाएणं निक्खममाणा एते दुवे सूरियातयाणंतराओ तयाणंतरं मंडलाओ मंडलं संकममाणा-संकममाणा
पंच-पंच जोयणाइं पणतीसं च एगद्धिभागे जोयणस्स एगमेगे मंडले अण्णमण्णस्स अंतरं अभिवड्ढेमाणा-
अभिवड्ढेमाणा सव्वबाहिरं मंडलं उवसंकमिक्ता चारं चरंति ता जया णं एते दुवे सूरिया सव्वबाहिरं मंडलं
उवसंकमिक्ता चारं चरंति तथा णं एगं जोयणसयसहस्सं छच्च सट्ठे जोयणसए अण्णमण्णस्स अंतरं कट्टु
चारं चरंति तथा णं उत्तमकट्टपत्ता उक्कोसिया अद्वारसमुहुत्ता राती भवति जहण्णए दुवालसमुहुत्ते दिवसे
भवइ एस णं पढमे छम्मासे एस णं पढमस्स छम्मासस्स पज्जवसाणे, ते पविसमाणा सूरिया दोच्चं
छम्मासं अयमाणा पढमंसि अहोरत्तंसि बाहिराणंतरं मंडलं उवसंकमिक्ता चारं चरंति ता जया णं एते दुवे
सूरिया बाहिराणंतरं मंडलं उवसंकमिक्ता चारं चरंति तथा णं एगं जोयणसयसहस्सं छच्च चउप्पण्णे
जोयण-सए छव्वीसं च एगद्धिभागे जोयणस्स अण्णमण्णस्स अंतरं कट्टु चारं चरंति आहिताति वएज्जा
तथा णं अद्वारसमुहुत्ता राती भवति दोहिं एगद्धिभागमुहुत्तेहिं ऊणा दुवालसमुहुत्ते दिवसे भवइ दोहिं
एगद्धिभाग-मुहुत्तेहिं अहिए ते पविसमाणा सूरिया दोच्चंसि अहोरत्तंसि बाहिरं तच्चं मंडलं उवसंकमिक्ता
चारं चरंति वा जया णं एते दुवे सूरिया बाहिरं तच्चं मंडलं उवसंकमिक्ता चारं चरंति तथा णं एगं
जोयणसय-सहस्सं छच्च अडयाले जोयणसए बावण्णं च एगद्धिभागे जोयणस्स अण्णमण्णस्स अंतरं कट्टु
चारं चरंति तथा णं अद्वारसमुहुत्ता राती भवति चउहिं एगद्धिभागमुहुत्तेहिं ऊणा दुवालसमुहुत्ते दिवसे भवइ
चउहिं एगद्धिभाग-मुहुत्तेहिं अहिए एवं खलु एतेणुवाएणं पविसमाणा एते दुवे सूरिया तयाणंतराओ जाव
पणतीसे एगद्धिभागे जोयणस्स एगमेगे मंडले अण्णमण्णस्स अंतरं निवुड्ढेमाणा-निवुड्ढेमाणा
सव्वब्भंतरमंडलं उवसंकमिक्ता चारं चरंति ता जया णं एते सूरिया सव्वब्भंतरं मंडलं उवसंकमिक्ता चारं
चरंति तथा णं नवणउतिं जोयण-सहस्साइं छच्च चत्ताले जोयणसए अण्णमण्णस्स अंतरं कट्टु चारं चरंति
तथा णं उत्तमकट्टपत्ते उक्कोसए अद्वारसमुहुत्ते दिवसे भवइ जहण्णिया दुवालसमुहुत्ता राती भवति एस
णं दोच्चे छम्मासे एस णं दोच्चस्स छम्मासस्स पज्जवसाणे एस णं आदिच्चे संवच्छरे एस णं
आदिच्चस्स संवच्छरस्स पज्जवसाणे ।

◦ पढमे पाहुडे चउत्थं पाहुडपाहुडं समत्तं ◦

□ पंचमं पाहुडपाहुडं □

[३०] ता केवतियं ते दीवं समुद्धं वा ओगाहिक्ता सूरिए चारं चरइ आहितेति वएज्जा तत्थ खलु इमाओ पंच पडिवत्तीओ पन्नत्ताओ तत्थ एगे एवमाहंसु-ता एगं जोयणसहस्सं एगं च चेत्तीसं जोयण-सयं दीवं समुद्धं वा ओगाहिक्ता सूरिए चारं चरइ आहितेति वएज्जा-एगे एवमाहंसु, एगे पुण एवमाहंसु-ता

पाहुडं-१, पाहुडपाहुडं-५

एगं जोयणसहस्सं एगं च चउत्तीसं जोयणसयं दीवं समुद्धंवा ओगाहिक्तासूरिए चारं चरइ आहितेति वएज्जा-एगे एवमाहंसु, एगे पुणएवमाहंसु-ता एग जोयणसहस्सं एगं चपणतीसं जोयणसयं दीवं समुद्धं वा ओगा-हिक्ता सूरिए चारं चरइ आहितेति वएज्जा-एगे एवमाहंसु एगे पुण एवमाहंसु-ता अवड्ढं दीवं समुद्धं वा ओगाहिक्ता सूरिए चारं चरइ आहितेति वएज्जा-एगे एवमाहंसु एगे पुण एवमाहंसु-ता किंचि दीवं समुद्धंवा ओगाहिक्ता सूरिए चारं चरइ आहितेति वएज्जा-एगे एवमाहंसु तत्थ जेते एवमाहंसु-ता एगं जोयणसहस्सं एगं च तेत्तीसं जोयणसयं दीवं समुद्धं वा ओगाहिक्ता सूरिए चारं चरइ ते एवमाहंसु-ता जया णं सूरिए सव्व-ब्भंतरं मंडलं उवसंकमित्ता चारं चरइ तया णं जंबुद्धीवं दीवं एगं जोयणसहस्सं एगं च तेत्तीसं जोयणसयं ओगाहिक्तासूरिए चारं चरइ तया णं उत्तमकड्डपत्ते उक्कोसए अट्टारसमुहुत्ते दिवसे भवइ जहण्णिया दुवाल-समुहुत्ता राती भवति ता जया णं सूरिए सव्वबाहिरं मंडलं उवसंकमित्ता चारं चरइ तया णं लवणसमुद्धं एगं जोयणसहस्सं एगं च तेत्तीसं जोयणसयं ओगाहिक्ता चार चरइ तया णं उत्तमकड्डपत्ता उक्कोसिया अट्टार-समुहुत्ता राती भवति जहण्णए दुवालसमुहुत्ते दिवसे भवइ एवं चोत्तीसं जोयणसयं एवं पणतीस जोयणसयं तत्थ जेते एवमाहंसु-ता अवड्ढं दीवं समुद्धं वा ओगाहिक्ता सूरिए चारं चरइ ते एवमाहंसु-ता जया णं सूरिए सव्वब्भंतरं मंडलं उवसंकमित्ता चारं चरइ तया णं अवड्ढं जंबुद्धीवं दीवं ओगाहिक्ता चारं चरइ तया णं उत्तमकड्डपत्ते उक्कोसए अट्टारसमुहुत्ते दिवसे भवइ जहण्णिया दुवालसमुहुत्ता राती भवति एवं सव्वबाहिर-एवि नवरं-अवड्ढं लवणसमुद्धं तया णं राइंदियं तहेव तत्थ जेते एवमाहंसु-ता नो किंचि दीवं समुद्धं वा ओगाहिक्ता सूरिए चारं चरइ ते एवमाहंसु-ता जया णं सूरिए सव्वब्भंतरं मंडलं उवसंकमित्ता चारं चरइ तया णं नो किंचि दीवं समुद्धं वा ओगाहिक्ता सूरिए चारं चरइ तया णं उत्तमकड्डपत्ते उक्कोसेणं अट्टारसमुहुत्ते दिवसे भवइ तहेव एवं सव्वबाहिरए मंडले नवरं-नो किंचि लवणसमुद्धं ओगाहिक्ता चारं चरइ राइंदियं तहेव एगे एवमाहंसु ।

[३१] वयं पुण एवं वयामो-ता जया णं सूरिए सव्वब्भंतरं मंडलं उवसंकमित्ता चारं चरइ तया णं जंबुद्धीवं दीवं असीतं जोयणसतं ओगाहिक्ता चारं चरइ तया णं उत्तमकड्डपत्ते उक्कोसए अट्टारसमुहुत्ते दिवसे भवइ जहण्णिया दुवालसमुहुत्ता राती भवति एवं सव्वबाहिरेवि नवरंलवणसमुद्धं तिण्णि तीसे जोयणसए ओगाहिक्ता चारं चरइ तया णं उत्तमकड्डपत्ता उक्कोसिया अट्टारसमुहुत्ता राती भवति जहण्णए दुवालसमुहुत्ते दिवसे भवइ गाहाओ भाणियव्वाओ ।

• पढमे पाहुडे पंचमं पाहुडपाहुडं समत्तं •

□ छडं पाहुडपाहुडं □

[३२] ता केवतियं ते एगमेगेणं राइंदिएणं विकंपइत्ता-विकंपइत्ता सूरिए चारं चरइ आहितेति वएज्जा तत्थ खलुइमाओ सत्त पडिवत्तीओ पन्नत्ताओ तत्थ एगे एवमाहंसु-ता दो जोयणाइं अद्धबायालीसं तेसीतिसतभागे जोयणसस्स एगमेगेणं राइंदिएणं विकंपइत्ता-विकंपइत्ता सूरिए चारं चरइ

आहितेति वएज्जा-एगे एवमाहंसु, एगे पुण एवमाहंसु-ता अड्ढाज्जाइं जोयणाइं एगमेगेणं राइंदिएणं विकंपइत्ता० जाव एगे एवमाहंसु एगे पुण एवमाहंसु-ता तिभागूणाइं तिण्णि जोणाइं एगमेगेणं राइंदिएणं विकंपइत्ता जाव एग एवमाहंसु, एगे पुण एवमाहंसु-ता तिण्णि जोयणाइं अद्धसीतालीसं च तेसीतिसयभागे जोयणस्स एगमेगेणं राइंदिएणं विकंपइत्ता-विकंपइत्ता सूरिए चारं चरइ आहितेति वएज्जा-एगे एवमाहंसु एगे पुण एवमाहंसु-ता

पाहुंडं-१, पाहुंडपाहुंडं-६

अद्धुवाइं जोयणाइं एगमेगेणं राइंदिएणं विकंपइत्ता जाव एगे एवमाहंसु एगे पुण एवमाहंसु-ता चउब्भा-गूणाइं चत्तारि जोयणाइं एगमेगेणं राइंदिएणं विकंपइत्ता जाव एगे एवमाहंसु एगे पुण एवमाहंसु-ता चत्तारि जोयणाइं अद्धबावण्णं च तेसीतिसयभागे जोयणस्स एगमेगेणं राइंदिएणं विकंपइत्ता चारं चरइ आहितेति वएज्जा-एगे एवमाहंसु, वयं पुण एवं वयामो-ता दो जोयणाइं अडतालीसं च एगद्धिभागे जोयणस्स एगमेगं मंडलं एगमेगेणं राइंदिएणं विकंपइत्ता-विकंपइत्ता सूरिए चारं चरइ तत्थ णं को हेतूति वएज्जा ता अयण्णं जंबुद्धीवे दीवे सव्वदीवमुद्दाणं सव्वब्भंतराए जाव परिकखेवेणं पन्नत्ते ता जया णं सूरिए सव्वब्भंतरं मंडलं उवसंकमित्ता चारं चरइ तया णं उत्तमकइपत्ते उक्कोसए अद्वारसमुहुत्ते दिवसे भवइ जहण्णिया दुवाल-समुहुत्ता राती भवति से निक्खममाणे सूरिए नवं संवच्छरं अयमाणे पढमंसि अहोरत्तंसि अब्भितराणंतरं मंडलं उवसंकमित्ता चारं चरइ ता जया णं सूरिए अब्भितराणंतरं मंडलं उवसंकमित्ता चारं चरइ तया णं दो जोयणाइं अडयालीसं च एगद्धिभागे जोयणस्स एगेणं राइंदिएणं विकंपइत्ता चारं चरइ तया णं अद्वार-समुहुत्ते दिवसे भवइ दोहिं एगद्धिभागमुहुत्तेहिं ऊणे दुवालसमुहुत्ता राती भवति दोहिं एगद्धिभागमुहुत्तेहिं अहिया से निक्खममाणे सूरिए दोच्चंसि अहोरत्तंसि अब्भितरं तच्चं मंडलं उवसंकमित्ता चारं चरइ ता जया णं सूरिए अब्भितरं तच्चं मंडलं उवसंकमित्ता चारं चरइ ता जया णं सूरिए अब्भितरं तच्चं मंडलं उवसंकमित्ता चारं चरइ तया णं पंच जोयणाइं पणतीसं एगद्धिभागे जोयणस्स दोहिं राइंदिएहिं विकंपइत्ता चारं चरइ तया णं अद्वारसमुहुत्ते दिवसे भवइ चउहिं एगद्धिभागमुहुत्तेहिं ऊणे दुवालसमुहुत्ता राती भवति चउहिं एगद्धिभागमुहुत्तेहिं अहिया एवं खलु एतेणं उवाएणं निक्खममाणे सूरिए तयाणंतराओ तयाणंतरं मंडलाओ मंडलं संकममाणेसंकममाणे दो-दो जोयणाइं अडतालीसं च एगद्धिभागे जोयणस्स एगमेगं अमंडलं एगमेगेणं राइंदिएणं विकंपमाणे-विकंपमाणे सव्वबाहिरं मंडलं उवसंकमित्ता चारं चरइ ता जया णं सूरिए सव्वब्भंतराओ मंडलाओ सव्वबाहिरं मंडलं उवसंकमित्ता चारं चरइ तया णं सव्वब्भंतरं मंडलं पणिहाय एगेणं तेसीतेणं राइंदियसतेणं पंचदसुत्तरजोयणसए विकंपइत्ता चारं चरइ तया णं उत्तमकइपत्ता उक्कोसिया अद्वारसमुहुत्ता राती भवति जहण्णए दुवालसमुहुत्ते दिवसे भवइ एस णं पढमे छम्मासे एस णं पढमस्स छम्मासस्स पज्जवसाणे, से पविसमाणे सूरिए दोच्चं छम्मासंअयमाणे पढमंसि अहोरत्तंसि बाहि-राणंतरं मंडलं उवसंकमित्ता चारं चरइता जया णं सूरिए बाहिराणंतरं मंडलं उवसंकमित्ता चारं चरइ तया णं दो-दो जोयणिं अडतालीसं च एगद्धिभागे जोयणस्सएगेणं राइंदिएणं विकंपइत्ता चारं चरइ तया णं अद्वार-समुहुत्ता राती भवति दोहिं एगद्धिभागमुहुत्तेहिं ऊणा दुवालसमुहुत्ते दिवसे भवइ दोहिं एगद्धिभागमुहुत्तेहिं अहिए से पविसमाणे सूरिएदोच्चंसि अहोरत्तंसि बाहिरतच्चं मंडलं उवसंकमित्ता चारं चरइ तया णं पंच जोयणाइं पणतीसं च एगद्धिभागे जोयणस्स दोहिं राइंदिएहिं विकंपइत्ता चारं चरइ राइंदिए तहेव एवं खलु एतेणुवाएणं पविसमाणे सूरिए तयाणंतराओ तयाणंतरं मंडलाओ मंडलं संकममाणे-संकममाणे दो-दो

जोयणाइं अडयालीसं च एगद्विभागे जोयणस्स एगमेगेणं राइंदिएणं विकंपमाणे-विकंपमाणे सव्वब्भंतरं मंडलं उवसंकमित्ता चारं चरइ तया णं सव्वबाहिरं मंडलं पणिहायं एगेणं तेसीतेणं राइंदियसतेणं पंचदसुत्तरे जोयणसते विकंपइत्ता चारं चरइ तया णं उत्तमकट्टपत्ते उक्कोसए अद्वारसमुहुत्ते दिवसे भवइ जहणिया दुवालसमुहुत्ता राती भवति एस णं दोच्चे छम्मासे एस णं दोच्चस्स छम्मास्स पज्जवसाणे एस णं आदिच्चे संवच्छरे एस णं आदिच्चस्स संवच्छरस्स पज्जवसाणे ।

◦ पढमे पाहुडे छइं पाहुडपाहुडं समत्तं ◦

पाहुडं-१, पाहुडपाहुडं-७

□ सत्तमं पाहुडपाहुडं □

[३३] ता कहं ते मंडलसंठिती आहितेति वएज्जा तत्थ खलु इमाओ अद्व पडिवत्तीओ पन्नत्ताओ तत्थ एगे एवमाहंसु-ता सव्वावि मंडलवता समचउरंससंठाणसंठिता पन्नत्ता-एगे एवमाहंसु, एगे पुण एवमाहंसु-ता सव्वावि मंडलवता विसमचउरंससंठाणसंठिता◦ एगे पुण एवमाहंसुता सव्वावि मंडलवता समचउक्कोणसंठिता◦ एगे पुण एवमाहंसु-ता सव्ववि मंडलवता विसमचउक्कोणसंठिता◦ एगे पुण एवमाहंसुता सव्वावि मंडलवता समचक्कवालसंठिता◦ एगे पुण एवमाहंसुता सव्वावि मंडलवता विसमचक्कवालसंठिता◦ एगे पुण एवमाहंसु-तासव्वावि मंडलवता चक्कद्धचक्कवालसंठिता◦ एगे पुण एवमाहंसुता सव्वावि मंडलवता छत्तागारसंठिता◦ तत्थ जेते एवमाहंसुता सव्वावि मंडलवता छत्तागारसंठिता पन्नत्ता एतेणं नएणं नायव्वं नो चेव णं इतरेहिं पाहुडगाहाओ भाणियव्वाओ ।

◦ पढमे पाहुडे सत्तमं पाहुडपाहुडं समत्तं ◦

□ अडमं पाहुडपाहुडं □

[३४] ता सव्वावि णं मंडलवता केवतियं बाहल्लेणं केवतियं आयाम-विकखंभेणं केवतियं परिकखेवेणं अहिताति वएज्जा तत्थ खलु इमाओ तिण्णि पडिवत्तीओ पन्नत्ताओ तत्थ एगे एवमाहंसुता सव्वावि णं मंडलवता जोयणं बाहल्लेणं एगं जोयणसहस्सं एगं च तेत्तीसं जोयणसयं आयामविकखंभेणं तिण्णि जोयणसहस्साइं तिण्णि य नवणउए जोयणसए परिकखेवेणं पन्नत्ता-एगे एवमाहंसु, एगे पुण एवमाहंसु-ता सव्वावि णं मंडलवत्ता जोयण बाहल्लेणं एगं जोयणसहस्सं एगं च चउतीसं जोयणसयं आयामविकखंभेणं तिण्णि जोयणसहस्साइं चत्तारि बिउत्तरे जोयणसए परिकखेवेणं एगेपुण एवमाहंसु-ता सव्वावि णं मंडलवता जोयणं बाहल्लेणं एगं जोयणसहस्सं एगं च पणतीसं जोयणसयं आयाम-विकखंभेणं तिण्णि जोयणसहस्साइं चत्तारि य पंचुत्तरे जोयणसए परिकखेवेणं वयं पुण एवं वयामो तासव्वावि णं मंडलवता अडतालीसं एगद्विभागे जोयणस्स बाहल्लेणं अणियता आयाम-विकखंभ-परिकखेवेणं आहिताति वएज्जा, तत्थ णं को हेतूति वएज्जा ता अयण्णं जंबुद्धीवे दीवे सव्वदीवसमुद्धानं सव्वब्भंतराए जाव परिकखेवेणं ता जया णं सूरिए सव्वब्भंतरं मंडलं उवसंकमित्ता चारं चरइ तया णं सा मंडलवता अडतालीसं एगद्विभागे जोयणस्स बाहल्लेणं नवणउतिं जोयणसहस्साइं छच्च चताले जोयणसए आयामविकखंभेणं तिण्णि जोयणसयससहस्साइं पन्नरस य जोयणसहस्साइं एगूण्णिउतिं जोयणाइं किंचि विसेसाहिए परिकखेवेणं तया णं उत्तमकट्टपत्ते उक्कोसए अद्वारसमुहुत्ते दिवे भवइ जहणिया जहणिया दुवालसमुहुत्ता राती भवति से निक्खममाणे सूरिए नवं संवच्छरं अयमाणे पढमंसि अहोरत्तंसि

अब्धितराणंतरं मंडलं उव-संकमिता चारं चरइ ता जया णं सूरिए अब्धितराणंतरं मंडलं उवसंकमिता चारं चरइ तथा णं सा मंडलता अडतालीसं एगड्ढिभागे जोयणस्स बाहल्लेणं नवणउतिजोयणसहस्साइं छच्च पणयाले जोयणसए पणतीसं च एगड्ढिभागे जोयणस्स आयाम-विकखंभेणं तिण्णि जोयणसयसहस्साइं पन्नरस य सहस्साइं एगं च सत्तुत्तरं जोयणसयं किंचिविसेसूणं परिकखेवेणं तथा णं दिवसराइप्पमाणं तहेव से निक्खममाणे सूरिए दोच्चंसि अहोरत्तंसि अब्धितरं तच्चं मंडलं उवसंकमिता चारं चरइ ता जया णं सूरिए अब्धितरं तच्चं मंडलं उवसंकमिता चारं चरइ तथा णं सा मंडलवता अडतालीसं एगड्ढिभागे जोयणस्स बाहल्लेणं नवणउतिं पाहुडं-१, पाहुडपाहुडं-८

जोयणसहस्साइं छच्च एक्कावण्णे जोयणसए नव य एगड्ढिभागे जोयणस्स आयाम-विकखंभेणं तिण्णि जोयणसयसहस्साइं पन्नरस य सहस्साइं एगं पणवीसं जोयणसयं परिकखेवेणं तथा णं दिवसराइं तहेव एवं खलु एतेणं उवाएणं निक्खममाणे सूरिए तयाणंतराओ तयाणंतरं मंडलाओ मंडलं संकममाणे-संकममाणे पंच-पंच जोयणाइं पणतीसं च एगड्ढिभागे जोयणस्स एगमेगे मंडले विकखंभवुड्ढिं अभिवड्ढेमाणे-अभिवड्ढेमाणे अट्टारस-अट्टारस जोयणाइं परिरयवुड्ढिं अभिवड्ढेमाणे-अभिवड्ढेमाणे सव्वबाहिरं उवसं-कमिता चारं चरइ ता जया णं सूरिए सव्वबाहिरमंडलं उवसंकमिता चारं चरइ तथा णं सा मंडलवता अड-तालीसं एगड्ढिभागा जोयणस्स बाहल्लेणं एगं जोयणसयसहस्सं छच्च सट्ठे जोयणसए आयाम-विकखंभेणं तिण्णि जोयणसयसहस्साइं अट्टारस सहस्साइं तिण्णि य पन्नरसुत्तरे जोयणसए परिकखेवेणं तथा णं उक्कोसिया अट्टारसमुहुत्ता राती भवति जहण्णए दुवालसमुहुत्ते दिवसे भवइ एस णं पढमे छम्मासे एस णं पढमस्स छम्मासस्स पज्जवसाणे से पविसमाणे सूरिए दोच्चं छम्मासं अयमाणे पढमंसि अहोरत्तंसि बाहिराणंतरं मंडल उवसंकमिता चारं चरइ ता जया णं सूरिए बाहिराणंतरं मंडलं उवसंकमिता चारं चरइ तथा णं सा मंडलवता अडतालीसं एगड्ढिभागे जोयणस्स बाहल्लेणं एगं जोयणसयसहस्सं छच्च चउप्पण्णे जोयणसए छव्वीसं च एगड्ढिभागे जोयणस्स आयाम-विकखंभेणं तिण्णि जोयणसयसहस्साइं अट्टारस सहस्साइं दोण्णि य सत्ताणउए जोयणसए परिकखेवेणं तथा णं राइंदियं तहेव से पविसमाणे सूरिए दोच्चंसि अहोरत्तंसि बाहिरं तच्चं-मंडलं-उवसंकमिता चारं चरइ ता जया णं सूरिए बाहिरं तच्चं मंडलं उवसंकमिता चारं चरइ तथा णं सा मंडलवता अडतालीसं एगड्ढिभागे जोयणस्स बाहल्लेणं बाहल्लेणं नवणउतिं जोयण-सहस्साइं छच्च चत्ताले जोयणसए आयाम-विकखंभेणं तिण्णि जोयणसयसहस्साइं पन्नरस य सहस्साइं अउणाउतिं च जोयणाइं किंचिविसेसाहियाइं परिकखेवेणं तथा णं उत्तमकडुपत्ते उक्कोसए अट्टारसमुहुत्ते दिवसे भवइ जहण्णिया दुवालसमुहुत्ता राती भवति एस णं दोच्चे छम्मासे एस णं दोच्चस्स छम्मासस्स पज्जवसाणे एस णं आदिच्चे संवच्छरे एस णं आदिच्चस्स संवच्छरस्स पज्जवसाणे ता सव्वावि णं मंडलवता अडतालीसं एगड्ढिभागे जोयणस्स बाहल्लेणं सव्वावि णं मंडलंतरिया दो जोयणाइं विकखंभेणं एस णं अट्टा तेसीयसयपडुप्पण्णो पंचदसुत्तरे जोयणसए आहिताति वएज्जा ता अब्धितराओ मंडलवताओ बाहिरा मंडलवता बाहिराओ वा मंडलवताओ अब्धितरा मंडलवता एस णं अट्टा केवतियं आहितेति वएज्जा ता पंचदसुत्तरे जोयणसए अडतालीसं च एगड्ढिभागे जोयणस्स आहितेति वएज्जा ता अब्धितरओ मंडलवताओ बाहिरा मंडलवता बाहिराओ वा मंडलवताओ अब्धितरा मंडलवता एस णं अट्टा केवतियं आहितेति वएज्जा ता पंचणवुत्तरे जोयणसए तेरस य एगड्ढिभागे जोयणस्स आहितेति वएज्जा ता अब्धितराए मंडलवताए

बाहिरा मंडलवता बाहिराए वा मंडलवताए अब्भितरा मंडलवता एस णं अद्धा केवतियं आहितेति वएज्जा ता पंचदसुत्तरे जोयणसए आहितेति वएज्जा।

• मुनि दीपरत्नसागरेण संशोधितः सम्पादित्तश्च पढमं पाहुडं समत्तं •

० बीयं पाहुडं ०

[] पढमं पाहुडपाहुडं []

[३५] ता कहं ते तिरिच्छगती आहिताति वएज्जा तत्थ खलु इमाओ अद्ध पडिवत्तीओ पन्नत्ताओ तत्थ एगे एवमाहंसु-ता पुरत्थिमाओ लोयंताओ पादो मिरीची आगासंसि उत्तिट्ठइ से णं इमं पाहुडं-२, पाहुडपाहुडं-१

तिरियं लोयं तिरियं करेइ करेत्ता पच्चत्थिमंसि लोयंतंसि सायं मिरीयं आगासंसि विद्धंसइ-एगे पुण एवमाहंसु-ता पुरत्थिमाओ लोयंताओ पादो सूरिए आगासंसि उत्तिट्ठइ से णं इमं तिरियं लोयं तिरियं करेइ करेत्ता पच्चत्थिमंसि लोयंतंसि सायं सूरिए आगासंसि विद्धंसइ-एगे पुण एवमाहंसुता पुरत्थिमाओ लोयंताओ पादो सूरिए आगासंसि उत्तिट्ठइ से णं इमं तिरियं लोयं तिरियं करेइ करेत्ता पच्चत्थिमंसि लोयंतंसि सायं सूरिए आगासं अनुपविसइ अनुपविसित्ता अहे पडियागच्छइ पडियागच्छित्ता पुनरवि अवरभूपुरत्थिमाओ लोयंताओ पादो सूरिए आगासंसि उत्तिट्ठइ-एगे पुण एवमाहंसु-ता पुरत्थिमाओ लोयंताओ पाओ सूरिए पुढविकायंसि उत्तिट्ठइ से णं इमं तिरियं लोयं तिरियं करेइ करेत्ता पच्चत्थिमिल्लंसि लोयंतंसि सायं सूरिए पुढविकायंसि विद्धंसइ-एगे पुण एवमाहंसु-ता पुरत्थिमाओ लोयंताओ पाओ सूरिए पुढविकायंसि उत्तिट्ठइ से णं इमं तिरियं लोयं तिरियं करेइ करेत्ता पच्चत्थिमिल्लंसि लोयंतंसि सायं सूरिए पुढविकायंसि विद्धंसइ-एगे पुण एवमाहंसु-ता पुरत्थिमाओ लोयंताओ पाओ सूरिए पुढविकायंसि उत्तिट्ठइ से णं इमं तिरियं लोयं तिरियं करेइ करेत्ता पच्चत्थिमंसि लोयंतंसि सायं सूरिए पुढविकायंसि अनुपविसइ अनुपविसित्ता अहे पडियागच्छइ पडियागच्छित्ता पुनरवि अवरभूपुरत्थिमाओ लोयंताओ पाओ सूरिए पुढविकायंसि उत्तिट्ठइ-एगे पुण एवमाहंसु-ता पुरत्थिमिल्लाओ लोयंताओ पाओ सूरिए आउकायंसि उत्तिट्ठइ से णं इमं तिरियं लोयं तिरियं करेइ करेत्ता पच्चत्थिमंसि लोयंतंसि पाओ सूरिए आउकायंसि विद्धंसइएगे पुण एवमाहंसु-ता पुरत्थिमाओ लोयंताओ पाओ सूरिए आउकायंसि उत्तिट्ठइ से णं इमं तिरियं लोयं तिरियं करेइ करेत्ता पच्चत्थिमंसि लोयंतंसि सायं सूरिए आउकायंसि अनुपविसइ अनुपविसित्ता अहे पडियागच्छइ पडियागच्छित्ता पुनरवि अवरभूपुरत्थिमाओ लोयंताओ पाओ सूरिए आउकायंसि उत्तिट्ठइ-एगे पुण एवमाहंसु-ता पुरत्थिमाओ लोयंताओ पाओ सूरिए आउकायंसि उत्तिट्ठइ से णं इमं तिरियं लोयं तिरियं करेइ करेत्ता पच्चत्थिमंसि लोयंतंसि सायं सूरिए आउकायंसि अनुपविसइ अनुपविसित्ता अहे पडियागच्छइ पडियागच्छित्ता पुनरवि अवरभूपुरत्थिमाओ लोयंताओ पाओ सूरिए आउकायंसि उत्तिट्ठइ-एगे पुण एवमाहंसु-ता पुरत्थिमाओ लोयंताओ बहूइं जोयणाइं बहूइं जोयणसयाइं बहूइं जोयणसहस्साइं उड्ढं दूरं उप्पइत्ता एत्थ णं पाओ सूरिए आगासंसि उत्तिट्ठइ से णं इमं दाहिणड्ढं लोयं तिरियं करेइ करेत्ता उत्तरड्ढलोयं तमेव राओ से णं इमं उत्तरड्ढलोयं तिरियं करेइ करेत्ता दाहिणड्ढलोयं तमेव राओ से णं इमाइं दाहिणुत्तरड्ढ-लोयाइं तिरियं करेइ करेत्ता पुरत्थिमाओ लोयंताओ बहूइं जोयणाइं बहूइं जोयणसयाइं बहूइं जोयणसहस्साइं उड्ढं दूरं उप्पइत्ता एत्थ णं पाओ सूरिए आगासंसि उत्तिट्ठइ-वयं पुण एवं वयामो-ता जंबुद्धीवस्स दीवस्स पाईणव-डीणायताए उदीणदाहिणायताए जीवाए मंडलं चउव्वीसेणं सएणं छेत्ता दाहिणपुरत्थिमंसि उत्तरपच्चत्थिमंसि य चउव्वीमंडलंसि इमीसे रयणप्पभाए पुढवीए बहुसमरमणिज्जाओ भूमिभागाओ अद्ध जोयणसयाइं उड्ढं उप्पइत्ता एत्थ णं पाओ दुवे सूरिया उत्तिट्ठइति ते णं इमाइं दाहिणुत्तराइं जंबुद्धीवभागाइं तिरियं करेति करेत्ता पुरत्थिमपच्चत्थिमाइं जंबुद्धीवभागाइं तामेव राओ ते णं

इमाइं पुरत्थिमपच्चत्थिमाइं जंबुद्वीवभागाइं तिरियं करेति करेत्ता दाहिणुत्तराइं जंबुद्वीवभागाइं तामेव राओ ते णं इमाइं दाहिणुत्तराइं पुरत्थिमपच्चत्थिमाणि य जंबुद्वीवभागाइं तिरियं करेति करेत्ता जंबुद्वीवस्स दीवस्स पाईणपडीणायताए जाव छेत्ता दाहिणपुरत्थिमिल्लंसि उत्तरपच्चत्थिमिल्लंसि य चउभागमंडलंसि इमीसे रयणप्पभाए बहुसमरमणि-ज्जाओ भूमिभागाओ अट्ट जोयणसयाइं उड्ढं उप्पइत्ता एत्थ णं पाओ दुवे सूरिया आगासंसि उत्तिड्ढंति ।

◦ बीए पाहुडे पढमं पाहुडपाहुडं समत्तं ◦

◻ बीयं पाहुडपाहुडं ◻

[३६] ता कहं ते मंडलाओ मंडलं संकममाणे सूरिए चारं चरति आहिताति वएज्जा तत्थ पाहुडं-२, पाहुडपाहुडं-२

खलु इमाओ दुवे पडिवत्तीओ पन्नत्ताओ तत्थेगे एवमाहंसु-ता मंडलाओ मंडलं संकममाणे सूरिए भेयघाएणं संकमति-एगे एवमाहंसु, एगे पुण एवमाहंसु-ता मंडलाओ मंडलं संकममाणे सूरिए कण्णकलं निव्वेढेति तत्थ जेते एवमाहंसु-ता मंडलाओ मंडलं संकममाणे सूरिए भेयघाएणं संकमति तेसि णं अयं दोसे ता जेणंतरेणं मंडलाओ मंडलं संकममाणे सूरिए भेयघाएणं संकमति एवतियं च णं अद्धं पुरतो न गच्छति पुरतो अगच्छमाणे मंडलकालं परिहवेति तेसि णं अयं दोसे तत्थ जेते एवमाहंसु-ता मंडलाओ मंडलं संकममाणे सूरिए कण्णकलं निव्वेढेति तेसि णं अयं विसेसे ता जेणंतरेणं मंडलाओ मंडलं संकममाणे सूरिए कण्णकलं निव्वेढेति एवतियं च णं अद्धं पुरतो गच्छति पुरतो गच्छमाणे मंडलकालं न परिहवेति तेसि णं अयं विसेसे तत्थ जेते एवमाहंसु-ता मंडलाओ मंडलं संकममाणे सूरिए कण्णकलं निव्वेढेइ एतेणं नएणं नेयव्वं नो चेव णं इतरेणं ।

◦ बीए पाहुडे बीयं पाहुडपाहुडं समत्तं ◦

◻ तच्चं पाहुडपाहुडं ◻

[३७] ता केवतियं ते खेत्तं सूरिए एगमेगेमं मुहुत्तेणं गच्छति आहितातिवएज्जा तत्थ खलु इमाओ चत्तारि पडिवत्तीओ पन्नत्ताओ तत्थ एगे एवमाहंसु-ता छ छ जोयणसहस्साइं सूरिए एगमेगेणं मुहुत्तेणं गच्छति-एगे पुण एवमाहंसु-ता पंच-पंच जोयणसहस्साइं सूरिए एगमेगेणं मुहुत्तेणं गच्छति-एगे पुण एवमाहंसु-ता चत्तारि-चत्तारि जोयणसहस्साइं सूरिए एगमेगेणं मुहुत्तेणं गच्छति-एगे पुण एवमाहंसु-ता छवि पंचवि चत्तारिवि जोयणसहस्साइं सूरिए एगमेगेमं मुहुत्तेणं गच्छति-तत्थ जेते एवमाहंसु-ता छ छ जोयणसहस्साइं सूरिए एगमेगेणं मुहुत्तेणं गच्छति ते एवमाहंसु-ता जया णं सूरिए सव्वब्भंतरं मंडलं उव-संकमित्ता चारं चरति तथा णं उत्तमकड्डपत्ते उक्कोसे अट्टारसमुहुत्ते दिवसे भवइ जहणिया दुवालसमुहुत्ता राती भवति तंसि च णं दिवसंसि एगं जोयणसयसहस्सं अट्ट य जोयणसहस्साइं तावक्खेत्ते पन्नत्ते ता जया णं सूरिए सव्वबाहिरं मंडलं उवसंकमित्ता चारं चरति तथा णं उत्तम-कड्डपत्ता उक्कोसिया अट्टार-समुहुत्ता राती भवति जहणए दुवालसमुहुत्ते दिवसे भवइ तंसि च णं दिवसंसि बावत्तरिं जोयणसहस्साइं तावक्खेत्ते पन्नत्ते◦ तत्थ जेते एवमाहंसु-ता पंच-पंच जोयणसहस्साइं सूरिए एगमेगेणं मुहुत्तेणं गच्छति ते एवमाहंसु-ता जया णं सूरिए सव्वब्भंतरं मंडलं उवसंकमित्ता चारं चरति तहेव दिवसराइप्पमाणं तंसि च णं दिवसंसि नवतिं जोयणसहस्साइं तावक्खेत्ते पन्नत्ते ता जया णं सूरिए

सव्व-बाहिरं मंडलं उवसंकमित्ता चारं चरइ तथा णं तं चैव राइंदियप्पमाणं तंसि च णं दिवसंसि सड्ढिं जोयण-सहस्साइं तावक्खेत्ते पन्नत्ते० तत्थ णं जेते एवमाहंसुता चत्तारि-चत्तारि जोयणसहस्साइं सूरिए एगमेगेणं मुहुत्तेणं गच्छइ ते एवमाहंसु-ता जया णं सूरिएसव्वब्भंतरं मंडलं उवसंकमित्ता चारं चरति तथा णं दिवसराइं तहेव तंसि च णं दिवसंसि बावत्तरिं जोयणसहस्साइं तावक्खेत्ते पन्नत्ते ता जया णं सूरिए सव्वबाहिरं मंडलं उवसंकमित्ता चारं चरति तथा णं राइंदियं तहेव तंसि च णं दिवसंसिअडतालीसंजोय-णसहस्साइं तावक्खेत्ते पन्नत्ते [तया णं चत्तारि-चत्तारि जोयणसहस्साइं सूरिए एगमेगेणं मुहुत्तेणं गच्छति] तत्थ जेते एवमाहंसु-ता छविपंचविचत्तारिवि-जोयणसहस्साइं सूरिए एगमेगेणं मुहुत्तेणं गच्छति ते एवमाहंसु-ता सूरिए णं उग्गमणमुहुत्तंसि अत्थमण-मुहुत्तंसि य सिग्घगती भवति तथा णं छ-छ जोयणसहस्साइं एगमेगेणं मुहुत्तेणं गच्छति मज्झिमतावक्खेत्तं समासादेमाणे-समासादेमाणे सूरिए मज्झिमगती भवति तथा णं पंच-पंच जोयणसहस्साइं एगमेगेणं मुहुत्तेणं

पाहुडं-२, पाहुडपाहुडं-३

गच्छति मज्झिमं तावक्खेत्तं संपत्ते सूरिए मंदगती भवति तथा णं चत्तारि चत्तारि जोयणसहस्साइं एगमेगेणं मुहुत्तेणं गच्छति तत्थ को हेतूति वएज्जा ता अयण्णं जंबुद्धीवे दीवे सव्वदीवसमुद्धानं सव्वब्भंतराए जाव परिक्खेवेणं ता जया णं सूरिए सव्वब्भंतरं मंडलं उवसंकमित्ता चारं चरति तथा णं दिवसराइं तहेव तंसि च णं दिवसंसि एककाणउत्तिं जोयणसहस्साइं तावक्खेत्ते पन्नत्ते ता जया णं सूरिए सव्वबाहिरं मंडलं उवसंकमित्ता चटारं चरति तथा णं राइंदियं तहेव तस्सिं च णं दिवसंसि एगद्विजोयणसहस्साइं तावक्खेत्ते पन्नत्ते तथा णंछवि पंचवि चत्तारिवि जोयणसहस्साइं सूरिए एगमेगेणं मुहुत्तेणं गच्छति-वयं पुण एवं वयामो-ता सातिरेगाइं पंच-पंचजोयणसहस्सिं सूरिए एगमेगेणं मुहुत्तेणं गच्छति तत्थ को हेतूति वएज्जा ता अयण्णं जंबुद्धीवे दीवे सव्वदीवसमुददणं सव्वब्भंतराए जाव परिक्खेवेणं ता जया णं सूरिए सव्वब्भंतरं मंडलं उवसंकमित्ता चारं चरति तथा णं पंच-पंच जोयणसहस्साइं दोण्णि य एककावण्णे जोयणसए एगूणतीसं च सड्ढिभागे जोयणस्स एगमेगेणं मुहुत्तेणं गच्छति तथा णं इहगतस्स मणुस्सस्स सीतालीसाए जोयणसहस्सेहिं दोहि य तेवड्ढेहिं जोयणसएहिं एगवीसाए य सड्ढिभागेहिं जोणस्स सूरिए चक्खुप्फासं हव्वमागच्छइ तथा णं दिवसे राइं तहेव ।

से निक्खममाणे सूरिए नवं संवच्छरं अयमाणे पढमंसि अहोरत्तंसि अब्भंतराणंतरं मंडलं उवसंकमित्ता चारं चरति ता जया णं सूरिए अब्भंतराणंतरं मंडलं उवसंकमित्ता चारं चरति तथा णं पंच-पंच जोयणसहस्साइं दोण्णि य एककावण्णे जोयणसए सीतालीसं च सड्ढिभागे जोयणस्स एगमेगेणं मुहुत्तेणं गच्छति तथा णं इहगतस्स मणुसस्स सीतालीसाए जोयणसहस्सेहिं अउणासीते य जोयणसए सत्तावण्णाए सड्ढिभागेहिं जोयणस्स सड्ढिभागं च एगद्विहा छेत्ता अउणावीसाए चुण्णियाभागेहिं सूरिएचक्खुप्फासं हव्वमागच्छति तथा णं दिवसराइं तहेव से निक्खममाणे सूरिए दोच्चंसि अहोरत्तंसि अब्भंतरतच्चं मंडलं उवसंकमित्ता चारं चरति जोयणसहस्साइं दोण्णि य बावण्णे जोयणसए पंच य सड्ढिभागे जोयणस्स एगमेगेणं मुहुत्तेणं गच्छति तथा णं इहगतस्स मणुसस्स सीतालीसाए जोयणसहस्सेहिं छण्णउतीए य जोयणेहिं तेत्तीसाए य सड्ढिभागेहिं जोयणस्स सड्ढिभागं च एगद्विहा छेत्ता दोहिं चुण्णियाभागेहिं सूरिए चक्खुप्फासं हव्वमागच्छति तथा णं दिवसराइं तहेव एवं खलु एतेणं उवाएणं निक्खममाणे सूरिए तयाणंतराओ तयाणंतरं मंडलाओ मंडलं संकममाणे संकममाणे अट्टारस-अट्टारस सड्ढिभागे जोयणस्स एगमेगे मंडले मुहुत्तगतिं अभिवुड्ढमाणे-अभिवुड्ढेमाणे चुलसीतिं सीताइं जोयणाइं

पुरिसच्छायं निवुड्डेमाणे-निवुड्डेमाणे सव्वबाहिरं मंडलं उवसंकमित्ता चारं चरति ता जया णं सूरिए सव्वबाहिरं मंडलं उवसंकमित्ता चारं चरति तया णं पंच-पंच जोयणसहस्साइं तिण्णिम य पंचुत्तरे जोयणसते पन्नरस य सद्धिभागे जोय-णस्स एगमेगेणं मुहुत्तेणं गच्छति तया णं इहगतस्स मणूसस्स एककतीसाए जोयणसहस्सेहिं अद्धहिं एककतीसेहिं जोयणसतेहिं तीसाए य सद्धिभागेहिं जोयणस्स सूरिए चक्खुप्फासं हव्वमागच्छति तया णं उत्तमकट्टपत्ता उक्कोसिया अट्टारसमुहुत्ता राती भवति जहण्णाए दुवालसमुहुत्ते दिवसे भवइ एस णं पढमे छम्मासे एस णं पढमस्स छम्मासस्स पज्जवसाणे, से पविसमाणे सूरिए दोच्चं छम्मासं अयमाणे पढमंसि अहोरत्तंसि बाहिराणंतरं मंडलं उवसंकमित्ता चारं चरति ता जया णं सूरिए बाहिराणंतरं मंडलं उवसंकमित्ता चारं चरति तया णं पंच-पंच जोयणसहस्साइं तिण्णि य चउरुत्तरे जोयणसते सत्तावण्णं च सद्धिभाए जोयणस्स एगमेगेणं मुहुत्तेणं गच्छइ तया णं इहगतस्स मणूसस्स एककतीसाए जोयणसहस्सेहिं नवहि य सोलेहिं जोयणसतेहिं एगूणतालीसाए सद्धिभागेहिं जोयणस्स सद्धिभागं च एगद्धिहा छेत्ता सद्धिए पाहुडं-२, पाहुडपाहुडं-३

चुण्णियाभागे सूरिए चक्खुप्फासं हव्वमागच्छति तया णं राइंदियं तहेव से पविसमाणे सूरिए दोच्चंसि अहोरत्तंसि बाहिरतच्चं मंडलं उवसंकमित्ता चारं चरति ता जया णं सूरिए बाहिरतच्चं मंडलं उवसंकमित्ता चारं चरति तया णं पंच-पंच जोयणसहस्साइं तिण्णि य चउत्तरे जोयणसए ऊतालीसं च सद्धिभागे जोयणस्स एगमेगेणं मुहुत्तेणं गच्छति तया णं इहगतस्स मणूसस्स एगाहिगेहिं बत्तीसाए जोयणसहस्सेहिं एगूणपण्णाए य सद्धिभागेहिं जोयणस्स सद्धिभागं च एगद्धिहा छेत्ता तेवीसाए चुण्णियाभागेहिं सूरिए चक्खुप्फासं हव्वमागच्छंति राइंदियं तहेव एवं खलु एतेणुवाएणं पविसमाणे सूरिए तयाणंतराओ तयाणंतरं मंडला मंडलं संकममाणे-संकममाणे अट्टारस-अट्टारस सद्धिभागे जोयणस्स एगमेगे मंडले मुहुत्तगतिं निवुड्डेमाणे-निवुड्डेमाणे सव्वब्भंतरे मंडलं उवसंकमित्ता चारं चरति ता जया णं सूरिए सव्वब्भंतरं मंडलं उवसंकमित्ता चारं चरति तया णं पंच-पंच जोयणसहस्साइं दोण्णि य एककावण्णे जोयणसए अउणतीसं च सद्धिभागे जोयणस्स एगमेगेणं मुहुत्तेणं गच्छति तया णं इहगतस्स मणूसस्स सीतालीसाए जोयणसहस्सेहिं दोहि य तेवद्धेहिं जोयणसतेहिं एककवीसाए य सद्धिभागेहिं जोयणस्स सूरिए चक्खुप्फासं हव्वमागच्छति तया णं उत्तमकट्टपत्ते उक्कोसए अट्टारसमुहुत्ते दिवसे भवइ जहण्णिया दुवालसमुहुत्ता राती भवति एस णं दोच्चे छम्मासे एस णं दोच्चस्स छम्मासस्स पज्जवसाणे एस णं आदिच्चे संवच्छरे एस णं आदिच्चस्स संवच्छरस्स पज्जवसाणे ।

◦ मुनि दीपरत्नसागरेण संशोधितः सम्पादित्तश्च दोच्चं पाहुडं समत्तं ◦

□ तच्चं पाहुडं □

[३८] ता केवतियं खेत्तं चंदिमसूरिया ओभासंति उज्जोवेंति तवेंति पगासंति आहिताति वएज्जा तत्थ खलु इमाओ वारस पडिवत्तीओ पन्नत्ताओ तत्थेगे एवमाहंसु-ता एगं दीवं एगं समुद्धं चंदिमसूरिया ओभासंति जाव पगासंति एगे पुम एवमाहंसुता तिण्णि दीवे तिण्णि समुद्धे चंदिमसूरिया ओभासंति जाव पगासंति-एगे पुण एवमाहंसु-ता अद्धुद्धे दीवे अद्धुद्धे समुद्धे चंदिमसूरिया ओभासंति जाव पगासंति-एगे पुण एवमाहंसु-ता सत्त दीवे सत्त समुद्धे चंदिमसूरिया ओभासंति जाव पगासंति-एगे पुण एवमाहंसु-ता दस दीवे दस समुद्धे चंदिमसूरिया ओभासंति जाव पगासंति-एगे पुण एवमाहंसु-ता बारस दीवे

बारस समुद्रे चंदिमसूरिया ओभासंति जाव पगासंति-एगे पुण एवमाहंसु-ता बायालीसं दीवे बायालीसं समुद्रे चंदिमसूरिया ओभासंति जाव पगासंति-एगे पुण एवमाहंसु-ता बावत्तरिं दीवे बावत्तरिं समुद्रे चंदिमसूरिया ओभासंति जाव पगासंति-एगे पुण एवमाहंसु-ता बायालीसं दीवसतं बायालं समुद्वसतं चंदिमसूरिया ओभासंति जाव पगासंति-एगे पुण एवमाहंसु-ता बावत्तरिं दीवसतं बावत्तरिं समुद्वसतं चंदिमसूरिया ओभासंति जाव पगासंति-एगे पुण एवमाहंसु-ता बायालीसं दीवसहस्सं बायालं समुद्वसहस्सं चंदिमसूरिया ओभासंति जाव पगासंति-एगे पुण एवमाहंसु-ता बावत्तरिं दीवसहस्सं बावत्तरिं समुद्वसहस्सं चंदिमसूरिया ओभासंति जाव पगासंति-वयं पुण एवं वयामो-ता अयण्णं जंबुद्वीवे दीवे सव्वदीवसमुद्वाणं सव्वब्भंतराए जाव परिक्खेवेणं पन्नत्ते से णं एगाए जगतीए सव्वओ समंता संपरिक्खित्ते सा णं जगती तहेव जहा जंबुद्वीवपन्नत्तीए जाव एवमामेव सपुव्वावरेणं जंबुद्वीवे दीवे चोद्धससलिलासयसहस्सा छप्पन्नं च सलिलासहस्सा भवतीति मक्खाता जंबुद्वीवे णं दीवे पंचक्कभागसंठिते आहितेति वएज्जा ता कहं जंबुद्वीवे दीवे पंचक्कभागसंठिते आहितेति वएज्जा ता जया णं एते दुवे सूरिया सव्वब्भंतरं मंडलं उवसंकमित्ता पाहुडं-३

चारं चरंति तया णं जंबुद्वीवस्स तिण्णि पंचक्कभागे ओभासंति उज्जोवेति तवेति पगासंति तं जहा- एगेवि एगं दिवड्ढं पंचक्कभागं ओभासति जाव पगासंति एगेवि एगं दिवड्ढं पंचक्कभागं ओभासति जाव पगासंति तया णं उत्तमकट्टपत्ते उक्कोसए अद्वारसमुहुत्ते दिवसे भवइ जहणिया दुवालसमुहुत्ता राती भवति ता जया णं एते दुवे सूरिया सव्वबाहिरं मंडलं उवसंकमित्ता चारं चरंति तया णं जंबुद्वीवस्स दीवस्स दोण्णि चक्कभागे ओभासंति उज्जोवेति तवेति पगासंति तं जहा- एगेवि सूरिए एगं पंचक्कवालभागं ओभासति जाव पगासंति एगेवि एगं पंचक्कवालभागं ओभासति जाव पगासंति तया णं उत्तमकट्टपत्ता उक्कोसिया अद्वारसमुहुत्ता राती भवति जहणिए दुवालसमुहुत्ते दिवसे भवइ ।

• मुनि दीपरत्नसागरेण संशोधितः सम्पादित्तश्च तच्चं पाहुडं समत्तं •

□ चउत्थं पाहुडं □

[३९] ता कहं ते सेयताए संठिती आहिताति वएज्जा तत्थ खलु इमा दुविधा संठिती पन्नत्ता तं जहा- चंदिमसूरियसंठिती य तावक्खेत्तसंठिती य ता कहं ते चंदिमसूरियसंठिती आहिताति वएज्जा तत्थ खलु इमाओ सोलस पडिवत्तीओ पन्नत्ताओ तत्थेगे एवमाहंसु-ता समचउरससंठिता चंदिम-सूरियसंठिती पन्नत्ता-एगे पुण एवमाहंसु-ता विसमचउरससंठिता चंदिमसूरियसंठिती पन्नत्ता-एवं समच-उक्कोणसंठिता विसमचउक्कोणसंठिता समचक्कवालसंठिता विसमचक्कवालसंठिता चक्कद्धचक्कवालसंठिता चंदिमसूरियसंठिती पन्नत्ता-एगे पुण एवमाहंसु-ता छत्तागारसंठिता चंदिमसूरियसंठिती पन्नत्ता-एवं गेह-संठिता गेहावणसंठिता पासादसंठिता गोपुरसंठिता पेच्छाघरसंठिता वलभीसंठिता हम्मियतलसंठिता एगे पुण एवमाहंसुता वालग्गपोतियासंठिता चंदिमसूरियसंठिती पन्नत्ता-तत्थ जेते एवमाहंसु-ता समचउरसंठिता चंदिमसूरियसंठिती पन्नत्ता एतेणं नएणं नेयव्वं नो चव णं इतरेहिं, ता कहं ते तावक्खेत्तसंठिती आहिताति वएज्जा तत्थ खलु इमाओ सोलस पडिवत्तीओ पन्नत्ताओ तत्थेगे एवमाहंसु-ता गेहसंठिता तावक्खेत्तसंठिती पन्नत्ता एवं जाव वालग्गपोतियासंठिता तावक्खेत्त-संठिती पन्नत्ता-एगे पुणए वमाहंसु-ता जस्संठिते जंबुद्वीवे दीवे तस्संठिता तावक्खे-त्तसंठिती पन्नत्ता-एगे पुण एवमाहंसु-ता जस्संठिते भारहे वासे तस्संठिता तावक्खे-त्तसंठिती पन्नत्ता-एवं उज्जाणसंठिता निज्जाणसंठिता एगतो निसहसंठिता दुहतो

निसहसंठिता सेयणगसंठिता-एगे पुण एवमाहंसु-ता सेणगपट्टसंठिता तावक्खेत्तसंठिती पन्नत्ता-एगे एवमाहंसु वयं पुण एवं वदामो-ता उड्ढीमुहकलंबुयापुप्फसंठिता तावक्खेत्तसंठिती पन्नत्ता-अंतो संकुया बाहिं वित्थडा अंतो वट्टा बाहिं पिहुला अंतो अंकमुहसंठिता बाहिं सत्थीमुहसंठिता उभओ पासेणं तीसे दुवे बाहाओ अणवट्टियाओ भवंति पणयालीसंपणयालीसं जोयणसहस्साइं आयामेणं दुवे य णं तीसे बाहाओ अणवट्टियाओ भवंति तं जहा- सव्वब्भंतरिया चेव बाहा सव्वबाहिरिया चेव बाहा तत्थ को हेतूति वेज्जा ता अयण्णं जंबुद्धीवे दीवे सव्वदीवसमुद्धानं सव्वब्भंतराए जाव परिक्खेवेणं ता जया णं सूरिए सव्वब्भंतरं मंडलं उवसंकमित्ता चारं चरइ तथा णं उड्ढीमुहकलंबुयापुप्फसंठिता तावक्खेत्तसंठिती आहिताति वएज्जा अंतो संकुया बाहिं वित्थडा अंतो वट्टा बाहिं पिहुला अंतो अंकमुहसंठिया बाहिं सत्थीमुहसंठिता उभओ पासेणं तीसे तहेव जाव सव्वबाहिरिया चेव बाहा तीसे णं सव्वब्भंतरिया बाहा मंदरपव्वयंतेणं नव जोयणसहस्साइं चत्तारि य छलसीए जोयमसए नव य दसभागे जोयणस्स परिक्खेवेणं आहिताति वएज्जा ता से णं परिक्खेवविसेसे कतो आहितेति वएज्जा ता जे णं मंदरस्स पव्वयस्स परिक्खेवे तं परिक्खेवं तिहिं गुणेत्ता दसहिं

छेत्ता

पाहुडं-४

दसहिं भागे हीरमाणे एस णं परिक्खेवविसेसे आहितेति वएज्जा तीसे णं सव्वबाहिरिया बाहा लवण-समुद्धंतेणं चउणउतिं जोयणसहस्साइं अट्ट य अट्टसट्टे जोयणसए चत्तारि य दसभागे जोयणसस्स परिक्खेवेणं आहिताति वएज्जा ता से णं परिक्खेवविसेसे कतो आहितेति वएज्जा ता जे णं जंबुद्धीवस्स दीवस्स परिक्खेवे तं परिक्खेवं तिहिं गुणेत्ता दसहिं छेत्ता दसहिं भागे हीरमाणे एस णं परिक्खेवविसेसे आहितेति वएज्जा ता से णं तावक्खेत्ते केवतियं आयामेणं आहितेति वएज्जा ता अट्टत्तरिं जोयणसहस्साइं तिण्णि य तेत्तीसे जोयणसए जोयणतिभागे य आयामेणं हितेति वएज्जा तथा णं किसंठिया अंधयारसंठिती आहिताति वएज्जा ता उड्ढीमुहकलंबुयापुप्फसंठिता तहेव जाव बाहिरीया उड्ढीमुहकलंबुयापुप्फसंठिता आहिताति वएज्जा अंतो संकुया बाहिं वित्थडा तं चेव जाव दुवे य णं तीसे बाहाओ अणवट्टियओ भवंति तं जहा- सव्वब्भंतरिया चेव बाहा सव्व बाहिरिया चेव बाहा तीसे णं सव्वब्भंतरिया बाहा मंदरपव्वयंतेणं छज्जोयणसहस्साइं तिण्णि य चउवीसे जोयणसए छच्च दसभागे जोयणस्स परिक्खेवेणं आहितेति वएज्जा ती से णं परिक्खेवविसेसे कतो आहितेति वएज्जा ता जे णं मंदरस्स पव्वयस्स परिक्खेवे, तं परिक्खेवं दोहिं गुणेत्ता जाव तीसे णं सव्वबाहिरिया बाहा लवणसमुद्धंतेणं तेवट्टी जोयणसहस्साइं दोण्णि य पणयाले जोयणसए छच्च दसभागे जोयणस्स परिक्खेवेणं आहितेति वएज्जाता जे णं जंबुद्धीवस्स दीवस्स परिक्खेवे तं परिक्खेवं दोहिं गुणेत्ता सेसं तं चेव ता सेणं अंधयारे केवतियं आयामेणं आहितेति वेज्जा ता अट्टत्तरिं जोयणसहस्साइं तिण्णि य तेत्तीसे जोयणसए जोयणतिभागं च आयामेणं आहितेतिवएज्जा तथा णं उत्तम-कट्टपत्ते अट्टारसमुहुत्ते दिवसे भवइ जहण्णिया दुवालसमुहुत्ता राती भवति ता जया णं सूरिए सव्वबाहिरं मंडलं उवसंकमित्ता चारं चरति तथा णं किसंठिता तावक्खेत्तसंठिती आहिताति वएज्जा ता उड्ढीमुहक-लंबुयापुप्फसंठिता तावक्खेत्तसंठिती आहिताति वएज्जा एवं जं अब्भित्तरमंडले अंधयारसंठितीए पमाणं तं बाहिरमंडले तावक्खेत्तसंठितीए जं तहिं तावक्खेत्तसंठितीए तं बाहिरमंडले अंधयार संठितीए भाणियव्वं जाव तथा णं उत्तमकट्टपत्ता उक्कोसिया अट्टारसमुहुत्ता राती भवति जहण्णए दुवालसमुहुत्ते दिवसे भवइ ता जंबुद्धीवे णं दीवे सूरिया

एगं जोयणसयं उड्ढं तवयंति अद्वारस जोयणसयाइं अहे तवयंति सीयालीसं जोयणसहस्साइं दुण्णि य तेवढे जोयणसए एगवीसं च सद्धिभागे जोयणस्स तिरियं तवयंति ।

• मुनि दीपरत्नसागरेण संशोधितः सम्पादित्तश्च चउत्थं पाहुडं समत्तं •

□ पंचमं पाहुडं □

[४०] ता कस्सि णं सूरियस्स लेस्सा पडिहया आहिताति वएज्जा तत्थ खलु इमाओ वीसं पडिवत्तीओ पन्नत्ताओ तत्थेगे एवमाहंसु-ता मंदरंसि णं पव्वतंसि सूरियस्स लेस्सा पडिहया आहिताति वएज्जा-एगे पुवएण एवमाहंसु-ता मेरुं सि णं पव्वतंसि सूरियस्स लेस्सा पडिहया आहिताति वएज्जा-एवं एएणं अभिलावेणं भाणियव्वं-ता मणोरमंसि णं पव्वतंसि ता सुदंसणंसि णं पव्वतंसि ता सयंपभंसि णं पव्वतंसि ता गिरिरायंसि णं पव्वतंसि ता रयणुच्चयंसि णं पव्वतंसि ता सिलुच्चयंसि णं पव्वतंसि लोयमज्झंसि णं पव्वतंसि ता लोयणाभिसि णं पव्वतंसि ता अच्छंसि णं पव्वतंसि ता सूरियावत्तंसि णं पव्वतंसि सूरियावरणंसि णं पव्वतंसि ता उत्तमंसि णं पव्वतंसि ता दिसादिसि णं पव्वतंसि ता अवतंसंसि णं पव्वतंसि ता धरणिखीलंसि णं पव्वतंसि ता धरणिसिगंसि णं पव्वतंसि ता पव्वतिदंसि णं पव्वतंसि ता पव्वयरायंसि णं पव्वतंसि सूरियस्स लेस्सा पडिहया आहिताति वएज्जा-वयं पुण एवं वदामो-ता मंदरेवि पाहुडं-५

पवुच्चइ जाव पव्वयरायावि पवुच्चइ ता जे णं पोग्गला सूरियस्स लेस्सं फुसंति ते णं पोग्गला सूरियस्स लेस्सं पडिहणंति अदिद्वावि णं पोग्गला सूरियस्स लेस्सं पडिहणंति चरिमलेस्संतरगतावि णं पोग्गला सूरियस्स लेस्सं पडिहणंति ।

• मुनि दीपरत्नसागरेण संशोधितः सम्पादित्तश्च पंचमं पाहुडं समत्तं •

□ छडं पाहुडं □

[४१] ता कहं ते ओयसंठिती आहिताति वएज्जा तत्थ खलु इमाओ पणवीसं पडिवत्तीओ पन्नत्ताओ तत्थेगे एवमाहंसु-ता अणुसमयमेव सूरियस्स ओया अण्णा उप्पज्जइ अण्णा वेअति-एगे पुण एवमाहंसु-ता अनुमुहुत्तमेव सूरियस्स ओया अण्णा उप्पज्जइ अण्णा वेअति-एवं एतेणं अभिलावेणं नेतव्वा-ता अनुराइंदियमेव ता अनुपक्खमेव ता अनुमासमेव ता अनुउडुमेव ता अनुअयणमेव ता अनुसंवच्छरमेव ता अनुजुगमेव ता अनुवाससयमेव ता अनुवाससहस्समेव ता अनुवाससयसहस्समेव ता अनुपुव्वमेव अनु-पुव्वसयमेव ता अनुपुव्वसहस्समेव ता अनुपुव्वसयसहस्समेव ता अनुपलिओवमेव ता अनुपलिओवमसयमेव ता अनुपलिओवमसहस्समेव ता अनुपलिओवमसयसहस्समेव ता अनुसागरोवममेव ता अनुसागरोवमसयमेव ता अनुसागरोवमसहस्समेव ता अनुसागरोवमसयसहस्समेव एगे पुण एवमाहंसु-ता अनुओसप्पिणिउस्स-प्पिणिमेव सूरियस्स ओया अण्णा उप्पज्जइ अण्णा वेअति-एगे एवमाहंसु वयं पुण एवं वदामो-ता तीसं-तीसं मुहुत्ते सूरियस्स ओया अवद्धिता भवइ तेणं परं सूरियस्स ओया अणवद्धिता भवइ छम्मासे सूरिए ओयं निवुड्ढे छम्मासे सूरिए ओयं अभिवुड्ढेइ निक्खममाणे सूरिए देसं निवुड्ढेइ पविसमाणे सूरिए देसं अभिवुड्ढेइ तत्थ को हेतूति वदेज्जा ता अयणं जंबुद्धीवे दीवे सव्वदीवसमुद्धानं सव्वब्बंतराए जाव परिक्खेवेणं ता जया णं सूरिए सव्वब्भंतरं मंडलं उवसंकमित्ता चारं चरइ तथा णं उत्तमकडुपत्ते उक्कोसए अद्वारसमुहुत्ते दिवसे भवइ जहण्णिया दुवालसमुहुत्ता राती भवति से निक्खममाणे सूरिए नवं

संवच्छरं अयमाणे पढमंसि अहोरत्तंसि अब्भितराणंतरं मंडलं उवसंकमिक्ता चारं चरइ ता जया णं सूरिए अब्भित-राणंतरं मंडलं उवसंकमिक्ता चारं चरइ तथा णं एगेणं राइंदिएणं एगं भागं ओयाए दिवसखेत्तस्स निवुड्ढित्ता रयणिखेत्तस्स अब्भिवड्ढित्ता चारं चरइ मंडलं अट्टारसहिं तीसेहिं सएहिं छेत्ता तथा णं अट्टार-समुहुत्ते दिवसे भवइ दोहिं एगड्ढिभागमुहुत्तेहिं ऊणे दुवालसमुहुत्ता राती भवति दोहिं एगड्ढिभागमुहुत्तेहिं अहिया से निक्खममाणे सूरिए दोच्चंसि अहोरत्तंसि अब्भितरं तच्चं मंडलं उवसंकमिक्ता चारं चरइ ता जया णं सूरिए अब्भितरं तच्च मंडलं उवसंकमिक्ता चारं चरइ तथा णं दोहिं राइंदिएहिं दो भागे ओयाए दिवसखेत्तस्स निवुड्ढित्ता रयणिखेत्तस्स अब्भिवड्ढेत्ता चारं चरइ मंडलं अट्टारसहिं तीसएहिं सेहिं छेत्ता तथा णं अट्टार-समुहुत्ते दिवसे भवइ चउहिं एगड्ढिभागमुहुत्तेहिं ऊणे दुवालसमुहुत्ता राती भवति छउहिं एगड्ढिभागमुहुत्तेहिं अहिया एवं खलु एतेणुवाएणं निक्खममाणे सूरिए तयाणंतराओ तयाणंतरं मंडलाओ मंडलं संकममाणे-संकममाणे एगमेगे मंडले एगमेगेणं राइंदिएणं एगमेगं भागं ओयाए दिवसखेत्तस्स निवुड्ढेमाणे-निवुड्ढेमाणे रयणिखेत्तस्स अब्भिवड्ढेमाणे-अब्भिवड्ढेमाणे सव्वबा-हिरं मंडलं उवसंकमिक्ता चारं चरइ ता जया णं सूरिए सव्वब्भंतराओ मंडलाओ सव्वबाहिरं मंडलं उवसंकमिक्ता चारं चरइ तथा णं सव्वब्भंतरं मंडलं पणिधाय एगेणं तेसीतेणं राइंदियसतेणं एगं तेसीतं भागसतं ओयाए दिवसखेत्तस्स निवुड्ढेत्ता रयणइखेत्तस्स अब्भिवड्ढेत्ता चारं चरइ मंडलं अट्टारसहिं तीसेहिं सएहिं छेत्ता तथा णं उत्तमकड्डपत्ता उक्कोसिया अट्टार-पाहुडं-६

समुहुत्ता राती भवति जहण्णए दुवालसमुहुत्ते दिवसे भवइ एस णं पढमे छम्मासे एस णं पढमस्स छम्मसस्स पज्जवसाणे से पविसमाणे सूरिए दोच्चं छम्मासं अयमाणे पढमंसि अहोरत्तंसि बाहिराणंतरं मंडलं उवसंकमिक्ता चारं चरइ ता जया णं सूरिए बाहिराणंतरं मंडलं उवसंकमिक्ता चारं चरइ तथा णं एगेणं राइंदिएणं एगं भागं ओयाए रयणिकखेत्तस्स निवुड्ढेत्ता दिवसखेत्तस्स अब्भिवड्ढेत्ता चारं चरइ मंडलं अट्टारसहिं तीसेहिं सएहिं छेत्ता तथा णं अट्टारसमुहुत्ता राती भवति दोहिं एगड्ढिभागमुहुत्तेहिं ऊणा दुवाल-समुहुत्ते दिवसे भवइ दोहिं एगड्ढिभागमुहुत्तेहिं अहिए से पविसमाणे सूरिए दोच्चंसि अहोरत्तंसि बाहिरं तच्चं मंडलं उवसंकमिक्ता चारं चरइ ता जया णं सूरिए बाहिरं तच्चं मंडलं उवसंकमिक्ता चारं चरइ तथा णं दोहिं राइंदिएहिं दो भाए ओयाए रयणिखेत्तस्स निवुड्ढेत्ता दिवसखेत्तस्स अब्भिवड्ढेत्ता चारं चरइ मंडलं अट्टार-रसहिं तीसेहिं सएहिं छेत्ता तथा णं अट्टारसमुहुत्ता राती भवति चउहिं एगड्ढिभागमुहुत्तेहिं ऊणा दुवाला-समुहुत्ते दिवसे भवइ चउहिं एगड्ढिभागमुहुत्तेहिं अहिए एवं खलु एतेणुवाएणं पविसमाणे सूरिए तयाणंतराए तयाणंतरं मंडलाओ जाव ओयाए रयणिखेत्तस्स निवुड्ढेमाणे-निवुड्ढेमाणे दिवसखेत्तस्स अब्भिवड्ढेमाणे-अब्भिवड्ढेमाणे सव्वब्भंतरं मंडलं उवसंकमिक्ता चारं चरइ ता जया णं सूरिए सव्वबाहिराओ मंडलाओ सव्वब्भंतरं मंडलं उवसंकमिक्ता चारं चरइ तथा णं सव्वबाहिरं मंडलं पणिधायं एगेणं तेसीतेणं राइंदियसतेणं एगं तेसीतं भागसतं ओयाए रयणिखेत्तस्स निवुड्ढेत्ता दिवसखेत्तस्स अब्भिवड्ढेत्ता चारं चरइ मंडलं अट्टारसहिं तीसेहिं सएहिं छेत्ता तथा णं उत्तमकड्डपत्ते उक्कोसए अट्टारसमुहुत्ते दिवसे भवइ जहण्णिणया दुवालसमुहुत्ता राती भवति एस णं दोच्चे छम्मासे एस णं दोच्चस्स छम्मासस्स पज्जवसाणे एस णं आदिच्चे संवच्छरे एस णं आदिच्चस्स सेवच्छरस्स पज्जवसाणे ।

• मुनि दीपरत्नसागरेण संशोधितः सम्पादित्तश्च छड्डमं पाहुडं समत्तं •

□ सत्तमं पाहुडं □

[४२] ता के ते सूरियं वरयति आहिताति वएज्जा तत्थ खलु इमाओ वीसं पडिवत्तीओ पन्नत्ताओ तत्थेगे एवमाहंसु-ता मंदरे णं पव्वए सूरियं वरयति आहितेति वएज्जा-एगे पुण एवमाहंसुता मेरु णं पव्वए सूरियं वरयति आहितेति वएज्जा-एवं एएणं अभिलावेणं नेयव्वं जाव पव्वयराए णं पव्वए सूरियं वरयति आहितेति वएज्जा-वयं पुणं एवं वदामो-ता मंदिरेवि पवुच्चइ तहेव जाव पव्वयराएवि पवुच्चइ ता जे णं पोग्गला सूरियस्स लेसं फुसंति ते णं पोग्गला सूरियं वरयंति अदिट्ठावि णं पोग्गला सूरियं वरयंति चरमलेसंतरगतावि णं पोग्गला सूरियं वरयंति ।

◦ मुनि दीपरत्नसागरेण संशोधितः सम्पादित्तश्च सत्तमं पाहुडं समत्तं ◦

□ अट्ठमं पाहुडं □

[४३] ता कहं ते उदयसंठिती आहितेति वएज्जा तत्थ खलु इमाओ तिण्णि पडिवत्तीओ पण्णत्ताओ तत्थेगे एवमाहंसु-ता जया णं जंबुद्धीवे दीवे दाहिणइडे अट्ठारसमुहुत्ते दिवसे भवइ तथा णं उत्तरइडेवि अट्ठारसमुहुत्ते दिवसे भवइ ता जया णं उत्तरइडे अट्ठारसमुहुत्ते दिवसे भवइ तथा णं दाहिणइडेवि अट्ठारसमुहुत्ते दिवसे भवइ ता जया णं जंबुद्धीवे दीवे दाहिणइडे सत्तरसमुहुत्ते दिवसे भवइ तथा णं उत्तरइडेवि सत्तरसमुहुत्ते दिवसे भवइ ता जया णं उत्तरइडे सत्तरसमुहुत्ते दिवसे भवइ तथा णं दाहिणइडेवि

पाहुडं-८

सत्तरसमुहुत्ते दिवसे भवइ एवं परिहावेत्तव्वं-सोलसमुहुत्ते दिवसे पन्नरसमुहुत्ते दिवसे चउद्धसमुहुत्ते दिवसे तेरसमुहुत्ते दिवसे जाव ता जया णं जंबुद्धीवे दीवे दाहिणइडे बारसमुहुत्ते दिवसे भवइ तथा णं उत्तरइडेवि बारसमुहुत्ते दिवसे भवइ ता जया णं उत्तरइडे बारसमुहुत्ते दिवसे भवइ तथा णं दाहिणइडेवि बारसमुहुत्ते दिवसे भवइ ता जया णं दाहिणइडे बारसमुहुत्ते दिवसे भवइ तथा णं जंबुद्धीवे दीवे मंदरस्स पव्वयस्स पुरत्थिमपच्चत्थिमे णं सदा पन्नरसमुहुत्ते दिवसे भवइ सदा पन्नरसमुहुत्ता राती भवति अवट्ठिया णं तत्थ राइंदिया पन्नत्ता समणाउसो एगे एवमाहंसु एगे पुण एवमाहंसु-ता जया णं जंबुद्धीवे दीवे दाहिणइडे अट्ठार-समुहुत्ताणंतरे दिवसे भवइ तथा णं उत्तरइडेवि अट्ठारसमुहुत्ताणंतरे दिवसे भवइ ता जया णं उत्तरइडे अट्ठारसमुहुत्ताणंतरे दिवसे भवइ तथा णं दाहिणइडेवि अट्ठारसमुहुत्ताणंतरे दिवसे भवइ एवं परिहावेत्तव्वं-सत्तरसमुहुत्ताणंतरे दिवसे भवइ सोलसमुहुत्ताणंतरे दिवसे भवइ पन्नरसमुहुत्ताणंतरे दिवसे भवइ चोद्धस-मुहुत्ताणंतरे दिवसे भवइ तेरसमुहुत्ताणंतरे दिवसे भवइ ता जया णं जंबुद्धीवे दीवे दाहिणइडे बारसमुहुत्ताणंतरे दिवसे भवइ तथा णं उत्तरइडेवि बारसमुहुत्ताणंतरे दिवसे भवइ ता जया णं उत्तरइडे बारसमुहुत्ताणंतरे दिवसे भवइ तथा णं दाहिणइडेवि बारसमुहुत्ताणंतरे दिवसे भवइ तथा णं जंबुद्धीवे दीवे मंदरस्स पव्वयस्स पुरत्थिमपच्चत्थिमे णं नो सदा पन्नरसमुहुत्ते दिवसे भवइ नो सदा पन्नरसमुहुत्ता राती भवति अणवट्ठिता णं तत्थ राइंदिया पन्नत्ता समणाउसो एगे पुण एवमाहंसु-ता जया णं जंबुद्धीवे दीवे दाहिणइडे अट्ठार-समुहुत्ते दिवसे भवइ तथा णं उत्तरइडे दुवालसमुहुत्ता राती भवति ता जया णं उत्तरइडे अट्ठारसमुहुत्ते दिवसे भवइ तथा णं दाहिणइडे दुवालसमुहुत्ता राती भवति ता जया णं दाहिणइडे अट्ठारसमुहुत्ताणंतरे दिवसे भवइ तथा णं उत्तरइडे दुवालसमुहुत्ता राती भवति ता जया णं उत्तरइडे अट्ठारसमुहुत्ताणंतरे दिवसे भवइ तथा णं दाहिणइडे दुवालसमुहुत्ता राती भवति एवं नेतव्वं सगवेहिं य

अनंतरेहिं य एककेक्के दो दो आलावगा सव्वेहिं दुवालसमुहुत्ता राती भवति जाव ता जया णं जंबुद्धीवे दीवे दाहिणइडे बारसमुहुत्ताणंतरे दिवसे भवइ तथा णं उत्तरइडे दुवासमुहुत्ता राती भवति ता जया णं उत्तरइडे दुवासमुहुत्ताणंतरे दिवसे भवइ तथा णं दाहिणइडे दुवालसमुहुत्ता राति भवति तथा णं जंबुद्धीवे दीवे मंदरस्स पव्वयस्स पुरत्थिम-पच्चत्थिमेणं नेवत्थि पन्नरसमुहुत्ते दिवसे भवइ नेवत्थि पन्नरसमुहुत्ता राती भवति वोच्छण्णा णं तत्थ राइंदिया पन्नत्ता समणाउसो ।

वयं पुण एवं वदामो-ता जंबुद्धीवे दीवे सूरिया उदीम-पाईणमुग्गच्छ पाईण-दाहिणमागच्छंति पाईण-दाहिणमुग्गच्छ दाहिण-पडीणमगच्छंति दाहिण-पडीणमुग्गच्छ पडीणउदीणागच्छंति पडीण-उदीण-मुग्गच्छ उदीम-पाईण-मागच्छंति ता जया णं जंबुद्धीवे दीवे दाहिणइडे दिवसे भवइ तथा णं उत्तरइडेवि दिवसे भवइ जया णं उत्तरइडे दिवसे भवइ तथा णं जंबुद्धीवे दीवे मंदरस्स पव्वयस्स पुरत्थिमपच्चत्थिमे णं राती भवति ता जया णं जंबुद्धीवे दीवे मंदरस्स पव्वयस्स पुरत्थिमपच्चत्थिमे णं राती भवति ता जया णं जंबुद्धीवे दीवे मंदरस्स पव्वयस्स पुरत्थिमे णं दिवसे भवइ तथा णं पच्चत्थिमे नवि दिवसे भवइ ता जया णं पच्चत्थिमे णं दिवसे भवइ तथा णं जंबुद्धीवे दीवे मंदरस्स पव्वयस्स उत्तरदाहिणे णं राती भवति ता जया णं दाहिणइडे उक्कोसए अट्टारसमुहुत्ते दिवसे भवइ तथा णं उत्तरइडेवि उक्कोसए अट्टारसमुहुत्ते दिवसे भवइ ता जया णं उत्तरइडे उक्कोसए अट्टारसमुहुत्ते दिवसे भवइ तथा णं जंबुद्धीवे दीवे मंदरस्स पव्वयस्स पुरत्थिमपच्चत्थेणं णं जहणिया दुवालसमुहुत्ता राती भवति ता जया णं जंबुद्धीवे दीवे मंदरस्स पव्वयस्स पुरत्थिमे णं उक्कोसए अट्टारसमुहुत्ते दिवसेभवइ तथा णं पच्चत्थिमे नवि उक्कोसए अट्टार-
पाहुडं-८

समुहुत्ते दिवसे भवइ ता जया णं पच्चत्थिमे णं उक्कोसए अट्टारसमुहुत्ते दिवसे भवइ तथा णं जंबुद्धीवे दीवे मंदरस्स पव्वयस्स उत्तरदाहिणे णं जहणिया दुवालसमुहुत्ता राती भवति एवं एणं गमेणं नेत्तव्वंअट्टारसमुहुत्ताणंतरे दिवसे भवइ साइरेगदुवालसमुहुत्ता राती भवति सत्तरसमुहुत्ते दिवसे भवइ तेरसमुहुत्ता राती भवति सत्तरसमुहुत्ताणंतरे दिवसे भवइ साइरेगतेरसमुहुत्ता राती भवति सोलसमुहुत्ते दिवसे भवइ चोद्धसमुहुत्ता राती भवति सोलसमुहुत्ताणंतरे दिवसे भवइ साइरेगचोद्धसमुहुत्ता राती भवति पन्नरसमुहुत्ते दिवसे भवइ पन्नरसमुहुत्ता राती भवति पन्नरसमुहुत्ताणंतरे दिवसे भवइ साइरेगपन्नरसमुहुत्ता राती भवति चउद्धसमुहुत्ते दिवसे भवइ सोलसमुहुत्ता राती भवति चोद्धसमुहुत्ताणंतरे दिवसे भवइ साइरेगसोलसमुहुत्ता राति भवति तेरसमुहुत्ते दिवसे भवइ सत्तरसमुहुत्ता राति भवति तेरसमुहुत्ताणंतरे दिवसे भवइ साइरेगसत्तरसमुहुत्ता राति भवति जहणए दुवालसमुहुत्ते दिवसे भवइ उक्कोसिया अट्टारसमुहुत्ता राति भवति एवं भणितव्वं ता जया णं जंबुद्धीवे दीवे दाहिणइडे वासाणं पढमे समए पडिवज्जति तथा णं उत्तरइडेवि वासाणं पढमे समए पडिवज्जति जया णं उत्तरइडे वासाणं पढमे समए पडिवज्जति तथा णं जंबुद्धीवे दीवे मंदरस्स पव्वयस्स पुरत्थिमपच्चत्थिमे णं अनंतरपुरक्खडे कालसमयंसि वासाणं पढमे समए पडिवज्जति ता जया णं जंबुद्धीवे दीवे मंदरस्सपव्वयस्सपुरत्थिमे णं वासाणं पढमे समए पडिवज्जति तथा णं पच्चत्थिमे नवि वासाणं पढमे समए पडिवज्जति जया णं पच्चत्थिमे णं वासाणं पढमे समए पडिवज्जति तथा णं जंबुद्धीवे दीवे मंदरस्स पव्वतस्स उत्तरदाहिणे णं अनंतरपच्छाकडकालसमयंसि वासाणं पढमे समए पडिवण्णे भवइ जहा समओ एवं आवलिया आणापाणू थोवे लवे मुहुत्ते अहोरत्ते पक्खे मासे उडू एते दस आलावगा जहा वासाणं एवं हेमंताणं गिम्हाणं च

भाणियच्चा ता जया णं जंबुद्वीवे दीवे दाहिणइडे पढमे अयणे पडिवज्जति तथा णं उत्तरइडेवि पढमे अयणे पडिवज्जति ता जया णं उत्तरइडे पढमे अयणे पडिवज्जति तथा णं जंबुद्वीवे दीवे मंदरस्स पव्वयस्स पुरत्थिमपच्चत्थिमे णं अनंतरपुरक्खडे कालसमयंसि पढमे अयणे पडिवज्जति ता जया णं जंबुद्वीवे दीवे मंदरस्स पव्वयस्स पुरत्थिमे णं पढमे अयणे पडिवज्जति तथा णं पच्चत्थिमे नवि पढमे अयणे पडिवज्जति ता जया णं पच्चत्थिमे णं पढमे अयणे पडिवज्जति तथा णं जंबुद्वीवे दीवे मंदरस्स पव्वयस्स उत्तरदाहिणे णं अनंतरपच्छाकडकालसयंसि पढमे अयणे पडिवण्णे भवइ जहा अयणे तहा संवच्छरे जुगे वाससए वाससहस्से वाससयसहस्से पुव्वंगे पुव्वे एवं जाव सीसपहेलिया पलिओवमे सागरोवमे ता जया णं जंबुद्वीवे दीवे दाहिणइडे पढमा ओसप्पिणी पडिवज्जति तथा णं उत्तरइडेवि पढमा ओसप्पिणी पडिवज्जति ता जया णं उत्तरइडे पढमा ओसप्पिणी पडिवज्जति तथा णं जंबुद्वीवे दीवे मंदरस्स पव्वयस्स पुरत्थिमपच्चत्थिमे णं नेवत्थि ओसप्पिणी नेव अत्थि उस्सप्पिणी अवट्ठिते णं तत्थ काले पन्नत्ते सममाउसो एवं उस्सप्पिणीवि ता लवणे णं समुद्धे सूरिया उदीण-पाईणमुग्गच्छ तहेव ता जया णं लवणे समुद्धे दाहिणइडे दिवसे भवइ तथा णं लवणसमुद्धे उत्तरइडेवि दिवसे भवइ ता जया णं उत्तरइडे दिवसे भवइ तथा णं लवणसमुद्धे पुरत्थिमपच्चत्थिमे णं राति भवति जहा जंबुद्वीवे दीवे तहेव जाव उस्सप्पिणी तहा धायइसंडे णं दीवे सूरिया उदीण-पाईणमुग्गच्छ तहेव ता जया धायइसंडे दीवे दाहिणइडे दिवसे भवइ तथा णं उत्तरइडेवि दिवसे भवइ जया णं उत्तरइडे दिवसे भवइ तथा णं धायइसंडे दीवे मंदराणं पव्वयाणं पुरत्थिमपच्चत्थिमे णं राति भवति एवं जंबुद्वीवे दीवे जहा तहेव जाव उस्सप्पिणी कालोए णं जहा लवणे समुद्धे तहेव ता अब्भंतरपुक्खरद्धे णं सूरिया उदीण-पाईण-मुग्गच्छ तहेव ता जया णं अब्भंतरपुक्खरद्धे णं दाहिणइडे दिवसे भवइ तथा णं उत्तरइडेवि दिवसे भवइ ता जया णं उत्तरइडे दिवसे

भवइ तथा णं अब्भंतरपुक्खरद्धे मंदराणं पव्वयाणं पुरत्थिम-पच्चत्थिमे णं राति भवति सेसं जहा जंबुद्वीवे दीवे तहेव जाव ओसप्पिणी-उस्सप्पिणीओ ।

• मुनि दीपरत्नसागरेण संशोधितः सम्पादित्तश्च अड्डमं पाहुडं समत्तं •

□ नवमं पाहुडं □

[४४] ता कतिकडं ते सूरिए पोरिसिच्छायं निव्वत्तेति आहितेति वदेज्जा तत्थखलुइमाओ तिण्णि पडिवत्तीओ पन्नत्ताओ तत्थेगे एवमाहंसु-ता जे णं पोग्गला सूरियस्स लेसं फुसंति ते णं पोग्गला संतप्पंति तेणंपोग्गला संतप्पमाणा तदणंतराइं बाहिराइं पोग्गलाइं संतावेतीति एस णं से समिते तावक्खत्ते-एगे पुण एवमाहंसु-ता जे णं पोग्गला सूरियस्स लेसं फुसंति ते णं पोग्गला नो संतप्पंति ते णं पोग्गला असंतप्पमाणा तदणंतराइं बाहिराइं पोग्गलाइं नो संतावेतीति एस णं से समिते तावक्खत्ते-एगे पुण एवमाहंसु-ता जे णं पोग्गला सूरियस्स लेसं फुसंति ते णं पोग्गला अत्थेगतिया संतप्पंति अत्थेगतिया नो संतप्पंति तत्थ अत्थेगतिया संतप्पमाणा तदणंतराइं बाहिराइं पोग्गलाइं अत्थेगइयाइं संतावेति अत्थेग-इयाइं नो संतावेति एस णं से समिते तावक्खत्ते-वयं पुण एवं वदामो-ता जाओ इमाओ चंदिमसूरियाणं देवाणं विमाणेहितो लेसाओ बहिया अभिणिससढाओ पतावेति एतासि णं लेसाणं अंतरेसु अण्णतरीओ छिण्णलेसाओ संमुच्छंति तए णं ताओ छिण्णलेस्साओ संमुच्छयाओ समाणीओ तदनंतराइं बाहिराइं पोग्गलाइं संतावेतीति एस णं से समिते तावक्खत्ते ।

[४५] ता कतिवद्वे ते सूरिए पोरिसिच्छायं निव्वत्तेति आहितेति वदेज्जा तत्थ खलु इमाओ पणवीसं पडिवत्तीओ पन्नत्ताओ तत्थेगे एवमाहंसु-ता अनुसमयमेव सूरिए पोरिसिच्छायं निव्वत्तेति आहितेति वदेज्जा-एगे पुण एवमाहंसु-ता अनुमुहुत्तमेव सूरिए पोरिसिच्छायं निव्वत्तेति आहितेति वएज्जा एवं एणं अभिलावेणं नेयव्वं ता जाओ चेव ओयसंठितीए पणवीसं पडिवत्तीओ ताओ चेव नेयव्वाओ जाव अणुओ-सप्पिणिउस्सप्पिणिमेव सूरिए पोरिसिच्छायं निव्वत्तेति आहिताति वदेज्जावयं पुण एवं वयामो-ता सूरियस्स णं उच्चत्तं च लेसं च पडुच्च छाउद्वेसे उच्चत्तं च छायां च पडुच्च लेसुद्वेसे लेसं च छयं च पडुच्च उच्चत्तुद्वेसे तत्थ खलु इमाओ दुवे पडिवत्तीओ पन्नत्ताओ-ता अत्थि णं से दिवस जंसि णं दिवसंसि सूरिए चउपो-रिसिच्छायं निव्वत्तेति अत्थि णं से दिवसे जंसि णं दिवसंसि सूरिए दुपोरिसिच्छायं निव्वत्तेति-एगे पुण एवमाहंसु-ता अत्थि णं से दिवसे जंसि णं दिवसंसि सूरिए दुपोरिसिच्छायं निव्वत्तेति अत्थि णं से दिवसे जंसि णं दिवसंसि सूरिए नो किंचि पोरिसिच्छायं निव्वत्तेति तत्थ जेते एवमाहंसु-ता अत्थि णंसे दिवसे जंसि णं दिवसंसि सूरिए चउपोरिसिच्छायं निव्वत्तेति अत्थि णं से दिवसे जंसि णं दिवसंसि सूरिए दुपोरिसिच्छायं निव्वत्तेति ता जया णं सूरिए सव्वभंतरं मंडलं उवसंकमित्ता चारं चरइ तथा णं उत्तम-कडुपत्ते उक्कोसए अद्वारसमुहुत्ते दिवसे भवइ जहणिया दुवालसमुहुत्ता राति भवति तंसि णं दिवसंसि सूरिए चउपोरिसियं छायां निव्वत्तेति तं जहा- उग्गमणमुहुत्तंसि य अत्थणणमुहुत्तंसि य लेसं अभिवड्ढेमाणे नो चेव णं निवुड्ढेमाणे ता जया णं सूरिए सव्वबाहिरं मंडलं उवसंकमित्ता चारं चरइ तथा णं उत्तम-कडुपत्ता उक्कोसिया अद्वारसमुहुत्ता राति भवति जहणए दुवालसमुहुत्ते दिवसे भवइ तंसि णं दिवसंसि सूरिए दुपोरिसियं छायां निव्वत्तेति तं जहा- उग्गमणमुहुत्तंसि य अत्थमणमुहुत्तंसि य लेसं अभिवुड्ढेमाणे नो चेव णं निवुड्ढेमाणे तत्थ णं जेते एवमाहंसु-ता अत्थि णं से दिवसे जंसि णं दिवसंसि सूरिए
दुपोरिसियं
पाहुडं-९

छायं निव्वत्तेति अत्थि णं से दिवसे जंसि णं दिवसंसि सूरिए नो किंचि पोरिसियं छायां निव्वत्तेति ते एवमाहंसु ता जया णं सूरिए सव्वभंतरं मंडलं उवसंकमित्ता चारं चरइ तथा णं उत्तमकडुपत्ते उक्कोसए अद्वारसमुहुत्ते दिवसे भवइ जहणिया दुवालसमुहुत्ता राति भवति तंसि णं दिवसंसि सूरिए दुपोरिसियं छायां निव्वत्तेति तं जहा- उग्गमणमुहुत्तंसि य अत्थमणमुहुत्तंसि य लेसं अभिवड्ढेमाणे नो चेव णं निवुड्ढणमाणे ता जया णंसूरिए सव्वबाहिरं मंडलं उवसंकमित्ता चारं चरइ तथा णं उत्तमकडुपत्ता उक्कोसिया अद्वार-समुहुत्ता राति भवति जहणए दुवालसमुहुत्ते दिवसे भव तंसि णं दिवसंसि सूरिए नो किंचि पोरिसियं छायां निव्वत्तदेइ तं जाउग्गमणमुहुत्तंसि य अत्थमणमुहुत्तंसि य नो चेव णं लेसं अभिवड्ढेमाणे वा निवुड्ढेमाणे वा कतिकडुं ते सूरिए पोरिसिच्छायं निव्वत्तेति आहिताति वएज्जा तत्थ खलु इमाओ छण्णउत्तिं पडिवत्तिओ पन्नत्ता तत्थेगे एवमाहंसु-ताअत्थि णं से देसे जंसि च णं देसंसि सूरिए एगपोरिसियं छायां निव्वत्तेति-एगे पुणं एवमाहंसु-ता अत्थि णं से देसे जंसि णं देसंसि सूरिए दुपोरिसियं छायां निव्वत्तेइ एवं एणं अभिलावेणं नेतव्वं जावछण्णउत्तिं पोरिसिच्छायं निव्वत्तेति तत्थजेते एवमाहंसु-ताअत्थि णं से देसेजंसिणं देसंसि सूरिए एगपोरिसियं छायां निव्वत्तेति ते एवमाहंसु-ता सूरियस्स णं सव्वहेट्ठिमाणो सूरियप्पडिहीओ बहियाअभिणिस्सढाहि लेसाहिं ताडिज्जमाणीहिंइमीसे रयणप्पभाए पुढवीए बहुसमर-मणिज्जाओ भूमिभागाओ जावतियं सूरिए उडुं उच्चत्तेणं एवतियाए एगाए अद्धाए एगेणं छाणुमाणप्प-माणेणं ओमाए एत्थ णं से सूरिए एगपोरिसियं छायां निव्वत्तेति तत्थ जेते एवमाहंसु-ता

अत्थि णं से देसे जंसि णं देसंसि सूरिए दुपोरिसियं छायां निव्वत्तेति ते एवमाहंसु-ता सूरियस्स णं सव्वहेट्ठिमाओ सूरियप्प-डिहीओ बहिया अभिणिस्सिताहिं लेसाहिं ताडिज्जमाणीहिं इमीसे रयणप्पभाए पुढवीए बहुसमरमणिज्जाओ भूमिभागाओ जावतियं सूरिए उड्डं उच्चत्तेणं एवतियाहिं दोहिं अद्धाहिं दोहिं छायाणुमाणप्पमाणेहिं ओमाए एत्थ णं से सूरिए दुपोरिसियं छायां निव्वत्तेति एवं एक्केक्काए पडिवत्तीए नेयव्वं जाव छण्णउत्तिमा पडिवत्ति-वयं पुण एवं वदामो-ता सातिरेग-अउणट्ठिपोरिसीणं सूरिए पोरिसिच्छायं निव्वत्तेति ता अवड्ढपोरिसी णं छाया दिवसस्स किं गते वा सेसे वा ता तिभागे गते वा सेसे वा ता पोरिसी णं छाया दिवसस्स किं गते वा सेसे वा ता चउड्ढभागेगते वा सेसे वा ता दिवड्ढपोरिसी णं छाया दिवसस्स किं गते वा सेसे वा ता पंचमभागे गते वा सेसे वा एवं अद्धपोरिसिं छोदुं-छोदुं पुच्छा दिवसस्स भागं छोदुं-छोदुं वागरणं जाव ता अद्धअउणट्ठिपोरिसीणं छाया दिवसस्स किं गते वा सेसे वा ता एगूणवीससतभागे गते वा सेसे वा ता अउणट्ठिपोरिसीणं छाया दिवसस्स किं गते वा सेसे वा ता बावीससहस्सभागे गते वा सेसे वा ता सातिरेगअउणट्ठिपोरिसी णं छाया दिवसस्स किंगते वा सेसे वा ता नत्थि किंचि गते वा सेसे वा तत्थ खलु इमा पणवीसतिविधा छाया पन्नत्ता तं जहा- खंभच्छया रज्जुच्छया पागारच्छया पासादच्छया उवग्गच्छया उच्चत्तच्छया अनुलोमच्छया पडिलोमच्छया आरुभिता उवहिता समा पडिहत् खीलच्छया पक्खच्छया पुरओदग्गा पिट्ठओउदग्गा पुरमकंठभाओवगता पच्छिमकंठभाओवगता छायाणुवादिणी कंठाणुवादिणी छाया छायाच्छया छायाविकंपे वेहासकडच्छया गोलच्छया तत्थ खलु इमा अट्ठविहा गोलच्छया पन्नत्ता तं जहा- गोलच्छया अवड्ढगोलच्छया गोलगोलच्छया अवड्ढगोलगोलच्छया गोलाव-लिच्छया अवड्ढगोलावलिच्छया गोलपुंजच्छया अवड्ढगोलपुंजच्छया ।

◦ मुनि दीपरत्नसागरेण संशोधितः सम्पादित्तश्च नवमं पाहुडं समत्तं ◦

पाहुडं-१०, पाहुडपाहुडं-१

० दसमं पाहुडं ०

॥ पढमं-पाहुडपाहुडं ॥

[४६] ता जोगेति वत्थुस्स आवलियाणिवाते आहितेति वदेज्जा-कहं० पुच्छा तत्थ खलु इमाओ पंच पडिवत्तीओ पन्नत्ताओ तत्थेगे एवमाहंसु-ता सव्वेसि णं नक्खत्ता कत्तियादिया भरणिपज्ज-वसाणा पन्नत्ता-एगे पुण एवमाहंसु-ता सव्वेवि णं नक्खत्ता महादिया अस्सेसपज्जवसाणा एगेपुण एवमाहंसु-ता सव्वेवि णं नक्खत्ता धणिट्ठादिया सवणपज्जवसाणा एगे पुण एवमाहंसु-ता सव्वेवि णं नक्खत्ता अस्सिणीआदिया रेवइपज्जवसाणा एगे पुण एवमाहंसु-ता सव्वेवि णं नक्खत्ता भरणीआदिया अस्सिणीपज्जवसाणा वयं पुण एवं वदामो-ता सव्वेवि णं नक्खत्ता अभिईआदिया उत्तरासाढापज्जवसाणा पन्नत्ता तं जहा- अभिई सवणो जाव उत्तरासाढा ।

◦ दसमे पाहुडे पढमं पाहुडपाहुडं समत्तं ◦

॥ बीयं पाहुडपाहुडं ॥

[४७] ता कहं ते मुहुत्तग्गे आहितेति वदेज्जा ता एतेसि णं अट्ठावीसाए नक्खत्ताणं अत्थि नक्खत्ते जे णं नव मुहुत्ते सत्तावीसं च सत्तट्ठिभागे मुहुत्तस्स चंदेण सद्धिं जोयं जोएति अत्थि नक्खत्ता

जे णं पन्नरस मुहुत्ते चंदेण सद्धिं जोयं जोएति अत्थि नक्खत्ता जे णं तीसं मुहुत्ते चंदेणं सद्धिं जोयं जोएति अत्थि नक्खत्ता जे णं पणयालीसे मुहुत्ते चंदेण सद्धिं जोयं जोएति ता एतेसि णं अट्ठावीसाए नक्खत्ताणं कयरे नक्खत्ते जे णं नवमुहुत्ते सत्तावीसं च सत्तट्ठिभाए मुहुत्तस्स चंदेणं सद्धिं जोयं जोएति कयरे नक्खत्ता जे णं पन्नरसमुहुत्ते चंदेणं सद्धिं जोयं जोएति कयरे नक्खत्ता जे णं तीसं मुहुत्ते चंदेणं सद्धिं जोयं जोएति कयरे नक्खत्ता जे णं पणयालीसं मुहुत्ते चंदेण सद्धिं जोयं जोएति ता एतेसि णं अट्ठावीसाए नक्खत्ताणंतत्थ जेसे नक्खत्ते जे णं नव मुहुत्ते सत्तावीसं च सत्तट्ठिभागे मुहुत्तस्स चंदेणं सद्धिं जोयं जोएति से णं एगे अभीई तत्थ जेते नक्खत्ता जे णं पन्नरसमुहुत्ते चंदेणं सद्धिं जोयं जोएति ते णं छ तं जहा- सतभिसया भरणी अट्ठा अस्सेसा साती जेट्ठा तत्थ जेते नक्खत्ता जे णं तीसं मुहुत्तं चंदेणं सद्धिं जोयं जोएति ते णं पन्नरस तं जहा- सवणे धणिट्ठा पुच्चाभद्धवया रेवती अस्सिणी कत्तिया मिगसिरं पुस्सो महा पुच्चाफग्गुणी हत्थो चित्ता अनुराहा मूलो पुच्चासाढा तत्थ जेते नक्खत्ता जे णं पणयालीसं मुहुत्ते चंदेणं सद्धिं जोयं जोएति ते णं छ तंजहा-उत्तराभद्धपदा रोहिणी पुण्व्वसू उत्तराफग्गुणी विसाहा उत्तरासाढा ।

[४८] ता एतेसि णं अट्ठावीसाए नक्खत्ताणं अत्थि नक्खत्ते जे णं चत्तारि अहोरत्ते छच्च मुहुत्ते सूरेंसद्धिंजोयं जोएति अत्थि नक्खत्ताजेणंछ अहोरत्ते एक्कवीसं च मुहुत्ते सूरें सद्धिं जोयं जोएति अत्थि नक्खत्ता जे णं तेरस अहोरत्ते दुवालस य मुहुत्ते सूरें सद्धिं जोयं जोएति अत्थिनक्खत्ता जे णं वीसं अहोरत्ते तिण्णि य मुहुत्ते सूरें सद्धिं० ता एतेसि णं अट्ठावीसाए नक्खत्ताणं कयरे नक्खत्ते जे णं चत्तारि अहोरत्ते छच्च मुहुत्ते सूरें सद्धिं जोयं जोएति कयरे नक्खत्ता जे णं छ अहोरत्ते एक्कवीसं मुहुत्ते सूरें सद्धिं जोयं जोएति कयरे नक्खत्ता जे णं तेरस अहोरत्ते बारस मुहुत्ते सूरें सद्धिं जोयं जोएति कयरे नक्खत्ता जे णं वीसं अहोरत्ते तिण्णि य मुहुत्ते सूरें सद्धिं जोयं जोएति ता एतेसि णं अट्ठावीसाए नक्खत्ताणं तत्थ जेसे नक्खत्ते जे णं चत्तारि अहोरत्ते छच्च मुहुत्ते सूरें सद्धिं जोयं जोएति से णं एगे अभीई तत्थ जेते पाहुडं-१०, पाहुडपाहुडं-२

नक्खत्ता जे णं छ अहोरत्ते एक्कवीसं च मुहुत्ते सूरें सद्धिं जोयं जोएति ते णं छ, सतभिसया भरणी अट्ठा अस्सेसा साती जट्ठा तत्थ जेते नक्खत्ता जे णं तेरस अहोरत्ते दुवालस य मुहुत्ते सूरें सद्धिं जोयं जोएति ते णं पन्नरस सवणो धणिट्ठा पुच्चाभद्धवया रेवती अस्सिणी कत्तिया मिगसिरं पूसो महा पुच्चाफग्गुणी हत्थो चित्ता अनुराहा मूलो पुच्चासाढा तत्थ जेतेनक्खत्ता जे णं वीसं अहोरत्ते तिण्णि य मुहुत्ते सूरें सद्धिं जोयं जोएति ते णं छ, उत्तराभद्धवया रोहिणी पुण्व्वसू उत्तराफग्गुणी विसाहा उत्तरासाढा ।

० दसमे पाहुडे बीयं पाहुडपाहुडं समत्तं ०

[] तच्चं पाहुडपाहुडं []

[४९] ता कहं ते एवंभागा आहिताति वदेज्जा ता एतेसि णं अट्ठावीसाए नक्खत्ताणं अत्थि नक्खत्ता पुच्चंभागा समक्खत्ता तीसइमुहुत्ता पन्नत्ता अत्थि नक्खत्ता पच्छंभागा समक्खत्ता तीसइमुहुत्ता पन्नत्ता अत्थि नक्खत्ता नत्तंभागा अवड्ढक्खत्ता पन्नरसमुहुत्ता पन्नत्ता अत्थि नक्खत्ता उभयंभागा दिवड्ढक्खत्ता पणयालीसइमुहुत्ता पन्नत्ता ता एतेसि णं अट्ठावीसाए नक्खत्ताणं कयरे नक्खत्ता

पुव्वंभागा समक्खेत्ता तीसइमुहुत्ता पन्नत्ता कयरे नक्खत्ता पच्छंभागा समक्खेत्ता तीसउमुहुत्ता पन्नत्ता कयरे नक्खत्ता नत्तंभागा अवड्ढक्खेत्ता पन्नरसमुहुत्ता पन्नत्ता कयरे नक्खत्ता उभयंभागा दिवड्ढक्खेत्ता पणायलीसइमुहुत्ता पन्नत्ता ताएतेसि णं अट्ठावीसाए नक्खत्ताणं तत्थ पुव्वंभागा समक्खेत्ता तीसइमुहुत्ता पन्नत्ता ते णं छ तं जहा- पुव्वापोड्ववया कत्तिया महा पुव्वाफग्गुणी मूलो पुव्वासाढा तत्थ जेते नक्खत्ता पच्छंभागा समक्खेत्ता तीसइमुहुत्ता पन्नत्ता ते णं दस तं जहा- अभिई सवणो धणिट्ठा रेवती अस्सिणी मिगसिर पूसो हत्थो चित्ता अनुराहा तत्थ जेते नक्खत्ता नत्तंभागा अवड्ढक्खेत्ता पन्नरसमुहुत्ता पन्नत्ता ते णं छ तं जहा- संतभिसया भरणी अट्ठा अस्सेसा साती जेट्ठा तत्थ जेते नक्खत्ता उभयंभागा दिवड्ढक्खेत्ता पणायलीसइ-मुहुत्ता पन्नत्ता ते णं छ तं जहा- उत्तराभट्टवया रोहिणी पुनव्वसू उत्तराफग्गुणी विसाहा उत्तरासाढा ।

◦ दसमे पाहुडे तच्चं पाहुडपाहुडं समत्तं ◦

◻ चउत्थं पाहुडपाहुडं ◻

[५०] ता कहं ते जोगस्स आदी आहितेति वदेज्जा ता अभीई-सवणा खलु दुवे नक्खत्ता पच्छंभागा समक्खेत्ता सातिरेगऊतालीसइमुहुत्ता तप्पढमयाए सायं चंदेणं सद्धिं जोयं जोएति ततो पच्छा नवरं सातिरेगं दिवसं-एवं खलु अभीई-सवणा दुवे नक्खत्ता एगं रातिं एगं च सातिरेगं दिवसं चंदेणं सद्धिं जोयं जोएति जोएत्ता जोयं अनुपरियट्ठति अनुपरियट्ठित्ता सायं चंदं धणिट्ठाणं समप्पेति ता धणिट्ठा खलु नक्खत्ते पच्छंभागे समक्खेत्ते तीसइमुहुत्ते तप्पढमयाए सायं चंदेण सद्धिं जोयं जोएति जोएत्ता ततो पच्छा रातिं अवरं च दिवसं-एवं खलु धणिट्ठा नक्खत्ते एगं रातिं एगं च दिवसं चंदेण सद्धिं जोयं जोएति जोएत्ता जोयं अनुपरियट्ठति अनुपरियट्ठित्ता सायं चंदं सतभिसयाणं समप्पेति ता सतभिसया खलु नक्खत्ते नत्तंभागे अवड्ढक्खेत्ते पन्नरसमुहुत्ते तप्पढमयाए सायं चंदेणं सद्धिं जोयं जोएति नो लभति अवरं दिवसं-एवं खलु सतभिसया नक्खत्ते एगं रातिं चंदेणं सद्धिं जोयं जोएति जोएत्ता जोयं अनुपरियट्ठति अनुपरियट्ठित्ता पातो चंदं पुव्वाणं पोड्ववयाणं सप्पेति ता पुव्वापोड्ववया खलु नक्खत्ते पुव्वंभागे समक्खेत्ते तीसइमुहुत्ते तप्पढमयाए पातो चंदेणं सद्धिं जोयं जोएति तओ पच्छा अवरं रातिं-एवं खलु पुव्वापोड्ववया नक्खत्ते

एगं

पाहुडं-१०, पाहुडपाहुडं-४

दिवसं एगं च रातिं चंदेणं सद्धिं जोयं जोएति जोएत्ता जोयं अनुपरियट्ठति अनुपरियट्ठित्ता पातो चंदं उत्तराणं पोड्ववयाणं समप्पेति ता उत्तरापोड्ववया खलु नक्खत्ते उभयंभागे दिवड्ढक्खेत्ते पणायलीसइमुहुत्ते तप्पढमयाए पातो चंदेण सद्धिं जोयं जोएति अवरं च रातिं ततो पच्छा अवरं दिवसं-एवं खलु उत्तरापोड्ववया नक्खत्ते दो दिवसे एगं च रातिं चंदेणं सद्धिं जोयं जोएति जोएत्ता जोयं अनुपरियट्ठति अनुपरियट्ठित्ता सायं चंदं रेवतीणं समप्पेति ता रेवती खलु नक्खत्ते पच्छंभागे समक्खेत्ते तीसइमुहुत्ते तप्पढमयाए सायं चंदेण सद्धिं जोयं जोएति ततो पच्छा अरं दिवसं-एवं खलु रेवती नक्खत्ते एगं रातिं एगं च दिवसं चंदेणं सद्धिं जोयं जोएति जोएत्ता जोयं अनुपरियट्ठति अनुपरियट्ठिता सायं चंदं अस्सिणीणं समप्पेति ता अस्सिणी खलु नक्खत्ते पच्छंभागं समक्खेत्ते तीसइमुहुत्ते तप्पढमयाए सायं चंदेण सद्धिं जोयं जोएति ततो पच्छा अवरं दिवसं एवं खलु अस्सिणी नक्खत्ते एगं राति एगं च दिवसं चंदेणं सद्धिं जोय जोएति जोएत्ता जोयं अनुपरियट्ठति अनुपरियट्ठित्ता सायं चंदं भरमीणं समप्पेति ता भरणी खलु

नक्खत्ते नत्तंभागे अवड्ढक्खत्ते पन्नरसमुहुत्ते तप्पढमयाए सायं चंदेण सद्धिं जोयं जोएति नो लभति अवरं दिवसं-एवं खलु भरणी नक्खत्ते एगं रातिं चंदेण सद्धिं जोयं जोएति जोएत्ता जोयं अनुपरियट्ठति अनुपरियट्ठित्ता पातो चंदं कत्तियाणं सम्पेति ता कत्तिया खलु नक्खत्ते पुव्वंभागे समक्खत्ते तीसइमुहुत्ते तप्पढमयाए पातो चंदेण सद्धिं जोयं जोएति ततो पच्छा रातिं-एवं खलु कत्तिया नक्खत्ते एगं दिवसं एगं च रातिं चंदेण सद्धिं जोयं जोएति जोएत्ता जोयं अनुपरियट्ठति अनुपरियट्ठित्ता पातो चंदं रोहिणीणं सम्पेति रोहिणी जहा उत्तरभद्वया मिगसिरं जहा धणिद्धा अद्दा जहा सतभिसया पुणव्वसू जहा उत्तरभद्वया मिगसिरं जहा धणिद्धा अद्दा जहा सतभिसया पुणव्वसू जहा उत्तरभद्वया पुस्सो जहा धणिद्धा अस्सेसा जहा सतभिसया मधा जहा पुव्वाफग्गुणी पुव्वाफग्गुणी जहा पुव्वाभद्वया उत्तराफग्गुणी जहा उत्तरभद्वया हत्थो चित्ता य जहा धणिद्धा साती जहा सतभिसया विसाहा जहा उत्तरभद्वया अनुराहा जहा धणिद्धा जेद्दा जहा सतिभिसया मूलो पुव्वासाढा य जहा पुव्वभद्वया उत्तरासाढा जहा उत्तरभद्वया ।

◦ दसमे पाहुडे चउत्थं पाहुडपाहुडं समत्तं ◦

◻ पंचमं पाहुडपाहुडं ◻

[५१] ता कहं ते कुला आहिताति वदेज्जा तत्थ खलु इमे बारस कुला बारस उवकुला चत्तारि कुलोवकुला पन्नत्ता बारस कुला तं जहा- धणिद्धाकुलं उत्तराभद्वया कुल अस्सिणी कुलं कत्तिया कुलं संठाणा कुलं पुस्सो कुलं महा कुलं उत्तराफग्गुणी कुलं चित्ता कुलं विसाहा कुलं मूलो कुलं उत्तरासाढा कुलं बारस उवकुला तं जहा- सवणो उवकुलं पुव्वभद्वया उवकुलं रेवती उवकुलं भरणी उवकुल रोहिणी उवकुलं पुन्नवसू उवकुलं अस्सेसा उवकुलं पुव्वाफग्गुणी उवकुलं हत्थो उवकुलं साती उवकुलं जेटअठा उवकुलं पुव्वासाढा उवकुलं चत्तारि कुलोवकुला तं जहा- अभीई कुलोवकुलं सतभिसया कुलोवकुलं अद्दा कुलोवकुलं अनुराहा कुलोवकुलं ।

◦ दसमे पाहुडे पंचमं पाहुडपाहुडं समत्तं ◦

◻ छट्ठं पाहुडपाहुडं ◻

[५२] ता कहं ते पुण्णिमासिणी आहितेति वदेज्जा तत्थ खलु इमाओ बारस पुण्णिमासिणीओ बारस अमावासाओ साविट्ठी पोडवली आसोई कत्तिया मग्गसिरी पोसी माही फग्गुणी पाहुडं-१०, पाहुडपाहुडं-६

चेत्त वइसाही जेद्दामूली आसाढी ता साविट्ठिणं पुण्णिमासिं कति नक्खत्ता जोएंति ता तिण्णि नक्खत्ता जोएंति तं जहा-अभीई सवणो धणिद्धा ता पोडवतिण्णं पुण्णिमं तिण्णि नक्खत्ता जोएंति सत्तभिसय पुव्वा पोडवया उत्तरा पोडवया ता आसोइण्णं पुण्णिमं दोण्णि नक्खत्ता जोएंति रेवती अस्सिणी य ता कत्तियण्णं पुण्णिमं दोण्णि नक्खत्ता जोएंति तं जहा- भरणी कत्तिया य ता मग्गसिरण्णं पुण्णिमं दोण्णि नक्खत्ता जोएंति तं जहा- रोहिणी मिगसिरो य ता पोसिण्णं पुण्णिमं तिण्णि नक्खत्ता जोएंति तं जहा- अद्दा पुण्णवसू पुरस्सो ता माहिण्णं पुण्णिमं दोण्णि नक्खत्ता जोएंति तं जहा- अस्सेसा महा य ता फग्गुणिण्णं पुण्णिमं दुण्णि नक्खत्ता जोएंति तं जहा- पुव्वाफग्गुणी उत्तराफग्गुणी य ता चैत्तिण्णं पुण्णिमं दोण्णि नक्खत्ता जोएंति तं जहा- हत्थो चित्ता य ता वइसाहिण्णं पुण्णिमं दोण्णि नक्खत्ता जोएंति तं जहा- साती विसाहा य ता जेद्दामलिण्णं पुण्णिमासिणिं तिण्णि नक्खत्ता जोएंति तं जहा- अनुराहा जेद्दा मूलो ता आसट्ठिण्णं पुण्णिमं दो नक्खत्ता जोएंति तं जहा- पुव्वासाढा उत्तरासाढा ।

[५३] ता साविट्टिण्णं पुण्णिमासिणिं किं कुलं जोएति उवकुलं वा जोएति कुलोवकुलं वा जोएति ता कुलं वा जोएति उवकुलं वा जोएति कुलोवकुलं वा जोएति कुलं जोएमाणे धणिट्ठा नक्खत्ते जोएति उवकुलं जोएमाणे सवणे नक्खत्ते जोएति कुलोवकुलं जोएमाणे अभिई नक्खत्ते जोएति साविट्टिण्णं पुण्णिमं कुलं वा जोएति उवकुलं वा जुत्ता कुलोवकुलेण वा जुत्ता साविट्ठी पुण्णिमा जुत्ताति वत्तव्वं सिया ता पोड्ढवतिण्णं पुण्णिमं कुलं वा जोएति उवकुलं वा जोएति कुलोवकुलं वा जोएति कुलं जोएमाणे उत्तरापोड्ढवया नक्खत्ते जोएति उवकुलं जोएमाणे पुव्वापोड्ढवया नक्खत्ते जोएति कुलोवकुलं जोएमाणे सतभिसया नक्खत्ते जोएति पोड्ढवतिण्णं पुण्णिमासिणिं कुलं वा जोएति उवकुलं वा जोएति कुलोवकुलं वा जोएति कुलेण वा जुत्ता उवकुलेण वा जुत्ता कुलोवकुलेण वा जुत्ता पोड्ढवती पुण्णिमा जुत्ताति वत्तव्वं सिया, ता आसोइण्णं पुण्णिमासिणिं कुलंपि जोएति उवकुलंपि जोएति नो लभति कुलोवकुलं कुलं जोएमाणे अस्सिणी नक्खत्ते जोएति उवकुलं जोएमाणे रेवती नक्खत्ते जोएति आसोइण्णं पुण्णिमं कुलं वा जोएति उवकुलं वा जोएति कुलेण वा जुत्ता उवकुलेण वा जुत्ता आसोई णं पुण्णिमा जुत्ताति वत्तव्वं सिया एवं नेयव्वाओ-पोसिं पुण्णिमं जेड्ढामूलिं पुण्णिमं च कुलोवकुलंपि जोएति अवसेसासु नत्थि कुलोवकुलं जाव आसाढी पुण्णिमा जुत्ताति वत्तव्वं सिया, ता सविट्टिण्णं अमावासं कति नक्खत्ता जोएति तादुण्णि नक्खत्ता जोएतितंजहा- अस्सेसा महा य एवं एतेणं अभिलावेणं नेतव्वं पोड्ढवति दो नक्खत्ता जोएति तं जहा- पुव्वाफग्गुणी उत्तराफग्गुणी अस्सोइं हत्थो चित्ता य कत्तियं साती विसाहा य मग्गसिरिं अनुराधा जेड्ढा मूलो पोसिं पुव्वासाढा उत्तरासाढा माहिं अभीई सवणो घणिट्ठा फग्गुणिं सतभिसया पुव्वापोड्ढवया चेत्तिं उत्तरापोड्ढवया रेवती अस्सिणी य विसाहिं भरणी कत्तिया य जेड्ढामूलिं रोहिणी मिगसिरं च ता आसाढिण्णं अमावासिं तिण्णि नक्खत्ता जोएति तं जहा- अद्दा पुनव्वसू पुस्सो ता साविट्टिण्णं अमावासं कुलं वा जोएति उवकुलं वा जोएति नो लभति कुलोवकुलं कुलं जोएमाणे महा नक्खत्ते जोएति उवकुलं जोएमाणे अस्सेसा नक्खत्ते जोएति कुलेण वा जुत्ता उवकुलेण वा जुत्ता साविट्ठी अमावासा जुत्ताति वत्तव्वं सिया एवं नेतव्वं नवरं-मग्गसिरीए माहीए फग्गुणीए आसाढीए य अमावासाए कुलोवकुलंपिजोएति सेसेसु अत्थि ।

◦ दसमे पाहुडे छड्डं पाहुडपाहुडं समत्तं ◦

पाहुडं-१०, पाहुडपाहुडं-७

◻ **सत्तमं पाहुडपाहुडं** ◻

[५४] ता कहं ते सण्णिवाते आहितेति वदेज्जा ता जया णं साविट्ठी पुण्णिमा भवति तया णं माही अमावासा भवति जया णं माही पुण्णिमा भवइ तया णं साविट्ठी अमावासा भवइ जया णं पोड्ढवती पुण्णिमा भवति तया णं फग्गुणी अमावासा भवति जया णं फग्गुणी पुण्णिमा भवति तया णं पोड्ढवती अमावासा भवति जया णं आसोई पुण्णिमा भवति तया णं चेत्ती अमावासा भवति जया णं चेत्ती पुण्णिमा भवति तया णं वइसाही अमावासा भवति जया णं वइसाही पुण्णिमा भवति तया णं कत्तिई अमावासा भवति जया णं मग्गसिरी पुण्णिमा भवति तया णं जेड्ढामूली अमावासा भवति जया णं जेड्ढामूली पुण्णिमा तया णं मग्गसिरी अमावासा जया णं पोसी पुण्णिमा तया णं आसाढी अमावासा जया णं आसाढी पुण्णिमा भवति तया णं पोसी अमावासा भवति ।

◦ दसमे पाहुडे सत्तमं पाहुडपाहुडं समत्तं ◦

◻ **अड्डमं पाहुडपाहुडं** ◻

[५५] ता कहं ते नकखत्तसंठिती आहितेति वदेज्जा ता एतेसि णंअट्ठावीसाए नकखत्ताणं अभीई नकखत्ते किसंठिते पन्नत्ते ता गोसीसावलिसंठिते पन्नत्ते ता सवणे नकखत्ते काहारसंठिते पन्नत्तेता धणिट्ठा नकखत्तेसउणिपलीणगसंठिते पन्नत्ते ता सतभिसया नकखत्ते पुप्फोवयारसंठिते पन्नत्ते ता पुव्वापोट्टवया नकखत्ते अवड्ढवाविसंठिते पन्नत्ते एवं उत्तरावि ता रेवति नकखत्ते नावासंठिते पन्नत्ते ता उस्सिणी नकखत्ते आसकखंधसंठिते पन्नत्ते ता भरणी नकखत्तो भगसंठिते पन्नत्ते ता कत्तिया नकखत्ते छुरघरगसंठिते पन्नत्ते ता रोहिणी नकखत्ते सगडुद्धिसंठिते पन्नत्तेता मिगसिरा नकखत्ते मगसीसावलिसंठिते पन्नत्ते ता अट्ठा नकखत्ते रुहिरबिंदुसंठिते पन्नत्ते ता पुणव्वसू नकखत्ते तुलासंठिते पन्नत्ते ता पुस्से नकखत्ते बद्धमाणगसंठिते पन्नत्तेता ता अस्सेसा नकखत्ते पडागसंठिते पन्नत्ते ता महा नकखत्ते पागारसंठिते पन्नत्ते ता पुव्वाफग्गुणी नकखत्ते अट्ठपलियंकसंठिते पन्नत्ते एवं उत्तरावि ता हत्थे नकखत्ते हत्थसंठिते पन्नत्ते ता चित्ता नकखत्ते मुहफुल्लसंठिते पन्नत्ते ता साती नकखत्ते खीलगसंठिते पन्नत्तेविसाहानकखत्ते दामणिसंठिते पन्नत्ते ता अनुराधा नकखत्ते एगावलिसंठिते पन्नत्ते ता जेट्ठा नकखत्ते गयदंतसंठिते पन्नत्ते ता मूले नकखत्ते विच्छुयनंगोलसंठिते पन्नत्ते ता पुव्वासाढा नकखत्ते गयविककमसंठिते पन्नत्ते ता उत्तरासाढा नकखत्ते सीहानिसाइसंठिते पन्नत्ता ।

◦ दसमे पाहुडे अड्डमं पाहुडपाहुडं समत्तं ◦

◻ **नवमं पाहुडपाहुडं** ◻

[५६] ता कहं ते तारग्गे आहितेति वदेज्जा ता एतेसि णं अट्ठावीसाए नकखत्ताणं अभीई नकखत्ते तितारे पन्नत्ते ता सवणे नकखत्ते तितारे पन्नत्ते ता धणिट्ठा नकखत्ते पणतारे पन्नत्ते ता सतभिसया नकखत्ते सततारे पन्नत्ते ता पुव्वापोट्टवत्ता नकखत्ते दुतारे पन्नत्ते एवं उत्तरावि ता रेवती नकखत्ते बत्तीसतितारे पन्नत्ते ता अस्सिणी नकखत्ते तितारे पन्नत्ते एवं सव्वे पुच्छिज्जंति-भरणी तितारे पन्नत्ते अट्ठा एगतारे पन्नत्ते पुणव्वसू पंचतारे पन्नत्ते पुस्से तितारे पन्नत्ते अस्सेसा छतारे पन्नत्ते मघा सत्ततारे पन्नत्ते पुव्वाफग्गुणी दुतारे पन्नत्ते एवं उत्तरावि हत्थे पंचतारे पन्नत्ते चित्ता एगतारे पन्नत्ते साती एगतारे पन्नत्ते

पाहुडं-१०, पाहुडपाहुडं-९

विसाहा पंचतारे पन्नत्ते अनुराहा चउतारे पन्नत्ते जेट्ठा तितारे पन्नत्ते मूले एगतारे पन्नत्ते पुव्वासाढा चउतारे पन्नत्ते उत्तरासाढा चउतारे पन्नत्ते ।

◦ दसमे पाहुडे नवमं पाहुडपाहुडं समत्तं ◦

◻ **दसम पाहुडपाहुडं** ◻

[५७] ता कहं ते नेता आहितेति वदेज्जा ता वासाणं पढमं मासं कति नकखत्ता णेति ता चत्तारि नकखत्ता णेति तं जहा- उत्तरासाढा अभीई सवणो धणिट्ठा उत्तरासाढा चोद्धस अहोरत्ते नेति अभीई सत्त अहोरत्ते नेति सवणे अट्ठा अहोरत्ते नेति धणिट्ठा एगं अहोरत्तं नेति तंसि च णं मासंसि चउरंगुलपोरिसीए छायाए सूरिए अनुपरियट्ठति तस्स णं मासस्स चरिमे दिवसे दो पदाइं चत्तारि अंगुलाइं

पोरिसी भवति, ता वासाणं दोच्चं मासं चत्तारि नक्खत्ता णैति तं जहा- धणिद्धा सतभिसता पुव्वोपोड्वया उत्तपोड्वया धणिद्धा चोद्धस अहोरत्ते नेति सतभिसता सत्त अहोरत्ते नेति पुव्वापोड्वया अट्ट अहोरत्ते नेति उत्तरपोड्वया एगं अहोरत्तं नेति तंसि च णं मासंसि अट्टगुलपोरिसीए छायाए सूरिए अनुपरियट्टति तस्स णं मासस्स चरिमे दिवसे दो पदाइं अट्ट अंगुलाइं पोरिसी भवति, ता वासाणं ततियं मासं तिण्णि नक्खत्ता णैति तं जहा- उत्तरापोड्वया रेवती अस्सिणी उत्तरापोड्वया चोद्धस अहोरत्ते नेति रेवती पन्नरस अहोरत्ते नेति अस्सिणी एगं अहोरत्तं नेति तंसि च णं मासंसि दुवालसंगुलपोरिसीए छायाए सूरिए अनुपरियट्टति तस्स णं मासस्स चरिमे दिवसे लेहट्टाइं तिण्णि पदाइं पोरिसी भवति, ता वासाणं चउत्थं मासं तिण्णि नक्खत्ता णैति तं जहा अस्सिणी भरणी कत्तिया अस्सिणी चउद्धस्स अहोरत्ते नेति भरणी पन्नरस अहोरत्ते नेति कत्तिया एगं अहोरत्तं नेति तंसि च णं मासंसि सोलसंगुलपोरिसीए छायाए सूरिए अनुपरियट्टति तस्स णं मासस्स चरिमे दिवसे तिण्णि पदाइं चत्तारि अंगुलाइं पोरिसी भवति, ता हेमंताणं पढमं मासं तिण्णि नक्खत्ता णैति तं जहा- कत्तिया रोहिणी संठाणा कत्तिया चोद्धस अहोरत्ते नेति रोहिणी पन्नरस अहोरत्ते नेति संठाणा एगं अहोरत्तं नेति तंसि च णं मासंसि वीसंगुलपोरिसीए छायाए सूरिए अनुपरियट्टति तस्स णं मासस्स चरिमे दिवसे तिण्णि पदाइं अट्ट अंगुलाइं पोरिसी भवइ, ता हेमंताणं दोच्च मासं चत्तारि नक्खत्ता णैति तं जहा- संठाणं अट्टा पुणव्वसू पुस्सो संठाणा चोद्धस अहोरत्ते नेति अट्टा सत्त अहोरत्ते नेति पुणव्वसू अट्ट अहोरत्ते नेति पुस्से एगं अहोरत्तं नेति तंसि च णं मासंसि चउवीसंगुलपोरिसीए छायाए सूरिए अनुपरियट्टति तस्स णं मासस्स चरिमे दिवसे लेहट्टाइं चत्तारि पदाइं पोरिसी भवति, ता हेमंताणं ततियं मासं तिण्णि नक्खत्ता णैति तं जहा- पुस्से अस्सेस्सा महा पुस्से चोद्धस अहोरत्ते नेति अस्सेसा पंचदस अहोरत्ते नेति महा एगं अहोरत्तं नेति तंसि च णं मासंसि वीसंगुलपोरिसीए छायाए सूरिए अनुपरियट्टति तस्स णं मासस्स चरिमे दिवसे तिण्णि पदाइं अट्टगुलाइं पोरिसी भवति, ता हेमंताणं चउत्थं मासं तिण्णि नक्खत्ता णैति तं जहा- महा पुव्वाफग्गुणी उत्तराफग्गुणी महा चोद्धस अहोरत्ते नेति पुव्वाफग्गुणी पन्नरस अहोरत्तेनेति उत्तराफग्गुणी एगं अहोरत्तं नेति तंसि च णं मासंसि सोलसंगुलपोरिसीए छायाए सूरिए अनुपरियट्टति तस्स णं मासस्स चरिमे दिवसे तिण्णि पदाइं चत्तारि अंगुलाइं पोरिसी भवति, ता गिम्हाणं पढमं मासं तिण्णि नक्खत्ता णैति तं जहा- उत्तराफग्गुणी हत्थो चित्ता उत्तराफग्गुणी चोद्धस अहोरत्ते नेति हत्थो पन्नरस अहोरत्ते नेति चित्ता एगं अहोरत्तं नेति तंसि च णं मासंसि दुवालसंगुलपोरिसीए छायाए सूरिए अनुपरियट्टति तस्स णं मासस्स चरिमे दिवसे लेहट्टाइं

पाहुडं-१०, पाहुडपाहुडं-१०

तिण्णि पदाइं पोरिसी भवति, ता गिम्हाणं बितियं मासं तिण्णि नक्खत्ता णैति तं जहा- चित्ता साती विसाहा चित्ता चोद्धस अहोरत्ते नेति साती पन्नरस अहोरत्ते नेति विसाहा एगं अहोरत्तं नेति तंसि च णं मासंसि अट्टगुलपोरिसीए छायाए सूरिए अनुपरियट्टति तस्स णं मासस्स चरिमे दिवसे दो पदाइं अट्ट अंगुलाइं पोरिसी भवति, ता गिम्हाणं ततियं मासं चत्तारि नक्खत्ता णैति तं जहा- विसाहा अनुराहा जेट्टा मूलो विसाहा चोद्धस अहोरत्ते नेति अनुराहा सत्त अहोरत्ते नेति जेट्टा अट्ट अहोरत्ते नेति मूलो एगं अहोरत्तं नेति तंसि च णं मासंसि चउरंगुलपोरिसीए छायाए सूरिए अनुपरियट्टति तस्स णं मासस्स चरिमे दिवसे दो पदाणि चत्तारि अंगुलाइं पोरिसी भवति, ता गिम्हाणं चउत्थं मासं तिण्णि नक्खत्ता णैति तं जहा- मूलो पुव्वासाढा उत्तरासाढा मूलो चोद्धस अहोरत्ते नेति पुव्वासाढा पन्नरस अहोरत्ते नेति उत्तरासाढा एगं

अहोरत्तं नेति तंसि च णं मासंसि वट्टाए समचउरंससंठिताए नग्गोहपरिमंडलाए सकायमणुरंगिणीए छायाए सूरिए अनुपरियट्टति तस्स णं मासस्स चरिमे दिवसे लेहट्टाइं दो पदाइं पोरिसी भवति ।

◦ दसमे पाहुडे दसमं पाहुडपाहुडं समत्तं ◦

▣ **एक्कारसमं पाहुडपाहुडं** ▣

[५८] ता कहं ते चंदमग्गा आहितेत वदेज्जा ता एतेसि णं अट्टावीसाए नक्खत्ताणं अत्थि नक्खत्ता जे णं सया चंदस्स दाहिणेणं जोयं जोएति अत्थि नक्खत्ता जे णं सया चंदस्स उत्तरेणं जोयं जोएति अत्थि नक्खत्ता जे णं चंदस्स दाहिणेणवि उत्तरेणवि पमदंपि जोयं जोएति अत्थि नक्खत्ता जे णं चंदस्स दाहिणेणवि पमदंपि जोयं जोएति अत्थि नक्खत्ते जे णं सया चंदस्स पमदं जोयं जोएति ता एतेसि णं अट्टावीसाए नक्खत्ताणं कयरे नक्खत्ता जे णं सया चंदस्स दाहिणेणं जोयं जोएति तहेव जाव कयरे नक्खत्ते जे णं सया चंदस्स पमदं जोयं जोएति ताएतेसि णं अट्टावीसाए नक्खत्ताणं जे णं नक्खत्ता सया चंदस्स दाहिणेणं जोयं जोएति ते णं छ तं जहा- संठाणा अट्टा पुस्सो अस्सेसा हत्थो मूलो तत्थ जेते नक्खत्ते जे णं सया चंदस्स उत्तरेणं जोयं जोएति ते णं बारस तं जहा- अभिई सवणो धणिट्ठा सतभिसया पुच्चाभद्ववया उत्तरापोट्टवया रेवती अस्सिणी भरणीपुच्चाफग्गुणी उत्तराफग्गुणी साती तत्थ जेते नक्खत्ता जे णं चंदस्स दाहिणेणवि उत्तरेणवि पमदंपि जोयं जोएति ते णं सत्त तं जहा- कत्तिया रोहिणी पुणव्वसू महा चित्ता विसाहा अनुराहा तत्थ जेते नक्खत्ता जे णं चंदस्स दाहिणेणवि पमदंपि जोयं जोएति ताओ णं दो आसाढाओ सव्वबाहिरे मंडले जोयं जोएसु वा जोएति वा जोएस्संति वा तत्थ जेसे नक्खत्ते जे णं सया चंदस्सपमदं जोयं जोएति सा णं एगा जेट्टा ।

[५९] ता कति ते चंदमंडला पन्नत्ता ता पन्नरस चंदमंडला पन्नत्ता ता एतेसि णं पन्नरसण्हं चंदमंडलाणं अत्थि चंदमंडलाणं अत्थि चंदमंडला जे णं सया नक्खत्तेहिं अविरहिया अत्थि चंदमंडला जे णं सया नक्खत्तेहिं विरहिया अत्थि चंदमंडला जे णं रविससिनक्खत्ताणं सामण्णा भवंति अत्थि चंदमंडला जे णं सया आदिच्चेहिं विरहिया ता एतेसि णं पन्नरसण्हं चंदमंडलाणं कयरे चंदमंडला जे णं सया नक्खत्तेहिं अविरहिया जाव कयरे चंदमंडला जे णं सया आदिच्चेहिं विरहिया ता एतेसि णं पन्नरसण्हं चंदमंडलाणं तत्थ जेते चंदमंडला जे णं सया नक्खत्तेहिं अविरहिया ते णं अट्ट तं जहा- पढमे चंदमंडले ततिए चंदमंडले छट्ठे चंदमंडले सत्तमे चंदमंडले अट्टमे चंदमंडले दसमे चंदमंडले एक्कारसमे चंदमंडले पन्नरसमे चंदमंडले तत्थ जेते चंदमंडला जे णं सया नक्खत्तेहिं विरहिया ते णं सत्त तं जहा- वित्तिए

पाहुडं-१०, पाहुडपाहुडं-११

जचंदमंडले चउत्थे चंदमंडले पंचमे चंदमंडले नवमे चंदमंडले बारसमे चंदमंडले तेरसमे चंदमंडले चउद्दसमे चंदमंडले तत्थ जेते चंदमंडला जे णं रविससिनक्खत्ताणं सामण्णा भवंति ते णं चत्तारि तं जहा- पढमे चंदमंडले बीए चंदमंडले इक्कारसमे चंदमंडले पन्नरसमे चंदमंडले तत्थ जेते चंदमंडला जे णं सया आदिच्चेहिं विरहिया ते णं पंच तं जहा- छट्ठे चंदमंडले सत्तमे चंदमंडले अट्टमे चंदमंडले नवमे चंदमंडले दसमे चंदमंडले ।

◦ दसमे पाहुडे एक्कारसमं पाहुडपाहुडं समत्तं ◦

॥ बारसमं पाहुडपाहुडं ॥

[६०] ता कहां ते देवयाणं अज्झयणा आहिताति वदेज्जा ता एतेसि णं अद्वावीसाए नक्खत्ताणं अभिई नक्खत्ते वम्हदेवयाए पन्नत्ते ता सवणे नक्खत्ते विण्हुदेवयाए पन्नत्ते ता धणिद्वा नक्खत्ते वसुदेवयाए पन्नत्ते ता सतभिसया नक्खत्ते वरुणदेवयाए पन्नत्ते ता पुव्वापोडुवया नक्खत्ते अयदेवयाए पन्नत्ते ता उत्तरापोडुवया नक्खत्ते अभिवइडिदेवयाए पन्नत्ते एवं सव्वेवि पुच्छिज्जंति-रेवती-पुस्सदेवया अस्सिणीअस्सदेवयाए भरणीजमदेवयाए कत्तिया अग्गिदेवया रोहिणीपयावइदेवयाए संठाणासोमदेवयाए अद्दारुद्धदेवयाए पुणव्वसूअदितिदेवयाए पुस्सोबहस्सइदेवयाए अस्सेसासप्पदेवयाए महापिइदेवयाए पुव्वाफग्गुणीभगदेवयाए उत्तराफग्गुणीअज्जमदेवयाए हत्थेसवियादेवयाए चित्तातडुदेवयाए सातीवायुदेवयाए विसाहा इंदग्गिदेवयाए अनुराहामित्तदेवयाए जेड्डाइंददेवयाए मूलेनिरइदेवयाए पुव्वासाढाआउदेवयाए उत्तरासाढाविस्सदेवयाए पन्नत्ते ।

◦ दसमे पाहुडे बारसमं पाहुडपाहुडं समत्तं ◦

॥ तेरसमं पाहुडपाहुडं ॥

[६१] ता कहां ते मुहुत्ताणं नामधेज्जा आहिताति वदेज्जा ता एगमेगस्स णं अहोरत्तस्सतीसं मुहुत्ता पन्नत्ता [तं जहा] ।

[६२] रोद्धे सेते मित्ते वाउ सुपीए तहेव अभिचंदे ।

माहिंद बलव बंभे बहुसच्चे चेव ईसाणे ।

[६३] तद्धे य भावियप्पा वेसमणे वारुणे य आणंदे ।

माहिंद बलव बंभे बहुसच्चे चेव ईसाणे ।

[६४] गंधव्व अग्गिवेसे सयरिसहे आयवं च अममे य ।

अणवं च भोमे रिसहे सव्वट्ठे रक्खसे चेव ।

◦ दसमे पाहुडे तेरसमं पाहुडपाहुडं समत्तं ◦

॥ चउद्धसमं पाहुडपाहुडं ॥

[६५] ता कहां ते दिवसे आहिताति वदेज्जा ता एगमेगस्स णं पक्खस्स पन्नरस दिवसा पन्नत्ता तं जहा- पडिवादिवसे बितियादिवसे जाव पन्नरसीदिवसे ता एतेसि णं पन्नरसण्हं दिवसाणं पन्नरस नामधेज्जा पन्नत्ता [तं जहा]-

[६६] पुव्वंगे सिद्धमणोरमे य तत्तो मणोहरे चेव ।

पाहुडं-१०, पाहुडपाहुडं-१४

जसभद्धे य जसोधरे सव्वकामसमिद्धे ।

[६७] इंदमुद्धाभिसित्ते य सोमणस धणंजए य बोद्धव्वे ।

अत्थसिद्धे अभिजाते अच्चसणे य सयंजए ।

[६८] अग्गिवेसे उवसमे दिवसाणं नामधेज्जाइं ता कहां ते रातिओ आहिताति वदेज्जा ता एगमेगस्स णं पक्खस्स पन्नरस रातिओ पन्नत्ताओ तं जहा- पडिवाराति बितियाराति जाव पन्नरसीराति ता एतासि णं पन्नरसण्हं रातिणं पन्नरस नामधेज्जा पन्नत्ता [तं जहा]-

- [६९] उत्तमा य सुनखत्ता एलावच्चा जसोधरा ।
सोमणसा चेव तहा सिरिसंभूया य बोद्धव्वा ।
[७०] विजया य वेजयंति जयंति अपराजिया य इच्छा य ।
समाहारा चेव तहा तेया य तहा य अतितेया ।

[७१] देवाणंदा राति रयणीणं नामधेज्जाइं

◦ दसमे पाहुडे चउद्धसमं पाहुडपाहुडं समत्तं ◦

□ पन्नरसमं पाहुडपाहुडं □

[७२] ता कहं ते तिही आहितेति वदेज्जा तत्थ खलु इमा दुविहा तिही पन्नत्ता तं जहा-
दिवसतिही य रातितिही य ता कहं ते दिवसतिही ता एगमेगस्स णं पक्खस्स पन्नरस-पन्नरस दिवसतिही
तं जहा- नंदे भद्दे जए तुच्छे पुण्णे पक्खस्सपंचमी पुणरवि णंदे भद्दे जए तुच्छे पुण्णे पक्खस्स दसमी
पुणरवि-णंदे भद्दे जए तुच्छे पुण्णे पक्खस्स पन्नरसी एवं ते तिगुणा तिहीओ सव्वेसिं दिवसाणं ता कहं ते
रातितिही ता एगमेगस्स णं पक्खस्स पन्नरस-पन्नरस रातितिही तं जहा- उग्गवई भोगवई जसवई
सव्वसिद्धा सुहनामा पुणरवि-उग्गवई भोगवई जाव सुहणामा पुणरवि-उग्गवई भोगवई जाव सुहनामा एवं
एते तिगुणा तिहीओ सव्वेसिं रातिणं ।

◦ दसमे पाहुडे पन्नरसमं पाहुडपाहुडं समत्तं ◦

□ सोलसमं पाहुडपाहुडं □

[७३] ता कहं ते गोत्ता आहिताति वदेज्जा ता एतेसि णं अट्ठावीसाए नक्खत्ताणं अभीई
नक्खत्ते किंगोत्ते पन्नत्ते ता मोग्गलायणसगोत्ते पन्नत्ते ता सवणे नक्खत्ते संखायणसगोत्ते पन्नत्ते
ता धणिट्ठा नक्खत्ते अग्गभावसगोत्ते पन्नत्ते ता सतभिसया नक्खत्ते कण्णिलायणसगोत्तेपन्नत्ते ता
पुव्वापोट्ठवया नक्खत्ते जाउकण्णियसगोत्ते पन्नत्ते ता उत्तरापोट्ठवया नक्खत्ते धणंजयसगोत्ते पन्नत्ते
ता रेवती नक्खत्ते पुस्सायणसगोत्ते पन्नत्ते ता अस्सिणी नक्खत्ते अस्सायणसगोत्ते पन्नत्ते ता भरणी
नक्खत्ते भग्गवेससगोत्ते पन्नत्ते ता कत्तिया नक्खत्ते अग्गिवेससगोत्ते पन्नत्ते ता रोहिणी नक्खत्ते
गोयमस-गोत्ते पन्नत्ते ता संठाणा नक्खत्ते भारद्वायसगोत्ते पन्नत्ते ता अट्ठा नक्खत्ते
लोहिच्चायणसगोत्ते पन्नत्ते ता पुणव्वसू नक्खत्ते वासिट्ठसगोत्ते पन्नत्ते ता पुस्से नक्खत्ते
ओमज्जायणसगोत्ते पन्नत्ते ता अस्सेसा नक्खत्ते मंडव्वयणसगोत्ते पन्नत्ते ता महा नक्खत्ते
पिंगायणसगोत्ते पन्नत्ते ता पुव्वाफग्गुणी नक्खत्ते गोवल्लायणसगोत्ते पन्नत्ते ता उत्तराफग्गुणी
नक्खत्ते कासवसगोत्ते पन्नत्ते ता हत्थे नक्खत्ते कोसियसगोत्ते पन्नत्ते ता चित्ता नक्खत्ते
पाहुडं-१०, पाहुडपाहुडं-१६

दब्भियायणसगोत्ते पन्नत्ते ता साती नक्खत्ते चामरच्छायणसगोत्ते पन्नत्ते ता जेट्ठा नक्खत्ते
तिगिच्छायण-सगोत्ते पन्नत्ते ता मूले नक्खत्ते कच्चायणसगोत्ते पन्नत्ते ता पुव्वा साढा नक्खत्ते
वज्झियायणसगोत्ते पन्नत्ते ता उत्तरासाढा नक्खत्ते वग्घावच्चसगोत्ते पन्नत्ते ।

◦ दसमे पाहुडे सोलसमं पाहुडपाहुडं समत्तं ◦

□ सत्तरसमं पाहुडपाहुडं □

[७४] ता कहं ते भोयणा आहिताहि वदेज्जा ता एतेसि णं अट्ठावीसाए नक्खत्ताणं कत्तियाहिं दधिणा भोच्चा कज्जं साधेति रोहिणीहिं वसभमंसं भोच्चा कज्जं साधेति संठाणाहिं मिगमंसं भोच्चा कज्जं साधेति अट्ठाहिं नवणीतेण भोच्चा कज्जं साधेति पुणव्वसुणा धतेण भोच्चा कज्जं साधेति पुस्सेण खीरेण भोच्चा कज्जं साधेति अस्सेसाहिं दीवगमंसं भोच्चा कज्जं साधेति महाहिं कसरिं भोच्चा कज्जं साधेति पुव्वाहिं फग्गुणीहिं मँढकमंसं भोच्चा कज्जं साधेति उत्तराहिं फग्गुणीहिं नखीमंसं भोच्चा कज्जं साधेति हत्थेणं वच्छाणीएण भोच्चा कज्जं साधेति चित्ताहिं मुग्गसूवेणं भोच्चा कज्जं साधेति सादिणा फलाइं भोच्चा कज्जं साधेति विसाहाहिं आसित्ति याओ अगत्थियाओ भोच्चा कज्जं साधेति अनुराहाहिं मिस्साकूरं भोच्चा कज्जं साधेति जेट्ठाहिं कोलट्टिएणं भोच्चा कज्जं साधेति मूलेणं मूलापन्नेणं भोच्चा कज्जं साधेति पुव्वाहिं आसाढाहिं आमलगसारिएणं भोच्चा कज्जं साधेति उत्तराहिं आसाढाहिं बिल्लेहिं भोच्चा कज्जं साधेति अभीइणा पुप्फेहिं भोच्चा कज्जं साधेति सवणेणं खीरेणं भोच्चा कज्जं साधेति धणिट्ठाहिं जूसेणं भोच्चा कज्जं साधेति सतभिसयाए तुवरीओ भोच्चा कज्जं साधेति पुव्वाहिं पोट्टवयाहिं कारिल्लएहिं भोच्चा कज्जं साधेति उत्तराहिं पोट्टवयाहिं वराहमंसं भोच्चा कज्जं साधेति रेवतीहिं जलयरमंसं भोच्चा कज्जं साधेति अस्सिणीहिं तित्तिरमंसं भोच्चा कज्जं साधेति अहवा वट्टगमंसं भरणीहिं तिलतंदुलगं भोच्चा कज्जं साधेति ।

◦ दसमे पाहुडे सत्तरसमं पाहुडपाहुडं समत्तं ◦

□ अट्ठारसमं पाहुडपाहुडं □

[७५] ता कहं ते चारा आहिताति वदेज्जा तत्थ खलु इमे दुविहा चारा पन्नत्ता तं जहा- आदिच्चचारा य चंदचारा य ता कहं ते चंदचारा आहिताति वदेज्जा ता पंच संवच्छरिए णं जुगे अभीई नक्खत्ते सत्तसट्ठिचारे चंदेणं सद्धिं जोयं जोएति सवणे णं नक्खत्ते सत्तसट्ठिचारे चंदेणं सद्धिं जोयं जोएति एवं जाव उत्तरासाढा नक्खत्ते सत्तसट्ठिचारे चंदेणं सद्धिं जोयं जोएति ता कहं ते आदिच्चचारा आहिताति वदेज्जा ता पंच संवच्छरिए णं जुगे अभीई नक्खत्ते पंचचारे सूरेण सद्धिं जोयं जोएति एवं जाव उत्तरासाढा नक्खत्ते पंचचारे सूरेण सद्धिं जोयं जोएति ।

◦ दसमे पाहुडे अट्ठारसमं पाहुडपाहुडं समत्तं ◦

□ एग्गुणवीसइमं पाहुडपाहुडं □

[७६] ता कहं ते मासा आहिताति वदेज्जा ता एग्गुणस्स णं संवच्छरस्स बारस मासा तेसिं च दुविहा नामधेज्जा-लोइया लोउत्तरिया य तत्थ लोइया नामा इमे तं जहा- सावणे भट्टवते अस्सोए कत्तिए मग्गसिरे पोसे माहे फग्गुणे चित्ते वइसाहे जेट्ठामूले आसाढे लोउत्तरिया नामा इमे ।

पाहुडं-१०, पाहुडपाहुडं-१९

[७७] अभिनंदे सुपइट्ठे य विजए पीतिवद्धण ।

सेज्जंसे य सिवे यावि सिंसिरे य स हेमवं ।

[७८] नवमे वसंतमासे दसमे कुसुमसंभवे ।

एकादसमे निदाहे वणविरोही य बारसे ।

◦ दसमे पाहुडे एगूणवीसइमं पाहुडपाहुडं समत्तं ◦

◻ वीसइमं पाहुडपाहुडं ◻

[७९] ता कति णं संवच्छरा आहिताति वदेज्जा ता पंच संवच्छरा आहिताति वदेज्जा तं जहा- नक्खत्तसंवच्छरे जुगसंवच्छरे पमाणसंवच्छरे लक्खणसंवच्छरे सणिच्छरसंवच्छरे ।

[८०] ता नक्खत्तसंवच्छरे णं दुवालसविहे पन्नत्ते तं जहा- सावणे भद्वए जाव आसाढे जं वा बहस्सतीमहग्गहे दुवालसहिं संवच्छरेहिंसव्वं नक्खत्त-मंडलं समाणेति ।

[८१] ता जुगसंवच्छरे णं पंचविहे पन्नत्ते तं जहा- चंदे चंदे अभिवड्ढिए चंदे अभिवड्ढिए चेव ता पढमस्स णं चंदसंवच्छरस्स चउव्वीसं पव्व पन्नत्ता दोच्चस्स णं चंदसंवच्छरस्स चउव्वीसं पव्वा पन्नत्ता तच्चस्स णं अभिवड्ढियसंच्छरस्स छव्वीसं पव्वा पन्नत्ता चउत्थस्स णं चंदसंवच्छरस्स चउव्वीसं पव्वा पन्नत्ता पंचमस्स णं अभिवड्ढिय संवच्छरस्स छव्वीसं पव्वा पन्नत्ता एवामेव सपुव्वावरेणं पंचसंवच्छरिए जुगे एगे चउवीसे पव्वसते भवतीति मक्खायं ।

[८२] ता पमाणसंवच्छरे णं पंचविहे नक्खत्ते चंद उडू आइच्चे अभिवड्ढिते ।

[८३] ता लक्खणसंवच्छरे णं पंचविहे पन्नत्ते तं जहा- नक्खत्ते चंदे उडू आइच्चे अभिवड्ढिते ता नक्खत्तसंवच्छरे पंचविहे पन्नत्ते [तं जहा] ।

[८४] समगं नक्खत्ता जोयं जोएंति समगं उडू परिणमंति

।

नच्चुणहं नातिसीते बहूदओ होति नक्खत्ते ।

[८५] ससि समग पुन्निमासिं जोएंति विसमचारिणक्खत्ता ।

कडुओ बहूदओ य तमाहुं संवच्छरं चंदं ।

[८६] विसमं पवालिणो परिणमंति अनुऊसु दिंति पुप्फफलं ।

वासं न सम्म वासति तमाहुं संवच्छरं कम्मं ।

[८७] पुढविदगाणं चर रसं पुप्फफलाणं च देइ आइच्चे ।

अप्पेणवि वासेणं सम्मं निप्फज्जए सस्सं ।

[८८] आइच्चतेयतविया खणलवदिवसा उडू परिणमंति ।

पूरेति निण्णथलए तमाहु अभिवड्ढिय जाण ।

[८९] ता सणिच्छरसंवच्छरे णं अट्ठावीसइविहे पन्नत्ते तं जहा- अभीई सवणे जाव उत्तरासाढा जं वा सणिच्छरे महग्गहे तीसाए संवच्छरेहिं सव्वं नक्खत्तमंडलं समाणेइ ।

◦ दसमे पाहुडे वीसइमं पाहुडपाहुडं समत्तं ◦

◻ एकवीसइमं पाहुडपाहुडं ◻

[९०] ता कहं ते जोतिसस्स दारा आहिताति वदेज्जा तत्थ खलु इमाओ पंच पडिवत्तीओ पाहुडं-१०, पाहुडपाहुडं-२१

पन्नत्ताओ तत्थेगे एवमाहंसु-ता कत्तियादिया णं सत्त नक्खत्ता पुव्वादारिया पन्नत्ते-एगे पुण एवमाहंसु-ता महादिया णं सत्त नक्खत्ता पुव्वदारिया पन्नत्ता-एगे पुण एवमाहंसु-ता धणिट्ठादिया णं सत्त नक्खत्ता पुव्वदाहिया पन्नत्ता-एगे पुण एवमाहंसुत्ता अस्सिणीयादिया णं सत्त नक्खत्ता पुव्वदारिया

□ बावीसइमं पाहुडपाहुडं □

[९१] ता कहं ते नकखत्तविजए आहितेति वदेज्जा ता अयण्णं जंबुद्धीवे दीवे सव्वदीवसमुद्धानं सव्वब्भंतराए जाव परिकखेवेणं ता जंबुद्धीवे णं दीवे दो चंदा पभासंसु वा पभासंति वा पभासिस्संति वा दो सूरिया तविंसु वा तवेति वा तविस्संति वा छप्पन्नं नकखत्ता जोयं जोएसु वा जोएति वा जोइस्संति वा तं जहा- दो अभीई दो सवणा दो धणिद्धा दो सतभिसया दो पुव्वापोडवया दो उत्तरापोडवया दो रेवती दो अस्सिणी दो भरणी दो कत्तिया दो रोहिणी दो संठाणा दो अद्दा दो पुनव्वसू दो पुस्सा दो अस्सेसाओ दो महा दो पुव्वाफग्गुणी दो उत्तराफग्गुणी दो हत्था दो चित्ता दो साती दो विसाहा दो अनुराधा दो जेद्दा दो मूला दो पुव्वासाढा दो उत्तरासाढा ता एतेसि णं छप्पण्णाए नकखत्ताणं- अत्थि नकखत्ता जे णं नव मुहुत्ते सत्तावीसं च सत्तद्विभागे मुहुत्तस्स चंदेण सद्धिं जोयं जोएति अत्थि नकखत्ता जे णं पन्नरस मुहुत्ते चंदेणं सद्धिं जोयं जोएति अत्थि नकखत्ता जे णं तीसं मुहुत्ते चंदेणं सद्धिं जोयं जोएति अत्थि नकखत्ता जे णं पणयालीसं मुहुत्ते चंदेणं सद्धिं जोयं जोएति ता एतेसि णं छप्पण्णाए नकखत्ताणं कयरे नकखत्ताओ जे णं नव मुहुत्ते सत्तावीसंच सत्तद्विभागे मुहुत्तस्स चंदेण सद्धिंजोयं जोएति कयरे नकखत्ताजे णं पन्नरस मुहुत्ते चंदेणं सद्धिं जोयं जोएति कयरे नकखत्ता जे णं तीसं मुहुत्तेचंदेणं सद्धिं जोयं जोएति कयरे नकखत्ता जे णं पणयालीसं मुहुत्ते चंदेणं सद्धिं जोयं जोएति ता एतेसि णं छप्पण्णाए नकखत्ताणं तत्थ जेते नकखत्ताजे णं नव मुहुत्ते सत्तावीसं च सत्तद्विभागे मुहुत्तस्स चंदेणं सद्धिं जोयं जोएति ते णं दो अभीई तत्थ जेते नकखत्ता जे णं पन्नरस मुहुत्त चंदेण सद्धिं जोयं जोएति ते णं बारस तं जहा- दो सतभिसया दो भरणी दो अद्दा दो अस्सेसा दो साती दो जेद्दा तत्थ जेते नकखत्ता जे णं तीसं मुहुत्ते चंदेणं सद्धिं जोयं जोएति तेणंतीसं तं जहा- दो सवणा दो धणिद्धा दो पुव्वाभद्धवया दो रेवती दो अस्सिणी दो कत्तिया दो संठाणा दो पुस्सा दो महा दो पुव्वाफग्गुणी दो हत्था दो चित्ता दो अनुराधा दो मूला दो पुव्वासाढा तत्थ जेते नकखत्ता जे णं पणयालीसं मुहुत्ते चंदेणं सद्धिं जोयं जोएति ते णं बारस तं जहा- दो उत्तरापोडवया दो रोहिणी दो पुनव्वसू दो उत्तराफग्गुणी दो विसाहा दो उत्तरासाढा ता एतेसि णं छप्पण्णाए नकखत्ताणं-अत्थि नकखत्ता जे णं चत्तारि अहोरत्ते छच्च मुहुत्ते सूरिणं सद्धिं जोयं जोएति अत्थि नकखत्ता जे णं छ अहोरत्ते एककवीसं च मुहुत्ते सूरिण सद्धिं जोयं जोएति अत्थि नकखत्ता जे णं तेरस अहोरत्ते बारस मुहुत्ते सूरिणं सद्धिं जोयं जोएति अत्थि नकखत्ता जे णं वीसं अहोरत्ते तिण्णि य मुहुत्ते सूरिण सद्धिं जोयं जोएति ता एतेसि णं छप्पण्णाए नकखत्ताणं कयरे नकखत्ता जे णं तं चव उच्चारयव्वं ता एतेसि णं छप्पण्णाए नकखत्ताणं तत्थ जेते नकखत्ता जे णं चत्तारि अहोरत्ते छच्च मुहुत्ते सूरिण सद्धिं जोयं जोएति ते णं दो अभीई तत्थ जेते नकखत्ता जे णं छ अहोरत्ते एककवीसं च मुहुत्ते सूरिण सद्धिं जोयं जोएति ते णं बारस तं जहा- दो सतभिसया दो भरणी दो अद्दा दो अस्सेसा दो साती दो जेद्दा तत्थ जेते नकखत्ता जे णं तेरस अहोरत्ते बारस समुहुत्ते सूरिण सद्धिं जोयं जोएति ते णं तीसं तं जहा- दो सवणा जाव दो पुव्वासाढा तत्थ जेते नकखत्ताजे णं वसं अहोरत्ते तिण्णि य मुहुत्ते सूरिण सद्धिं जोयं जोएति ते णं बारस तं जहा- दो उत्तरापोडवया जाव दो उत्तरासाढा ।

[९२] ता कहं ते सीमाविकखंभे आहितेति वदेज्जा ता एतेसि णं छप्पण्णाए नकखत्ताणं- पाहुडं-१०, पाहुडपाहुडं-२२

अत्थि नक्खत्ता जेसि णं छ सता तीसा सत्तद्धिभागतीसतिभागाणं सीमाविक्खंभो अत्थि नक्खत्ता जेसि णं सहस्सं पंचोत्तरं सत्तद्धिभागतीसतिभागाणं सीमाविक्खंभो अत्थि नक्खत्ता जेसि णं तिण्णि सहस्सा पन्नरसुत्तरा सत्तद्धिभागतीसतिभागाणं सीमाविक्खंभो ता एतेसि णं छप्पण्णाए नक्खत्ताणं कयरे नक्खत्ता जेसि णं छ सत्ता तीसा तं चेव उच्चारेत्तव्वं कयरे नक्खत्ता जेसि णं तिण्णि सहस्सा पन्नरसुत्तरा सत्तद्धिभागतीसतिभागाणं सीमाविक्खंभो ता एतेसि णं छप्पण्णाए नक्खत्ताणं तत्थ जेते नक्खत्ता जेसि णं छ सता तीसा सत्तद्धिभागतीसतिभागाणं सीमाविक्खंभो ते णं दो अभीई तत्थ जेते नक्खत्ता जेसि णं सहससं पंचुत्तरं सत्तद्धिभागतीसतिभागाणं सीमाविक्खंभो ते णं बारस तं जहा- दो सतभिसया जाव दो जेद्दा तत्थ जेते नक्खत्ता जेसि णं दो सहस्सा दसुत्तरा सत्तद्धिभागतीसतिभागाणं सीमाविक्खंभो ते णं तीसं तं जहा- दो सवणा जाव दो पुव्वासाढा तत्थ जेते नक्खत्ता जेसि णं तिण्णि सहस्सा पन्नरसुत्तरा सत्तद्धिभागती-सतिभागणं सीमाविक्खंभो ते णं बारस तं जहा- दो उत्तरापोडवया जाव दो उत्तरासाढा ।

[९३] ता एतेसि णं छप्पण्णाए नक्खत्ताणं-किं सया पातो चंदेण सद्धिं जोयं जोएति किं सया सायं चंदेण सद्धिं जोयं जोएति किं सया दुहओ पविद्धित्ता-पविद्धित्ता चंदेण सद्धिं जोयं जोएति ता एतेसि णं छप्पण्णाए नक्खत्ताणं किमपि तं जं सया पातो चंदेणं सद्धिं जोयं जोएति नो सया सायं चंदेणं सद्धिं जोयं जोएति नो सया दुहओ पविद्धित्ता-पविद्धित्ता चंदेणं सद्धिं जोयं जोएति नन्नत्थ दोहिं अभीईहिं ता एतेणं दो अभीई पायंचिय-पायंचिय चोत्तालीसं-चोत्तालीसं अमावासं जोएति नो चेव णं पुन्निमासिणिं ।

[९४] तत्थ खलु इमाओ बावद्धिं पुन्निमासिणीओ बावद्धिं अमावासाओ पन्नत्ताओ ता एतेसि णं पंचण्हं संवच्छराणं पढमं पुण्णिमासिणिं चंदे कंसि देसंसि जोएति ता जंसि णं देसंसि चंदे चरिमं बावद्धि पुन्निमासिणिं जोएति ताओ पुन्निमासिणिद्वाणाओ मंडलं चउव्वीसेणं सएणं छेत्ता दुबत्तीसं भागे उवाइणावेत्ता एत्थ णं से चंदे पढमं पुन्निमासिणिं जोएति ता एतेसि णं पंचण्हं संवच्छराणं दोच्चं पुन्निमासिणिं चंदे कंसि देसंसि जोएति ता जंसि णं देसंसि चंदे पढमं पुन्निमासिणिं जोएति ताओ पुन्निमासिणिद्वाणाओ मंडलं चउवीसेणं सएणं छेत्ता दुबत्तीसं भागे उवाइणावेत्ता एत्थ णं से चंदे दोच्चं पुन्निमासिणिं जोएति ता एतेसि णं पंचण्हं संवच्छराणं तच्च पुन्निमासिणिंचंदे कंसि देसंसि जोएति ता जंसि णं देसंसि चंदे दोच्चं पुन्निमासिणिं जोएति ताओ पुन्निमासिणिद्वाणाओ मंडलं चउव्वीसेणं सएणं छेत्ता दुबत्तीसं भागे उवाइणावेत्ता एत्थ णं से चंदे तच्चपुन्निमासिणिं जोएति, ता एतेसि णं पंचण्हं संवच्छराणं दुवालसमं पुन्निमासिणिं चंदे कंसि देसंसि जोएति ता जंसि ण देसंसि चंदे तच्चं पुन्निमासिणिं जोएति ताओ पुन्निमासिणिद्वाणाओ मंडलं चउव्वीसेणं सएणं छेत्ता दोण्णि अद्दासीए भागसए उवाइणावेत्ता एत्थ णं से चंदे दुवालसमं पुन्निमासिणिं जोएति एवं खलु एतेणुवाएणं ताओ-ताओ पुन्निमासिणिद्वाणाओ मंडलं चउव्वीसेणं सएणं छेत्ता दुबत्तीसं-दुबत्तीसं भागे उवाइणावेत्ता तंसि-तंसि देसंसि तं-तं पुन्निमासिणिं चंदे जोएति, ता एतेसि णं पंचण्हं संवच्छराणं चरिमं बावद्धिं पुन्निमासिणिंचंदे कंसि देसंसि जोएति ता जंबुद्दीवस्स णं दीवस्स पाईणपडीणायताए उदीणदाहिणयताए जीवाए मंडलं चउव्वीसेणं सएणं छेत्ता दाहिणिल्लंसि चउब्भगमंडलंसि सत्तावीसं भागे उवाइणावेत्ता अद्दावीसइभागे वीसहा छेत्ता अद्दारसभागे उवाइणावेत्ता तिहिं भागेहिं दोहिं य कलाहिं पच्चत्थिमिल्लं चउब्भामंडलं असंपत्ते एत्थ णं से चंदे चरिमं बावद्धिं पुन्निमासिणिं जोएति ।

[९५] ता एतेसि णं पंचण्हं संवच्छराणं पढमं पुण्णिमासिणिं सूरे कंसि देसंसि जोएति ता पाहुडं-१०, पाहुडपाहुडं-२२

जंसि णं देसंसि सूरे चरिमं बावडिं पुन्निमासिणिं जोएति ताओ पुन्निमासिणिद्वाणाओ मंडलं चउव्वीसेणं सएणं छेत्ता दो चउणवत्तिं भागे उवाइणावेत्ता एत्थ णं सूरे पढमं पुण्णिमासिणी जोएति ता एतेसि णं पंचण्हं संवच्छराणं दोच्चं पुण्णिमासिणीं पुच्छा ता जंसि देसंसि सूरे पढमं पुन्निमासिणिं जोएति ताओ पुन्निमासिणिद्वाणाओ मंडलं चउव्वीसेणं सएणं छेत्ता दो चउणवत्तिं भागे उवाइणावेत्ता एत्थ णं से सूरे० दोच्चंपुन्निमासिणिं जोएति ता एतेसि णं पंचण्हं संवच्छराणं तच्चं पुन्निमासिणिं सूरे कंसि देसंसि जोएति ता जंसि णं देसंसि सूरे दोच्चं पुन्निमासिणिं जोएति ताओ पुन्निमा-सिणिद्वाणाओ मंडलं चउव्वीसेणं सएणं छेत्ता चउणउत्तिं भागे उवाइणावेत्ता एत्थ णं से सूरे तच्चं पुन्निमासिणिं जोएति ता एतेसि णं पंचण्हं संवच्छराणं दुवालसमं पुन्निमासिणिं सूरे कंसि देसंसि जोएति ता जंसि णं देसंसि सूरे तच्चं पुन्निमासिणिं जोएति ताओपुन्निमासिणिद्वाणाओ मंडलं चउव्वीसेणं सएणं छेत्ता अट्टछत्ताले भागसए उवाइणावेत्ता एत्थ णं से सूरेदुवालसमं पुन्निमासिणिं जोएति एवं खलु एतेणुवाएणं ताओ-ताओ पुन्निमा-सिणिद्वाणाओ मंडलं चउव्वीसेणं सएणं छेत्ता चउणउत्तिं-चउणउत्तिं भागे उवाइणावेत्ता तंसि-तंसि देसंसि तं-तं पुन्निमासिणिं सूरे जोएति ता एतेसि णं पंचण्हं संवच्छराणं चरिमं बावडिं पुण्णिमासिणिं सूरे कंसि देसंसि जोएति ता जंबुद्धीवस्स णं दीवस्स पाईणपडीणायताए उदीणदाहिणायताए जीवाए मंडलं चउव्वीसेणं सएणं छेत्ता पुरत्थिमिल्लंसि चउभागमंडलंसि सत्तावीसं भागे उवाइणावेत्ता अट्टावीसइभागे वीसहा छेत्ता अट्टारसभागे उवाइणावेत्ता तिहिं भागेहिं दोहि य कलाहिं दाहिणिल्लं चउभागमंडलं असंपत्ते एत्थ णं से सूरे चरिमं बावडिं पुन्निमासिणिं जोएति ।

[९६] ता एतेसि णं पंचण्हं संवच्छराणं पढमं अमावासं चंदे कंसि देसंसि जोएति ता जंसि णं देसंसि चंदे चरिमबावडिं अमावासं जोति ताओ अमावासद्वाणाओ मंडलं चउव्वीसेणंसएणं छेत्ता दुबत्तीसं भागे उवाइणावेत्ता एत्थ णं से चंदे पढमं अमावासंजोएति एवं जेणेव अभिलावेणं चंदस्स पुन्निमासिणीओ भणिताओ तेणेव अभिलावेणं अमावासाओवि भणितव्वाओ तं जहा- बिइया तइया दुवालसमी एवं खलु एतेणुवाएणं ताओ-ताओ अमावासद्वाणाओ मंडलं चउव्वीसेणं सएणं छेत्ता दुबत्तीसं-दुबत्तीसं भागे उवाइणावेत्ता तंसि-तंसि देसंसि तं-तं अमावासं चंदे जोएति ता एतेसि णं पंचण्हं संवच्छराणं चरिमं बावडिं अमावासं चंदे कंसि देसंसि जोएति ता जंसि णं देसंसि चंदे चरिमं बावडिं पुन्निमासिणिं जोएति ताओ-ताओ पुन्निमासिणिद्वाणाओ मंडलं चउव्वीसेणं सएणं छेत्ता सोलसभागे ओसक्कइत्ता एत्थ णं से चंदे चरिमं बावडिं अमावासं जोएति ।

[९७] ता एतेसि णं पंचण्हं संवच्छराणं पढमं अमावासं सूरे कंसि देसंसि जोएति ता जंसि णं देसंसि सूरे चरिमं बावडिं अमावासं जोएति ताओ अमावासद्वाणाओ मंडलं चउव्वीसेणं सएणं छेत्ता चउणउत्तिं भागे उवाइणावेत्ता एत्थ णं से सूरे पढमं अमावासं जोएति एवं जेणेव अभिलावेणं सूरस्स पुन्निमासिणीओ भणियाओ तेणेव अभिलावेणं अमावासओवि भणितव्वाओ तं जहा- बिइया तइया दुवालसमी एवं खलु एतेणुवाएणं ताओ अमावासद्वाणाओ मंडलं चउव्वीसेणं सएणं छेत्ता चउणउत्तिं-चउणउत्तिं भागे उवाइणावेत्ता तंसि-तंसि देसंसि तं-तं अमावासं सूरे जोएति ता एतेसि णं पंचण्हं संवच्छराणं चरिमं बावडिं अमावासं पुच्छा ता जंसि णं देसंसि सूरे चरिमं बावडिं पुन्निमासिणिं जोएति

ताओ पुन्निमासिणिद्वाणाओ मंडलं चउव्वीसेणं सएणं छेत्ता सत्तालीसं भागे ओसक्कइत्ता एत्थ णं से सूरे चरिमं बावट्ठि अमावासं जोएति ।

पाहुडं-१०, पाहुडपाहुडं-२२

[९८] ता एतेसि णं पंचण्हं संवच्छराणं पढमं पुन्निमासिणिं चंदे केणं नक्खत्तेणं जोएति ता धणिद्वाहिं धणिद्वाहिं तिण्णि मुहुत्ता एगूणवीसं च बावट्ठिभागा मुहुत्तस्स बावट्ठिभागं च सत्तट्ठिधा छेत्ता पन्नट्ठिं चुण्णिया भागा सेसा तं समयं च णं सूरे केणं नक्खत्तेणं जोएति ता पुव्वाफग्गुणीहिं पुव्वाफग्गुणीणं अद्वावीसं मुहुत्ता अद्दत्तीसं च बावट्ठिभागा मुहुत्तस्स बावट्ठिभागं च सत्तट्ठिधा छेत्ता दुबत्तीसं चुण्णिया भागा सेसा ता एतेसि णं पंचण्हं संवच्छराणं दोच्चं पुन्निमासिणिं चंदे केणं नक्खत्तेणं जोएति ता उत्तराहिं पोद्दवयाहिं उत्तराणं पोद्दवयाणं सत्तावीसं मुहुत्ता चोद्दस य बावट्ठिभागे मुहुत्तस्स बावट्ठि-भागं च सत्तट्ठिधा छेत्ता बावट्ठिं चुण्णिया भागा सेसा तं समयं च णं सूरे केणं नक्खत्तेणं जोएति ता चित्ताहिं चित्ताणं एक्को मुहुत्तो अद्वावीसं च बावट्ठिभागा मुहुत्तस्स बावट्ठिभागं च सत्तट्ठिधा छेत्ता तीसं चुण्णिया भागा सेसा ता एतेसि णं पंचण्हं संवच्छराणं दुवालसमं पुन्निमासिणिं चंदे केणं नक्खत्तेणं जोएति ता उत्तराहिं आसाढाहिंउत्तराणं आसाढाणं छव्वीसं मुहुत्ता छव्वीसं च बावट्ठि-भागा मुहुत्तस्स बावट्ठिभागं च सत्तट्ठिधा छेत्ता चउप्पन्नं चुण्णियाभागा सेसा तं समयं च णं सूरे केणं नक्खत्तेणं जोएति ता पुणव्वसुणा पुणव्वसुस्स सोलस मुहुत्ता अद्द य बावट्ठिभागा मुहुत्तस्स बावट्ठिभागं च सत्तट्ठिधा छेत्ता वीसं चुण्णिया भागा सेसा ता एतेसि णं पंचण्हं संवच्छराणं चरिमं बावट्ठिं पुन्निमासिणिं चंदे केणं नक्खत्तेणं जोएति ता उत्तराहिं आसाढाहिं उत्तराणं आसाढाणं चरमसमए तं समयं च णं सरे केणं नक्खत्तेणं जोएति ता पुस्सेणं पुस्सस्स एगूणवीसं मुहतात तेयालीसं च बावट्ठिभागा मुहुत्तस्स बावट्ठिभागं च सत्तट्ठिया छेत्ता तेत्तीसं चुण्णिया भागा सेसा ।

[९९] ता एतेसि णं पंचण्हं संवच्छराणं पढमं अमावासं चंदे केणं नक्खत्तेणं जोएति ता अस्सेसाहिं अस्सेसाणं एक्के मुहुत्ते चत्तालीसं च बावट्ठिभागा मुहुत्तस्स बावट्ठिभागं च सत्तट्ठिधा छेत्ता बावट्ठिं चुण्णिया भागा सेसा तं समयं च णं सूरे केणं नक्खत्तेणं जोएति ता अस्सेसाहिं चैव अस्सेसाण एक्को मुहुत्तो चत्तालीसं चबावट्ठिभागा मुहुत्तस्स बावट्ठिभागं च सत्तट्ठिधा छेत्ता बावट्ठि चुण्णिया भागा सेसा ता एतेसि णं पंचण्हं संवच्छराणं दोच्चं अमावासं चंदे केणं नक्खत्तेणं जोएति ता उत्तराहिं फग्गुणीहिं उत्तराणं फग्गुणीणं चत्तलीसं मुहुत्ता पणतीसं बावट्ठिभागा मुहुत्तस्स बावट्ठिभागं च सत्तट्ठिधा छेत्ता पन्नट्ठिं चुण्णिया भागा सेसा तं समयं च णं सूरे केणं नक्खत्तेणं जोएति ता उत्तराहिं चैव फग्गुणीहिं उत्तराणं फग्गुणीणंजहेव चंदस्स ता एतेसि णं पंचण्हं संवच्छराणं तच्चं अमावासं चंदे केणं नक्खत्तेणं जोएति ता हत्थेणं चैव हत्थस्स जहा चंदस्स ता एतेसि णं पंचण्हं संवच्छराणं दुवालसमं अमावासं चंदे केणं नक्खत्तेणं जोएति ता अद्दाहिं अद्दाणं चत्तारि मुहुत्ता दस यबावट्ठिभागा मुहुत्तस्स बावट्ठिभागं च सत्तट्ठिधा छेत्ता चउप्पन्नं चुण्णिया भागा सेसा तं समयं च णं सूरे केणं नक्खत्तेणं जोएति ता अद्दाहिं चैव अद्दाणं जहा चंदस्स ता एतेसि णं पंचण्हं संवच्छराणं चरिमं बावट्ठिं अमावासं चंदे केणं नक्खत्तेणं जोएति ता पुनव्वसुणा पुणव्वसुस्स बावीसं मुहुत्ता बायालीसं च बासट्ठिभागा मुहुत्तस्स सेसा तं समयं च णं सूरे केणं नक्खत्तेणं जोएति ता पुनव्वसुणा चैव पुनव्वसुस्स णं जहा चंदस्स ।

[१००] ता जेणं अज्ज नक्खत्तेणं चंदे जोयं जोएति जंसि देसंसि से णं इमाइं अद्द एगूण-वीसाइं मुहुत्तसयाइं चउव्वीसं च बावट्ठिभागे मुहुत्तस्स बावट्ठिभागं च सत्तट्ठिधा छेत्ता बावट्ठि चुण्णिया

भागे उवाङ्णावेत्ता पुणरवि से चंदे अण्णेणं सरिसएणं चेव नक्खत्तेणं जोयं जोएति अण्णं देसंसि ता जेणं अज्ज नक्खत्तेणं चंदे जोयं जोएति जंसि देसंसि से णं इमाइं सोलस अट्ठतीसं मुहुत्तसयाइं अउणापन्नं च पाहुडं-१०, पाहुडपाहुडं-२२

बावट्ठीभागे मुहुत्तस्स बावट्ठीभागं च सत्तट्ठिधा छेत्ता पन्नट्ठिं चुण्णिया भागे उवाङ्णावेत्ता पुणरवि से चंदे तेणं चेव नक्खत्तेणं जोयं जोएति अण्णंसि देसंसि ता जेणं अज्ज नक्खत्तेणं चंदे जोयं जोएति जंसि देसंसि से णं इमाइं चउप्पन्नं मुहुत्तसहस्साइं नव य मुहुत्तसयाइं उवाङ्णावेत्ता पुणरवि से चंदे अण्णेणं तारिसएणं चेव नक्खत्तेणं जोयं जोएति तंसि देसंसि ता जेणं अज्ज नक्खत्तेणं चंदे जोयं जोएति जंसि देसंसि से णं इमं एगं मुहुत्तसयहस्सं अट्ठाणउतिं च मुहुत्तसताइं उवाङ्णावेत्ता पुणरवि से चंदे तेणंचेव नक्खत्तेणं जोयं जोएति तंसि देसंसि ता जेण अज्ज नक्खत्तेणं सूरे जोयं जोएति जंसि देसंसि से णं इमाइं तिण्णि छावट्ठाइं राइंदियसयाइं उवाङ्णावेत्ता पुणरवि से सूरे अण्णेणं तारिसएणं चेव नक्खत्तेणं जोयं जोएति तंसि देसंसि ता जेणं अज्ज नक्खत्तेणं सूरे जोयं जोएति तंसि देसंसि से णं इमाइं सत्तदुवतीसं राइंदियसयाइं उवाङ्णावेत्ता पुणरवि से सूरे तेणं चेव नक्खत्ते जोयं जोएति तंसि देसंसि ता जेणं नक्खत्तेणं सूरे जोयं जोएति जंसि देसंसि से णं इमाइं अट्ठारस वीसाइं राइंदियसयाइं उवाङ्णावेत्ता पुणरवि से सूरे अण्णेणं तारिसएणं चेव नक्खत्तेणंजयं जोएति तंसि देसंसि ता जेणं अज्ज नक्खत्तेणं सूरे जोयं जोएति जंसि देसंसि से णं इमाइं छत्तीसं सट्ठाइं राइंदियसाइं उवाङ्णावेत्ता पुणरवि से सूरे तेणं चेव नक्खत्तेणं जोयं जोएति तंसि देसंसि ।

[१०१]ता जया णं इमे चंदे गतिसमावण्णए भवइ तया णं इयरेवि चंदे गतिसमावण्णए भवइ जया णं इयरे चंदे गतिसमावण्णए भवइ तया णं इमेवि चंदे गतिसमावण्णए भवइ ता जया णं इमे सूरिए गतिसमावण्णे भवइ तया णं इयरेवि सूरिए गतिसमावण्णे भवइ जया णं इयरे सूरिए गतिसमावण्णे भवइ तया णं इमेवि सूरिए गतिसमावण्णे भवइ एवं गहेवि नक्खत्तेवि ता जया णं इमे चंदे जुत्तेजोगेणं भवइ तया णं इयरेवि चंदे जुत्ते जोगेणं भवइ जया णं इयरे चंदे जुत्ते जोगेणं भवइ तया णं इमेवि चंदे जुत्ते जोगेणं भवइ एवं सूरेवि गहेवि नक्खत्तेवि, सयावि णं चंदा जुत्ता जोगेहिं सयावि णं सूरा जुत्ता जोगेहिं सयावी णं गहा जुत्ता जोगेहिं सयावि णं नक्खत्ता जुत्ता जोगेहिं दुहतोवि णं चंदा जुत्ता जोगेहिं दुहतोवि णं सूरा जुत्ता जोगेहिं दुहतोविं णं गहा जुत्ता जोगेहिं दुहतोवि णं नक्खत्ताजुत्ता जोगेहिं मंडलं सयसहस्सेणं अट्ठाणउयाए सएहिं छेत्ता इच्चेस नक्खत्ते खेत्तपरिभागे नक्खत्तविजए पाहुडे आहितेत्ति बेमि ।

• मुनि दीपरत्नसागरेण संशोधितः सम्पादित्तश्च दसमं पाहुडं समत्तं •

[] एक्कारसमं पाहुडं []

[१०२]ता कहं ते संवच्छराणादी आहितेति वदेज्जा तत्थ खलु इमे पंच संवच्छरा पन्नत्ता तं जहा- चंदे चंदे अभिवड्ढितेचंदे अभिवड्ढिते ता एतेसि णं पंचण्हं संवच्छराणं पढमस्स चंदसंवच्छरस्स सेआदी आहितेति वदेज्जा ता जे णं पंचमस्स अभिवड्ढितसंवच्छरस्स पज्जवसाणे से णं पढमस्स चंदसंवच्छरस्स आदी अनंतरपुरक्खडे समए ता से णं किं पज्जवसिते आहितेति वदेज्जा ता जे णं दोचस्स चंदसंवच्छरस्स आदी से णं पढमस्स चंदसंवच्छरस्स पज्जवसाणे अनंतरपच्छाकडे समए तं समयं च णं चंदे केणं नक्खत्तेणं जोएति ताउत्तराहिं आसाढाहिं उत्तराणं आसाढाणं छदुवीसं मुहुत्ता छदुवीसं च

बावट्टि-भागा मुहुत्तस्स बावट्टिभागा च सत्तट्टिधा छेत्ता चउप्पन्नं चुण्णिया भागा सेसा तंसमयं च णं सूरे केणं नक्खत्तेणं जोएति ता पुणव्वसुणा पुणव्वसुस्स सोलसमुहुत्ता अट्ट य बावट्टिभागा मुहुत्तस्स बावट्टिभागं च सत्तट्टिधा छेत्ता वीसं चुण्णिया भागा सेसा ता एतेसि णं पंचण्हं संवच्छराणं दोच्चस्सचंदसंवच्छरस्स के पाहुडं-११

आदी आहितेति वदेज्जा ता जे णं पढमस्स चंदसंवच्छरस्स पज्जवसाणे से णंदोच्चस्स चंदसंवच्छरस्स-आदी अनंतरपुक्खडे समए ता से णं किं पज्जवसिते आहितेति वदेज्जा ता जे णं तच्चस्स अभिवड्ढित-संवच्छरस्स आदी से णं दोच्चस्स चंदसंवच्छरस्सपज्जवसाणे अनंतरपच्छाकडे समएतं समयं च णं चंदे केणं नक्खत्तेणं जोएति ता पुव्वाहिं आसाढाहिंपुव्वाणं आसाढाणं सत्त मुहुत्ता तेवण्णंच बावट्टिभागा मुहुत्तस्स बावट्टिभागं च सत्तट्टिधा छेत्ता इगतालीसं चुण्णिया भागा सेसा तं समयं च णं सूरे केणं नक्खत्तेणं जोएति ता पुणव्वसुणा पुणव्वसुस्स णं बायालीसं मुहुत्ता पणतीसंचबावट्टिभागा मुहुत्तस्स बावट्टिभागं च सत्तट्टिधा छेत्ता सत्त चुण्णिया भागा सेसा, ता एतेसि णं पंचण्हं संवच्छराणं तच्चस्स अभिवड्ढितसंवच्छरस्स के आदि आहितेति वदेज्जा ताजे णं दोच्चस्स चंदसंवच्छरस्स पज्जवसाणे से णं तच्चस्स अभिवड्ढितसंवच्छरस्स आदी अनंतरपुरक्खडे समए ता से णं किं पज्जवसिते आहितेति वदेज्जा ता जे णं चउत्थस्स चंदसंवच्छरस्स आदी से णं तच्चस्स अभिवड्ढितसंवच्छरस्स पज्जवसाणे अनंतर-पच्छाकडे समए तं समयं णं चंदे केणं नक्खत्तेणं जोएति ता उत्तराहिं आसाढाहिं उत्तराणं आसाढाणं तेरस मुहुत्ता तेरस य बावट्टिभागा मुहुत्तस्स बावट्टिभागं च सत्तट्टिधा छेत्ता सत्तावीसं चुण्णिया भागा सेसा तं समयं च णं सूरे केणं नक्खत्तेणं जोएति ता पुणव्वसुणा पुणव्वसुस्स दोमुहुत्ता छप्पन्नं च बावट्टिभागा मुहुत्तस्स बावट्टिभागं च सत्तट्टिधा छेत्ता सट्ठी चुण्णिया भागा सेसा ता एतेसि णं पंचण्हं संवच्छराणं चउत्थस्स चंदसंवच्छरस्स के आदी आहितेति वदेज्जा ता जे णं तच्चस्स अभिवड्ढि-तसंवच्छरस्स पज्जवसाणे से णं चउत्थस्स चंदसंवच्छरस्स आदी अनंतरपुरक्खडे समए ता से णं किं पज्जवसिते आहितेति वदेज्जा ता जे णं चरिमस्स अभिवड्ढितसंवच्छरस्स आदी से णं चउत्थस्स चंदसंवच्छरस्स पज्जवसाणे अनंतरपच्छाकडे समए तं समयं च णं चंदे केणं नक्खत्तेणं जोइते ता उत्तराहिं आसाढाहिं उत्तराणं आसाढाणं ऊतालीसं मुहुत्ता चत्तालीसं च बावट्टिभागा मुहुत्तस्स बावट्टिभागं च सत्तट्टिधा छेत्ता चउदस चुण्णिया भागा सेसा तं समयं च णं सूरे केणं नक्खत्तेणं जोएति ता पुणव्वसुण पुणव्वसुस्स अउणतीसं मुहुत्ता एककवीसं बावट्टिभागां मुहुत्तस्स बावट्टिभागं च सत्तट्टिधा छेत्ता सीतालीसं चुण्णिया भागा सेसा ता एतेसि णं पंचण्हं संवच्छराणं पंचमस्स अभिवड्ढितसंवच्छरस्स के आदी आहितेति वदेज्जा ता जे णं चउत्थस्स चंदसंवच्छरस्स पज्जवसाणे से णं पंचमस्स अभिवड्ढितसंवच्छरस्स आदी अनंतरपुरक्खडे समए ता से णं किं पज्जवसिते आहितेति वदेज्जा ता जे णं पढमस्स चंदसंवच्छरस्सआदी से णं पंचमस्स अभिवड्ढितसंवच्छरस्स पज्जवसाणे अनंतरपच्छाकडे समए तं समयंच ण चंदे केणं नक्खत्तेणं जोएति ता उत्तराहिं आसाढाहिं उत्तराणं आसाढाणं चरिमसमए तं समयं च णं सूरे केणं नक्खत्तेणं जोएति ता पुस्सेणं पुस्सस्स णं एककवीसं मुहुत्ता तेतालीसं च बावट्टिभागा मुहुत्तस्स बावट्टिभागं च सत्तट्टिधा छेत्ता तेत्तीसं चुण्णिया भागा सेसा ।

◦ मुनि दीपरत्नसागरेण संशोधितः सम्पादित्तश्च एक्कारसमं पाहुडं समत्तं ◦

□ बारसमं पाहुडं □

[१०३] ता कति णं संवच्छरा आहिताति वदेज्जा तत्थ खलु इमे पंच संवच्छरा पन्नत्ता तं जहा- नक्खत्ते चंदे उडू आदिच्चे अभिवड्ढिते ता एतेसि णं पंचण्हं संवच्छराणं पढमस्स नक्खत्तसंवच्छरस्स नक्खत्तमासे तीसइमुहुत्तेणं अहोरत्तेणं मिज्जमाणे केवतए राइंदियग्गेणं आहितेति वएज्जा ता सत्तावीसं पाहुडं-१२

राइंदियाइं एक्कवीसं च सत्तद्विभागा राइंदियस्स राइंदियग्गेणं आहितेवि वदेज्जा ता से णं केवतिए मुहुत्तग्गेणं आहितेतिवदेज्जा ता अडुसए एगूणवीसे मुहुत्ताणं सत्तावीसं च सत्तद्विभागे मुहुत्तस्स मुहुत्तग्गेणं आहितेति वदेज्जा ता एस णं अद्धा दुवालसक्खुत्तकडा नक्खत्ते संवच्छरे,

ता से णं केवतिए राइंदियग्गेणं० ता तिण्णि सत्तावीसे राइंदियसतं एक्कावण्णं च सत्तद्विभागे राइंदियस्स राइंदियग्गेण आहितेति वदेज्जा ता से णं केवतिए मुहुत्तग्गेणं० ता नव मुहुत्तसहस्साइं अडु य बत्तीसे मुहुत्तसए छप्पन्नं च सत्तद्विभागे मुहुत्तस्स मुहुत्तग्गेणं आहितेति वदेज्जा ता एतेसि णं पंचण्हं संवच्छराणं दोच्चस्स चंदसंवच्छरस्स चंदे मासे तीसतिमुहुत्तेण अहोरत्तेणं गणिज्जमाणे केवतिए राइंदियग्गेणं० ता एगूणतीसं राइंदियाइं बत्तीसं बावद्विभागा राइंदियस्स राइंदियग्गेणं आहितेति वदेज्जा ता से णं केवतिए मुहुत्तग्गेणं० ता अडुपंचासते मुहुत्ते तेत्तीसं च छावद्विभागे मुहुत्तग्गेणं आहितेति वदेज्जाता एस णं अद्धा दुवालसक्खुत्तकडा चंदे संवच्छरेता से णं केवतिए राइंदियग्गेणं० ता तिण्णि चउप्पन्ने राइंदियसते दुवालस य बावद्विभागा राइंदियग्गेणं आहितेति वदेज्जा तासेणं केवतिए मुहुत्तग्गेणं० ता दस मुहुत्तसहस्साइं छच्च पणवीसे मुहुत्तसते पन्नासं च बावद्विभागे मुहुत्तग्गेणं आहितेति वदेज्जा ता एतेसि णं पंचण्हं संवच्छराणं तच्चस्स उडुसंवच्छरस्स उडुमासे तीसतिमुहुत्तेणं अहोरत्तेणं गणिज्जमाणे केवतिए राइंदियग्गेणं० ता तीसं राइंदियाणं राइंदियग्गेणं आहितेति वदेज्जा

ता से णं केवतिए मुहुत्तग्गेणं ता नव मुहुत्तसताइं मुहुत्तग्गेणं आहितेति वदेज्जा ता एस णं अद्धा दुवालसक्खुत्तकडा उडू संवच्छरे ता से णं केवतिए राइंदियग्गेणं० ता तिण्णि सट्ठे राइंदियसते राइंदियग्गेण आहितेति वदेज्जा

ता से णं केवतिए मुहुत्तग्गेणं० ता दस मुहुत्तसहस्साइं अडु मुहुत्तसताइं मुहुत्तग्गेणं आहितेति वदेज्जा ता एतेसि णं पंचण्हं संवच्छराणं चउत्थस्स आदिच्चसंवच्छरस्स आदिच्चे मासे तीसतिमुहुत्तेणं अहोरत्तेणं गणिज्जमाणे केवतिए राइंदियग्गेणं०

ता तीसं राइंदियइं अवड्ढभागं च राइंदियस्स राइंदियग्गेणं आहितेति वदेज्जा ता सेणं केवतिए मुहुत्तग्गेणं ता नव पन्नरस मुहुत्तसए मुहुत्तग्गेणं आहितेति वदेज्जा

ता एस णं अद्धा दुवालसक्खुत्तकडा आदिच्चे संवच्छरे ता से णं केवतिए राइंदियग्गेणं० ता तिण्णि छावट्ठे राइंदियसए राइंदियग्गेणं आहितेति वदेज्जा ता से णं केवतिए मुहुत्तग्गेणं आहितेति वदेज्जा ता दस मुहुत्तस्स सहस्साइं नव असीते मुहुत्तसते मुहुत्तग्गेणं आहितेति वदेज्जा ता एस णं अद्धा दुवालसक्खुत्तकडा अभिवड्ढितसंवच्छरे

ता से णं केवतिए राइंदियग्गेणं ता तिण्णि तेसीते राइंदियसते एक्कवीसं च मुहुत्ता अद्वारस बावड्ढिभागेमुहुत्तस्स राइंदियग्गेणं आहितेति वदेज्जा ता से णं केवतिए मुहुत्तग्गेणं आहितेति वदेज्जा ता एक्कारस मुहुत्तसहस्साइं पंच य एक्कारस मुहुत्तसते अद्वारस बावड्ढिभागे मुहुत्तस्स मुहुत्तग्गेणं आहितेति वदेज्जा ।

[१०४] ता केवतियं ते नोजुगे राइंदियग्गेणं आहितेति वदेज्जा ता सत्तरस एक्काणउते राइंदियसते एगूणवीसं च मुहुत्ते सत्तावण्णे बावड्ढि-भागे मुहुत्तस्स बावड्ढि-भागं च सत्तड्ढिधा छेत्ता पणपन्नं चुण्णिया भागा राइंदियग्गेणं आहितेति वदेज्जा ता से णं केवतिए मुहुत्तग्गेणं आहितेति वदेज्जा पाहुडं-१२

ता तेपण्णमुहुत्तसहस्साइं सत्तय अउणापन्ने मुहुत्तसते सत्तावण्णं बावड्ढिभागे मुहुत्तस्स बावड्ढिभागं च सत्तड्ढिधा छेत्ता पणपन्नं चुण्णिया भागा मुहुत्तेणं आहितेति वदेज्जा

ता केवतिए णं ते जुगप्पत्ते राइंदियग्गेणं आहितेति वदेज्जा ता अद्वतीसं राइंदियइं दस य मुहुत्ता चत्तारि य बावड्ढिभागे मुहुत्तस्स बावड्ढिभागं च सत्तड्ढिधा छेत्ता दुवालस चुण्णिया भागा राइंदिय-ग्गेणं आहितेति वदेज्जा

ता से णं केवतिए मुहुत्तग्गेणं आहितेति वदेज्जाता एक्कारस पन्नासे मुहुत्तसते चत्तारि य बावड्ढिभागे बावड्ढिभागं च सत्तड्ढिधा छेत्ता दुवालसचुण्णिया भागा मुहुत्तग्गेणं आहितेति वदेज्जा

ता केवतियं जुगे राइंदियग्गेणं आहितेति वदेज्जा ता अद्वारसतीसे राइंदियसते राइंदियग्गेणं आहितेति वदेज्जा

ता से णं केवतिए मुहुत्तग्गेणं आहितेति वदेज्जा ता चउप्पन्नं मुहुत्तसहस्साइं नव य मुहुत्तसताइं मुहुत्तग्गेणं आहितेति वदेज्जाता से णं केवतिए बावड्ढिभागमुहुत्तग्गेणं आहितेति वदेज्जा ता चउत्तीसं सयसहस्साइं अद्वतीसं च बावड्ढिभागमुहुत्तसते बावड्ढिभागमुहुत्तग्गेणं आहितेति वदेज्जा ।

[१०५] ता कया णं एते आदिच्चचंदा संवच्छरा समादीया समपज्जवसिया आहितेति वदजेजा ता सड्ढिं एते आदिच्चमासा बावड्ढिं एते चंदमासा एस णं अद्दा छक्खुत्तकडा दुवासभइत्ता तीसं एते आदिच्चसंवच्छरा एक्कतीसं एते चंदसंवच्छरा तया णं एते आदिच्चचंदसंवच्छरा समादीया समपज्जवसिया आहिताति वदेज्जा

ता कया णं एते आदिच्चउडुचंदनक्खत्ता संवच्छरा समादीया समपज्जवसिया आहिताति वदेज्जा ता सड्ढिं एते आदिच्चा मासा एगड्ढिं एते उडू मासा बावड्ढि एते चंदा मासा सत्तड्ढिं एते नक्खत्ता मासा एस णं अद्दा दुवालसक्खुत्तकडा दुवालसभइता सड्ढिं एते आदिच्चा संवच्छरा एगड्ढिं एते उडू संवच्छरा बावड्ढि एते चंदा संवच्छरा सत्तड्ढि एते नक्खत्ता संवच्छरा

तया णं एते आदिच्चउडु-चंदनक्खत्ता संवच्छरा समादीया समपज्जवसिया आहिताति वदेज्जा ता कया णं एते अभिवड्ढित-आदिच्चउडुचंदणक्खत्ता संवच्छरा समादीया समपज्जवसिया आहितातिवदेज्जा ता सत्ता-वण्णं मासा सत्त य अहोरत्ता एक्कारस य मुहुत्ता तेवीसं बावड्ढिभागा मुहुत्तस्स

एते अभिवड्ढित्ता मासा सडिं एते आदिच्चा मासा एगडिं एते उडू मासा बावडिं एते चंदमासा सत्तडिं एते नक्खत्तमासा

एस णं अद्धा छप्पन्न-सतकखुत्तकडा दुवालसभइता सत्त सता चोताला एते णं अभिवड्ढित्ता संवच्छरा सत्त सता असीता

एते णं आदिच्चा संवच्छरा सत्त सता तेणउता एते णं उडू संवच्छरा अड्ड सता छलुत्तरा

एते णं चंदा संवच्छरा अड्ड सता एगसत्तरा एते णं नक्खत्ता संवच्छरा

तया णं एते अभिवड्ढित्ता आदिच्चउडुचंदनक्खत्ता संवच्छरा समादीया समपज्जवसिया आहिताति वदेज्जा ता नयड्डयाए णं चंदे संवच्छरे तिण्णि चउप्पन्ने राइंदियसते दुवालस य बावडिभागे राइंदियस्स आहितेति वदेज्जा

ता अधातच्चेणं चंदे संवच्छरे तिण्णि चउप्पन्ने रायंदियसते पंच य मुहुत्ते च बावडिभागे मुहुत्तस्स आहितेति वदेच्चा ।

पाहुडं-१२

[१०६] तत्थ खलु इमे छ उडू पन्नत्ता तं जहा- पाउसे वरिसारत्ते सरदे हेमंते वसंते गिम्हे ता सव्वेवि णं एते चंदउडू दुवे-दुवे मासाति चउप्पण्णेणं-चउप्पण्णेणं आदाणेणं गणिज्जमाणा सातिरेगाइं एगूणसडिं-एगूणसडिं राइंदियाइं राइंदियग्गेणं आहितेति वदेज्जा

तत्थ खलु इमे छ ओमरत्ता पन्नत्ता तं जहा- ततिएपव्वे सत्तमेपव्वे एक्कारसमेपव्वे पन्नरसमेपव्वे एगूणवीसतिमेपव्वे तेवीसतिमेपव्वे तत्थ खलु इमे छ अइरत्ता तं जहा- चउत्थेपव्वे अड्डमेपव्वे बारसमेपव्वे सोलसमेपव्वे वीसतिमेपव्वे चउवीसतिमेपव्वे।

[१०७] छच्चेव य अइरत्ता आदिच्चाओ हवंति माणाहिं

।

छच्चेव ओमरत्ता चंदाओ हवंति माणाहिं ।

[१०८] तत्थ खलु इमाओ पंच वासिकीओ पंच हेमंतीओ आउट्टीओ पन्नत्ताओ

ता एतेसि णं पंचण्हं संवच्छराणं पढमं वासिकिं आउट्टिं चंदे केणं नक्खत्तेणं जोएति ता अभीइणा अभीइस्स पढमसमए तं समयं च णं सूरे केणं नक्खत्तेणं जोएति ता पूसेणं पूसस्सएगूणवीसंमुहुत्ता तेत्तालीसं च बावडिभागा मुहुत्तस्स बावडिभागं च सत्तडिधा छेत्ता तेत्तीसं चुण्णिया भागा सेसा

ता एतेसि णं पंचण्हं संवच्छराणं दोच्चं वासिकिं आउट्टिं चंदे केणं नक्खत्तेणं जोएति ता संठाणाहिं संठाणाणं एक्कारस मुहुत्ता ऊतालीसं च बावडिभागा च सत्तडिधा छेत्ता तेपन्नं चुण्णिया भागा सेसा तं समयं च णं सूरे केणं नक्खत्तेणं जोएति ता पूसेणं पूसस्स णं तं चव जं पढमाए

ता एतेसि णं पंचण्हं संवच्छराणं तच्चं वासिकिं आउट्टिं चंदे केणं नक्खत्तेणं जोएति ता विसाहाहिं विसाहाणं तेरस मुहुत्ता चउप्पन्नं च बावडिभागा मुहुत्तस्स बावडिभागं च सत्तडिधा छेत्ता चत्तालीसं चुण्णिया भागा सेसा तं समयं च णं सूरे केणं नक्खत्तेणं जोएति ता पूसेणं पूसस्स तं चव

ता एतेसि णं पंचण्हं संवच्छराणं चउत्थिं वासिकिं आउट्टिं चंदे केणं नक्खत्तेणं जोएति ता रेवतीहिं रेवतीणं पणवीसं मुहुत्ता दुबत्तीसं चबावडिभागा सेसा मुहुत्तस्स बावडिभागं च सत्तडिभागा छेत्ता छव्वीसं चुण्णिया भागा सेसा तं समयं च णं सूरे केणं नक्खत्तेणं जोएति ता पूसेणं पूसस्स तं चव

ता एतेसि णं पंचण्हं संवच्छराणं पंचमं वासिकिंआउट्टिं चंदे केणं नक्खत्तेणं जोएति ता पुव्वाहिं फग्गुणीहिं पुव्वाणं फग्गुणीणं बारस मुहुत्ता सत्तालीसं च बावट्ठिभागा मुहुत्तस्स बावट्ठिभागं च सत्तट्ठिधा छेत्ता तेरस चुण्णिया भागा सेसा तं समयं च णं सूरे केणं नक्खत्तेणं जोएति ता पूसेणं पूसस्स तं चेव ।

[१०९]ता एतेसि णं पंचण्हं संवच्छराणं पढमं हेमंति आउट्टिं चंदे केणं नक्खत्तेणं जोएति ता हत्थेणं हत्थस्स णं पंच मुहुत्ता पन्नासं च बावट्ठिभागा मुहुत्तस्स बावट्ठिभागं सत्तट्ठिधा छेत्ता सट्ठिं चुण्णिया भागा सेसा तं समयं च णं सूरे केणं नक्खत्तेणं जोएति ता उत्तराहिं आसाढाहिं उत्तराणं आसाढाणं चरिमसमए

ता एतेसि णं पंचण्हं संवच्छराणं दोच्चं हेमंति आउट्टिं चंदे केणं नक्खत्तेणं जोएति ता सतभिसयाहिं सतभिसयाणं दुण्णि मुहुत्ता अट्ठावीसं च बावट्ठिभागा मुहुत्तस्स बावट्ठिभागं च सत्तट्ठिधा छेत्ता छत्तालीसं चुण्णिया भागा सेसा

तं समयं च णं सूरे केणं नक्खत्तेणं जोएति ता उत्तराहिं आसाढाहिं पाहुडं-१२

उत्तराणं आसाढाणं चरिमसमए ता एतेसि णं पंचण्हं संवच्छराणं तच्चं हेमंति आउट्टिं चंदे केणं नक्खत्तेणं जोएति ता पूसेणं पूसस्स एग्गुणीसं मुहुत्ता तेतालीसं च बावट्ठिभागा मुहुत्तस्स बावट्ठिभागं च सत्तट्ठिधा छेत्ता तेत्तीसं चुण्णिया भागा सेसा तं समयं च णं सूरे केणं नक्खत्तेणं जोएति ता उत्तराहिं आसाढाहिं उत्तराणं आसाढाणं चरिमसमए ता एतेसि णं पंचण्हं संवच्छराणं चउत्थिं हेमंति आउट्टिं चंदे केणं नक्खत्तेणं जोएति ता मूलेणं मूलस्सछमुहुत्ता अट्ठावण्णं च बावट्ठिभागा मुहुत्तस्स बावट्ठिभागं च सत्तट्ठिधा छेत्ता वीसं चुण्णिया भागा सेसा तं समयं च णं सूरे केणं नक्खत्तेणं जोएति ता उत्तराहिं आसाढाहिं उत्तराणं आसाढाणं चरिमसमए ता एतेसि णं पंचण्हं संवच्छराणं पंचमिं हेमंति जाव जोएति पुच्छा ता कत्तियाहिं कत्तियाणं अट्ठारस मुहुत्ता छत्तीसं च बावट्ठिभागा मुहुत्तस्स बावट्ठिभागं च सत्तट्ठिधा छेत्ता छ चुण्णिया भागा, सेसा तं समयं च णं सूरे जाव जोएति ता उत्तराहिं आसाढाहिं उत्तराणं आसाढाणं चरिमसमए ।

[११०]तत्थ खलु इमे दसविधे जोए० वसभाणुजाते वेणुयाणुजाते मंचे मंचातिमंचे छत्ते छत्तातिछत्ते जुयणद्धे घणसंमद्धे पीणिते मंडूकप्पुत्ते नामं दसमे ता एतेसि णं पंचण्हं संवच्छराणं छत्तातिछत्तं जोयं चंदे कंसि देसंसि जोएति ता जंबुद्धीवस्सदीवस्स पाईणपडीणायताए उदीणदाहिणायताए जीवाए मंडलं चउव्वीसेणं सतेणं छेत्ता दाहिणपुरत्थिमिल्लंसि चउभागमंडलंसि सत्तावीसं भागे उवाइणावेत्ता अट्ठावीसतिभागं वीसधा छेत्ता अट्ठारसभागे उवाइणावेत्ता तिहिं भागेहिं दोहिं कलाहिं दाहिणपुरत्थिमिल्लं चउभागमंडलं असंपत्ते एत्थ णं से चंदे छत्तातिछत्तं जोयं जोएति तं जहा- उप्पिं चंदे मज्झे नक्खत्ते हेट्ठा आदिच्चे तं समयं च णं चंदे चित्ताहिं चित्ताणं चमिसमए ।

• मुनि दीपरत्नसागरेण संशोधितः सम्पादित्तश्च बारसमं पाहुडं समत्तं •

॥ तेरसमं पाहुडं ॥

[१११]ता कहं ते चंदमासो वड्ढोवड्ढी० ता अट्ठ पंचासीते मुहुत्तसते तीसं च बावट्ठिभागे मुहुत्तस्स ता दोसिणापक्खाओ अंधकारपक्खमयमाणे चंदे चत्तारि बातालसते छत्तालीसं च बावट्ठिभागे मुहुत्तस्स जाइं चंदे रज्जति तं जहा- पढमाए पढमं भागं बितियाए बितियं भागं जाव पन्नरसीए

पन्नरसमं भागं चरिमसमए चंदे रत्ते भवति अवसेसे समए चंदे रत्ते य विरत्ते य भवति इयण्णंअमावासाएत्थ णंपढमे पव्वे अमावासा ता अंधकारपक्खो तो णं दोसिणापक्खं अयमाणे चंदे चत्तारे बाताले मुहुत्तेत्तस छत्तालीसं च बावद्धिभागा मुहुत्तस्स जाइं चंदे विरज्जति पढमाए पढमं भागं बितियाए बितियं भागं जाव पन्नरसीए पन्नरसमं भागं चरिमे समए चंदे विरत्ते भवति अवसेसमए चंदे रत्ते य विरते य भवति इयण्णं पुन्निमासिणी एत्थ णं दोच्चे पव्वे पुन्निमासिणी ।

[११२] तत्थ खलु इमाओ बावद्धिं पुन्निमासिणीओ बावद्धिं अमावासाओ पन्नत्ताओ बावद्धिं एते कसिणा रागा बावद्धिं एते कसिणा विरागा एते चउव्वीसे पव्वसते एते चउव्वीसे कसिणारागविरागसते जावतिया णं पंचण्हं संवच्छराणं समया एगेणं चउव्वीसेणं समयसतेणूणका एवतिया परित्ता असंखेज्जा देसारागविरागसता भवंतीति मक्खाता, ता अमावासाओ णं पुन्निमासिणी चत्तारि बाताले मुहुत्तसते छत्तलीसं च बावद्धिभागे मुहुत्तस्स आहितेति वदेज्जा ता पुन्निमासिणीओ अमावासा चत्तारि बाताले मुहुत्तसते छत्तालीसं च बावद्धिभागे मुहुत्तस्स आहितेति वदेज्जा ता अमावासाओ णं अमावासा अट्ठपंचासीते मुहुत्त-

पाहुडं-१३

सते तीसं च बावद्धिभागे मुहुत्तस्स आहितेति वदेज्जा ता पुन्निमासिणीओ णं पुन्निमासिणी अट्ठपंचासीते मुहुत्तसते तीसं च बावद्धिभागे मुहुत्तस्स आहितेति वदेज्जा एस णं एवतिए चंदे मासे एस णं एवतिए सगले जुगे ।

[११३] ता चंदेणं अद्धमासेणं चंदे कति मंडलाइं चरति ताचोद्दस चउव्वीससयभागं मंडलस्स ता आदिच्चेणं अद्धमासेणं चंदे कति मंडलाइं चरति ता सोलस मंडलाइं चरति सोलसमंडलचारी तदा अवराइं खलु दुवे अट्ठकाइं जाइं चंदे केणइ असामण्णकाइं सयमेव पविट्ठित्ता-पविट्ठित्ता चारं चरति कतराइं खलु ताइं दुवे अट्ठकाइं जाइं चंदे केणइ असामण्णकाइं सयमेव पविट्ठित्ता-पविट्ठित्ता चारं चरति ता इमाइं खलु ते बे अट्ठकाइं जाइं चंदे केणइ असामण्णकाइं सयमेव पविट्ठित्ता-पविट्ठित्ता चारं चरति तं जहा- निक्खममाणे चेव अमावासंतेणं पविसमाणे चेव पुन्निमासिंतेणं एताइं खलु दुवे अट्ठकाइं जाइं चंदे केणइ असामण्णकाइं सयमेव पविट्ठित्ता-पविट्ठित्ता चारं चरति ता पढमायणगते चंदे दाहिणाते भागाते पविसमाणे सत्त अद्धमंडलाइं जाइं चंदे दाहिणाते भागाते पविसमाणे चारं चरति ता पढमायणगते चंदे दाहिणाते भागाते पविसमाणे सत्त अद्धमंडलाइं जाइं चंदे दाहिणाते भागाते पविसमाणे चारं चरति कतराइं खलु ताइं सत्त अद्धमंडलाइं जाइं चंदे दाहिणाते भागाते पविसमाणे चारं चरति इमाइं खलु ताइं सत्त अद्धमंडलाइं जाइं चंदे दाहिणाते भागाते पविसमाणे चारं चरति तं जहा- बितिए अद्धमंडले चउत्थे अद्धमंडले छट्ठे अद्धमंडले अट्ठमे अद्धमंडले दसमे अद्धमंडले बारसमे अद्धमंडले चउदसमे अद्धमंडले एताइं खलु ताइं सत्त अद्धमंडलाइं जाइं चंदे दाहिणाते भागाते पविसमाणे चारं चरति ता पढमायणगते चंदे उत्तराते भागाते पविसमाणे छ अद्धमंडलाइं तेरस य सत्तद्धिभागाइं अद्धमंडलस्स जाइं चंदे उत्तराते भागाते पविसमाणे चारं चरति कतराइं खलु ताइं छ अद्धमंडलाइं तेरस य सत्तद्धिभागाइं अद्धमंडलस्स जाइं चंदे उत्तराते भागाते पविसमाणे चारं चरति इमाइं खलु ताइं छ अद्धमंडलाइं तेरस य सत्तद्धिभागाइं अद्धमंडलस्स जाइं चंदे उत्तराते भागाते पविसमाणे चारं चरति इमाइं खलु ताइं छ अद्धमंडलाइं तेरसयसत्तद्धिभागाइं अद्धमंडलस्स जाइं चंदे उत्तराते भागाते पविसमाणे चारं चरति तं जहा- ततिए अद्धमंडले पंचमे अद्धमंडले सत्तमे अद्धमंडले नवमे अद्धमंडले एक्कारसमे अद्धमंडले तेरसमे अद्धमंडले

पन्नरसमस्स अद्धमंडलस्स तेरस सत्तद्विभागाइं एताइंखलु ताइंछ अद्धमंडलाइं तेरस य सत्तद्विभागाइं अद्धमंडलस्स जाइं चंदे उत्तराते भागाते पविसमाणेचारं चरति एतावता च पढमे चंदायणे समत्ते भवति ता नक्खत्ते अद्धमासे नो चंदे अद्धमासेचंदे अद्धमासे नो नक्खत्ते अद्धमासे ता नक्खत्ताओ अद्धमासाओ ते चंदे चंदेणं अद्धमासेणं किमधियं चरति ता एगं अद्धमंडलं चरति चत्तारि य सद्धिभागाइं अद्धमंडलस्स सत्तद्विभागं एगतीसाएछेत्ता नव भागाइं ता दोच्चायणगते चंदे पुरत्थिमाते भागाते निक्खममाणे सत्त चउप्पन्नाइं जाइं चंदे परस्स चिण्णं पडिचरति सत्त तेरसकाइं जाइं चंदे अप्पणो चिण्णं पडिचरति ता दोच्चायणगते चंदे पच्चत्थिमाते भागातेनिक्खममाणेछ चउप्पण्णाइं जाइं चंदे परस्स चिण्णं पडिचरतचि छ तेरसकाइं जाइं चंदे अप्पणो चिण्णं पडिचरति अवरकाइं खलु दुवे तेरसकाइं जाइं चंदे केणइ असामण्णकाइं सयमेव पविद्वित्ता-पविद्वित्ता चारं चरति कतराइं खलु ताइं दुवे तेरसकाइं जाइं चंदे केणइ असामण्णकाइं सयमेव पविद्वित्ता-पविद्वित्ता चारं चरति इमाइं खलु ताइंदुवेतेरसकाइं जाइं चंदे केणइ असामण्णकाइं सयमेव पविद्वित्ता-पविद्वित्ता चारं चरति तं जहा- सव्वब्भंतरे चेव मंडले सव्वबाहिरे चेव मंडले एताणि खलु ताणि दुवे तेरसकाइं जाइं चंदे केणइ असामण्णकाइं सयमेव पविद्वित्ता-पविद्वित्ता चारं चरति एता- पाहुडं-१३

वता च दोच्चे चंदायणे समत्ते भवति ता नक्खत्ते मासे नो चंदे मासे चंदे मासे नो नक्खत्ते मासे ता नक्खत्ताओ मासाओ चंदे चंदेणं मासेणं किमधियं चरति ता दो अद्धमंडलाइं चरति अद्द य सत्तद्विभागाइं अद्धमंडलस्स सत्तद्विभागं च एककीसधा छेत्ता अद्वारस भागाइं ता तच्चायणगते चंदे पच्चत्थिमाते भागाते पविसमाणे बाहिराणंतरस्स पच्चत्थिमिलस्स अद्धमंडलस्स ईतालीसं सत्तद्विभागाइं जाइं चंदे अप्पणो परस्स य चिण्णं पडिचरति तेरस सत्तद्विभागाइं जाइं चंदे परस्स चिण्णं पडिचरति तेरस सत्तद्विभागाइं जाइं चंदे अप्पणो परस्स य चिण्णं पडिचरति एतावता व बाहिराणंतरे पच्चत्थिमिल्ले अद्धमंडले समत्ते भवति ता तच्चायणगते चंदेपुरत्थिमातेभागाते पविसमाणे बाहिरतच्चस्सपुरत्थिमिल्लस्स अद्धमंडलस्स ईतालीसं सत्तद्विभागाइं जाइं चंदे अप्पणो परस्स य चिण्णं पडिचरति तेरससत्तद्विभागाइं जाइं चंदे परस्स चिण्णं पडिचरति तेरस सत्तद्विभागाइं जाइं चंदे अप्पणो परस्स य चिण्णं पडिचरति एतावता च बाहिरतच्चे पुरत्थिमिल्ले अद्धमंडले समत्ते भवति तातच्चायणगते चंदे पच्चत्थिमाते भागाते पविसमाणे बाहिरचउत्थस्स पच्चत्थिमिल्लस्स अद्धमंडलस्स अद्द सत्तद्विभागाइं सत्तद्विभागं च एककीसधा छेत्ता अद्वारस भागाइं जाइं चंदे अप्पणो परस्स य चिण्णं पडिचरति एतावता च बाहिरचउत्थे पच्चत्थिमिल्ले अद्धमंडले समत्ते भवति एवं खलु चंदेणं मासेणं चंदे तेरस चउप्पन्नगाइं दुवे तेरसकाइं जाइं चंदे परस्स चिण्णं पडिचरति तेरस तेरसकाइं जाइं चंदे अप्पणो चिण्णं पडिचरति दुवे ईतालीसकाइं दुवेतेरसकाइंअद्द सत्तद्विभागाइं सत्तद्विभागं च एककीसधा छेत्ता अद्वारसभागाइं जाइं चंदे अप्पणो परस्स य चिण्णं पडिचरति इच्चेसा चंदमसोऽभिगमण-निक्खमण-वुड्ढि-निवुड्ढि-अणवद्वितसंठाणसंठिती विउव्वणगिड्ढिपत्ते रूवी चंदे देवे आहितेति वदेज्जा ।

◦ मुनि दीपरत्नसागरेण संशोधितः सम्पादित्तश्च तेरसमं पाहुडं समत्तं ◦

□ चउद्दसमं पाहुडं □

[११४]ता कया ते दोसिणा बहू आहितेति वदेज्जा ता दोसिणापक्खे णं दोसिणा बहू आहितेति वदेज्जा ता कहं ते दोसिणापक्खे दोसिणा बहू आहितेति वदेज्जा ता अंधकारपक्खातो णं

दोसिणापक्खे० ता कहं ते अंधकारपक्खातो दोसिणापक्खे दोसिणा बहू आहिताति वदेज्जा ता अंधकार-पक्खाओ णं दोसिणापक्खं अयमाणे चंदे चत्तारि बाताले मुहुत्तसए छत्तालीसं च बावट्टिभागे मुहुत्तस्स जाइं चंदे विरज्जति तं जहा- पढ्माए पढ्मं भागं बितियाए बितियं भागं जाव पन्नरसीए पन्नरसमं भागं एवं खलु अंधकारपक्खताओदोसिणापक्खे दोसिणा बहू आहिताति वदेज्जा, ता केवतिया णं दोसिणापक्खे दोसिणा बहू आहिताति वदेज्जा ता परित्ता असंखेज्जा भागा, ता कया ते अंधकारे बहू आहितेति वदेज्जा ता अंधकारपक्खे णं अंधकारे बहू आहितेति वदेज्जा ता कहं ते अंधकारपक्खे अंधकारे बहू आहितेति वदेज्जा ता दोसिणापक्खातो णं अंधकारपक्खे अंधकारे बहू आहितेति वदेज्जा ता कहं ते दोसिणापक्खातो अंधकारपक्खे अंधकारे बहू आहितेति वदेज्जा ता दोसिणापक्खातो णं अंधकारपक्खं अयमाणे चंदे चत्तारि बाताले मुहुत्तसते छायालीसं च बावट्टिभागे मुहुत्तस्स जाइं चंदे रज्जति तं जहा- पढ्माए पढ्मं बागं बितियाए बितियं भागं जाव पन्नरसीए पन्नरसमं भागं एवं खलु दोसिणापक्खातो अंधकारपक्खे० अंधकारे ता केवतिए णं अंधकारपक्खे अंधकारे बहू आहितेति वदेज्जा ता परिता असंखेज्जा भागा ।

० मुनि दीपरत्नसागरेण संशोधितः सम्पादित्तश्च चउद्धसमं पाहुडं समत्तं ०

पाहुडं-१५

॥ पन्नरसमं पाहुडं ॥

[११५] ता कहं ते सिग्धगती वत्थू आहितेति वदेज्जा ता एतेसि णंचंदिम-सूरिय-गह-नक्खत्त-तारारूवाणं चंदेहिंतो सूरा सिग्धगती सूरुहिंतो गहा सिग्धगती गहेहिंतो नक्खत्ता सिग्धगती नक्खत्तेहिंतो तारा सिग्धगती सव्वप्पगती चंदा सव्वसिग्धगती तारा, ता एगमेगेणं मुहुत्तेणं चंदे केवतियाइं भागसताइं गच्छति ता जं-जं मंडलं उवसंकमित्ता चारं चरति तस्स-तस्स मंडलपरिक्खेवस्स सत्तरसम अडसट्ठिं भागसते गच्छति मंडलं सतसहस्सेणं अट्ठाणउतीए सतेहिं छेत्ता ता एगमेगेणं मुहुत्तेणं सूरिए जं-जं मंडलं उवसंकमित्ताचारं चरति तस्स-तस्स मंडलपरिक्खेवस्स अट्ठारस तीसे भागसते गच्छति मंडलं सतसहस्सेणं अट्ठाणउतीए सतेहिं छेत्ता ता एगमेगेणं मुहुत्तेमं नक्खत्ते जं-जं मंडलं उवसंकमित्ता चारं चरति तस्स-तस्स मंडलपरिक्खेवस्स अट्ठारस पणतीसे भागसते गच्छति मंडलं सतसहस्सेण अट्ठाणउतीए सतेहिं छेत्ता ।

[११६] ता जया णं चंदं गतिसमावण्णं सूरे गतिसमावण्णे भवति से णं गतिमाताए केवतियं विसेसेति ता बावट्टिभागे विसेसेति ता जया णं चंदं गतिसमावण्णं नक्खत्ते गतिसमावण्णे भवति से णं गतिमाताए केवतियं विसेसति ता सत्तट्टिभागे विसेसेति ता जया णं सूरं गतिसमावण्णं नक्खत्ते गतिसमावण्णे भवति से णं गतिमाताएकेवतियं विसेसेति ता पंच भागे विसेसेति ता जया णं चंदं गतिसमावण्णं अभीई नक्खत्ते गतिसमावण्णे पुरत्थिमाते भागाते समासादेति समासादेत्ता नव मुहुत्ते सत्तीवासं च सत्तट्टिभागे मुहुत्तस्स चंदेणं सद्धिं जोयं जोएति जोएत्ता जोयं अनुपरियट्ठति अनुपरियाट्ठित्ता विजहतिविप्पजहतिविगतजोई याविभवति ताजयाणं चंदं गतिसमावण्णं सवणे नक्खत्तेगतिसमावण्णे पुरत्थिमाते भागाते समासादेति समासादेत्ता तीसंमुहुत्ते चंदेणं सद्धिं जोयं जोएति जोएत्ता जोयंअनुपरियट्ठति अनुपरियट्ठित्ता विजहति विप्पजहति विगतजोई यावि भवति एवं एतेणं अभिलावेणं नेतव्वं-पन्नरसमुहुत्ताइं तीसइमुहुत्ताइं पणयालीसमुहुत्ताइं भणितव्वाइं जाव उत्तरासाढा ता जया णं चंदं

गतिसमावर्णं गहे गतिसमावर्णे पुरत्थिमाते भागाते समासादेति समासादेत्ता चंदेणं सद्धिं अधाजोगं जुंजति जुंजित्ता अधाजोगं अनुपरियट्टति जाव विगतजोई यावि भवति ता जया णं सूरं गतिसमावर्णं अभीई नक्खत्ते गतिसमावर्णे पुरत्थिमाते भागाते समासादेति समासादेत्ता चत्तारि अहोरत्ते छच्च मुहुत्ते सूरें सद्धिं जोयं जोएति जोएत्ता जोयं अनुपरियट्टति जाव विगतजोई यावि भवति एवं छ अहोरत्ता एक्कवीसं मुहुत्ता य तेरस अहोरत्ता बारस मुहुत्ता य वीसं अहोरत्ता तिण्णि मुहुत्ता य सव्वे भाणितव्वा जाव-जया णं सूरं गतिसमावर्णं उत्तरासाढा नक्खत्ते गतिसमावर्णे पुरत्थिमाते भागाते समासादेति समासादेत्ता वीसं अहोरत्ते तिण्णि य मुहुत्ते सूरें सद्धिं जोयं जोएति जोएत्ता जोयं अनुपरियट्टति जाव यावि भवति ता जया णं सूरं गतिसमावर्णं गहे गतिसमावर्णे पुरत्थिमाते भागाते समासादेति समासादेत्ता सूरें सद्धिं अधाजोयं जुंजति जुंजित्ता जोयं अनुपरियट्टति जाव विगतजोई यावि भवति ।

[११७] ता नक्खत्तेणं मासेणं चंदे कति मंडलाइं चरति ता तेरस मंडलाइं चरति तेरस य सत्तद्धिभागे मंडलस्स ता नक्खत्तेणं मासेणं सूरं कति मंडलाइं चरति ता तेरस मंडलाइं चरति चोत्तालीसं च सत्तद्धिभागे मंडलस्स ता नक्खत्तेणं मासेणं नक्खत्ते कति मंडलाइं चरति ता तेरस मंडलाइं चरति अद्धसीतालीसं च सत्तद्धिभागे मंडलस्स ता चंदेणं मासेणं चंदे कति मंडलाइं चरति ता चोद्धस सचउभागाइं मंडलाइं चरति एगं च चउव्वीससतभागं मंडलस्स ता चंदेणं मासेणं सूरं कति मंडलाइं चरति पाहुडं-१५

ता पन्नरस चउभागूणाइं मंडलाइं चरति एगं चचउवीससतभागं मंडलस्स ताचंदेणं मासेणं नक्खत्ते कतिमंडलाइं चरति ता पन्नरस चउभागूणाइं मंडलाइं चरति छच्च चउवीससतभागे मंडलस्स ता उडुणा मासेणं चंदे कति मंडलाइं चरति ता चोद्धस मंडलाइं चरति तीसं च एगद्धिभागं मंडलस्स ता उडुणा मासेणं सूरं कति मंडलाइं चरति ता पन्नरस मंडलाइं चरति ता उडुणा मासेणं नक्खत्ते कति मंडलाइं चरति ता पन्नरस मंडलाइं चरति पंच य बावीससतभागे मंडलस्स ता आदिच्चेणं मासेणं चंदे चोद्धस मंडलाइं चरति एक्कारस यपन्नरसभागे मंडलस्स ता आदिच्चेणं मासेणं सूरं पन्नरस चउभागाहिगाइं मंडलाइं चरति ता आदिच्चेणं मासेणं नक्खत्ते पन्नरस चउभागाहिगाइं मंडलाइं चरति पंचतीसं च वीससतभागे मंडलस्स चरति ता अभिवड्ढितेणं मासेणं चंदे पन्नरस मंडलाइं चरति तेसीति य छलसीयसतभागे मंडलस्स ता अभिवड्ढितेणं मासेणं सूरं कति मंडलाइं चरति ता सोलस मंडलाइं चरति तिहिं भागेहिं ऊणगाइं दोहिं अडयालेसिं सतेहिं मंडलं छेत्ता ता अभिवड्ढितेणं मासेणं नक्खत्ते कति मंडलाइं चरति ता सोलस मंडलाइं चरति सीतालीसएहिं भागेहिं आहियाइं चोद्धसहिं अद्धासीएहिं सतेहिं मंडलं छेत्ता ।

[११८] ता एगमेगेणं अहोरत्तेणं चंदे कति मंडलाइं चरति ता एगं अद्धमंडलं चरति एक्क-तीसाए भागेहिं ऊणं नवहिं पन्नरसेहिं सतेहिं अद्धमंडलं छेत्ता ता एगमेगेणं अहोरत्तेणं सूरं कति मंडलाइं चरति ता एगं अद्धमंडलं चरति ता एगमेगेणं अहोरत्तेणं सूरं कति मंडलाइं चरति ता एगं अद्धमंडलं चरति दोहिं भागेहिं अहियं सत्तहिं दुवत्तीसेहिं सतेहिं अद्धमंडलं छेत्ता ता एगमेगं मंडलं चंदे कतिहिं अहोरत्तेहिं चरति ता दोहिं अहोरत्तेहिं चरति एक्कतीसाए भागेहिं अहिएहिं चउहिं बातालेहिं सतेहिं राइंदियं छेत्ता ता एगमेगं मंडलं सूरं दोहिं अहोरत्तेहिं चरति ता एगमेगं मंडलं नक्खत्त दोहिं अहोरत्तेहिं चरति दोहिं भागेहिं ऊणेहिं तिहिं सत्तसट्टेहिं सतेहिं राइंदियं छेत्ता ता जुगेणं चंदे अद्ध चुलसीते मंडलसते चरति ता जुगेणं सूरं नव

पन्नरसमंडलसते चरत ता जुगेणं नकखत्ते कति मंडलाइं चरति ता अद्वारस पणतीसे दुभागमंडलसते चरति इच्चेसा मुहुत्तगती रिक्खातिमास-राइंदिय-जुग-मंडलपविभत्ती सिग्धगती वत्थू आहितेति बेमि ।

• मुनि दीपरत्नसागरेण संशोधितः सम्पादित्तश्च पन्नरसमं पाहुडं समत्तं •

□ सोलसमं पाहुडं □

[११९]ता कहं ते दोसिणालकखणे आहितेति वदेज्जा ता चंदलेस्सा इ य दोसिणा इ य दोसिणा इ य चंदलेस्सा इ य के अट्ठि किं लकखणे ता एगट्ठे एगलकखणे ता सूरलेस्सा इ य आतवे इ य आतवे इ य सूरलेस्सा इ य के अट्ठे किं लकखणे ता एगट्ठे एगलकखणे ता अंधकारे इ य छाया इ य छाया य अंधकारे इ य के अट्ठे किं लकखणे ता एगट्ठे एगलकखणे ।

• मुनि दीपरत्नसागरेण संशोधितः सम्पादित्तश्च सोलसमं पाहुडं समत्तं •

□ सत्तरसमं पाहुडं □

[१२०]ता कहं ते चयणोववाता आहिताति वदेज्जा तत्थ खलु इमाओ पणवीसं पडिवत्तीओ पन्नत्ताओ तत्थ एगे एवमाहंसु-ता अनुसमयमेव चंदिमसूरिया अन्ने चयंति अण्णे उववज्जंति-एगे पुण एवमाहंसु-ता अनुमुहुत्तमेव चंदिमसूरिया अण्णे चयंति अण्णे उववज्जंति एवं जहेव हेट्ठा तहेव जाव ता पाहुडं-१७

एगे पुण एवमाहंसुता अणुओसप्पिणिउस्सप्पिणिमेव चंदिमसूरिया अण्णे चयंति उववज्जंति-वयं पुण एवं वदामो-ता चंदिमसूरिया णं देवा महिइडिया महाजुतीया महाबला महाजसा महाणुभावा महासोक्खा वर-वत्थधरा वरमल्लधरा वरगंधधरा वराभरणधरा अक्कोच्छित्तिणयट्ठयाए काले अण्णे चयंति अण्णे उववज्जंति आहिताति वदेज्जा ।

• मुनि दीपरत्नसागरेण संशोधितः सम्पादित्तश्च सत्तरसमं पाहुडं समत्तं •

□ अद्वारसमं पाहुडं □

[१२१]ता कहं ते उच्चते आहितेति वदेज्जा तत्थ खलु इमाओ पणवीसं पडिवत्तीओ पन्नत्ताओ तत्थेगे एवमाहंसु-ता एगं जोयणसहस्सं सूरे उड्ढं उच्चत्तेणं दिवड्ढं चंदे-गे पुणं एवमाहंसु-ता दो जोयणसहस्साइं सूरे उड्ढं उच्चत्तेणं अड्ढाइज्जाइं चंदे-एगे पुण एवमाहंसु-ता तिण्णि जोयणसहस्साइं सूरे उड्ढं उच्चत्तेणं अद्धट्ठाइं चंदे-एगे पुणं एवमाहंसु-ता चत्तारि जोयणसहस्साइं सूरे उड्ढं उच्चत्तेणं अद्धपंचमाइं चंदे-एगे पुण एवमाहंसु-ता पंच जोयणसहस्साइं सूरे उड्ढं उच्चत्तेणं अद्धछट्ठाइं चंदे-एगे पुण एवमाहंसु-ता छ जोयणसहस्साइं सूरे उड्ढं उच्चत्तेणं अद्धसत्तमाइं चंदे-एगे पुण एवमाहंसु-ता सत्त जोयणसहस्साइं सूरे उड्ढं उच्चत्तेणं अद्धट्ठाइं चंदे-एगे पुणं एवमाहंसु-ता अट्ठ जोयणसहस्साइं सूरे उड्ढं उच्चत्तेणं अद्धवणमाइं चंदे-एगे पुण एवमाहंसु-ता नव जोयणसहस्साइं सूरे उड्ढं उच्चत्तेणं अद्धएक्कारस चंद-एगेपुण एवमाहंसु-ता एक्कारस जोयणसहस्साइं सूरे उड्ढे उच्चत्तेणं अद्धबारस चंदे चोद्धस सूरे अद्धपन्नरस चंदे पन्नरस सूरे अद्धसोलस चंदे सोलस सूरे अद्धसत्तरस चंदे सत्तरस सूरे अद्धद्वारस चंदे अद्वारस सूरे अद्धएकोणवीसं चंदे ओएकोणवीसं सूरे अद्धवीसं चंदे वीसं सूरे अद्धएक्कवीसं चंदे एक्कवीसं सूरे अद्धबावीसं चंद बावीसं सूरे अद्धतेवीसं चंदे तेवीसं सूरे अद्धचउवीसं चंदे चउवीसं सूरे अद्धपणवीसं चंदे एगे पुण एवमाहंसु-ता पणवीसं जोयमसहस्साइं सूरे उड्ढं उच्चत्तेणं अद्धछव्वीसं चंदे-वयं पुण एवं वदामो-ता

इमीसे रयणप्पभाए पुढवीए बहुसमरमणिज्जाओ भूमिभागओ [सत्तणउते जोयणसते अबाहाए हिड्डिल्ले तारारूवे चारं चरति अट्टजोयणसए अबाहाए सूरविमाणे चारं चरति अट्टअसीते जोयणसते अबाहाए चंदविमाणे चारं चरति नवजोयणसएअबाहाए उवरिल्ले तारारूवे चारं चरति ता हेड्डिलातो णं तारारूवाओ दस जोयणे अबाहाए सूरविमाणे चारं चरति तता णं असीतेजोयणे अबाहाए चंदविमाणे चारं चरति एवं जहेव जीवाभिगमे तहेव नेयव्वं-सव्वब्भंतरिल्लं चारं संठाणं पमाणं वहति सिहगति इड्डि तारंतरं अग्गमहिंसी ठिति अप्पाबहुयं जाव तारातो संखेज्जगुणातो पा०] सत्तणउतिजोयणसतेउड्डं उप्पइत्ता हेड्डिल्ले ताराविमाणे चारं चरति अट्टजोयणसते उड्डं उप्पइत्ता सूरविमाणे चारं चरति अट्टअसीए जोयणसए उड्डं उप्पइत्ता चंदविमाणे चारं चरति नव जोयणसयाइं उड्डं उप्पइत्ता उवरिल्ले ताराविमाणे चारं चरति हेड्डिल्लाओ ताराविमाणाओ दसजोयणाइं उड्डं उप्पइत्ता सूरविमाणे चारं चरति नउतिं जोयणाइं उड्डं उप्पइत्ता चंदविमाणे चारं चरति दसोत्तरं जोयणसयं उड्डं उप्पइत्ता उवरिल्ले तारारूवे चारं चरति ता सूरविमाणाओ असीतिं जोयणाइं उड्डं उप्पइत्ता चंदविमाणे चारं चरति जोयणसयं उड्डं उप्पइत्ता उवरिल्ले तारारूवे चारं चरति ता चंदविमाणाओ णं वीसं जोयणाइं उड्डं उप्पइत्ता उवरिल्ले तारारूवे चारं चरति एवामेव सपुव्वावरेणं दसुत्तरजोयणसयं बाहल्ले तिरियमसंखेज्जे जोतिसविसए जोतिसं चारं चरति आहितेति वदेज्जा ।

[१२२]ता अत्थि णं चंदिमसूरियाणं देवाणं हिड्डंपि तारारूवा अणुंपि तुल्लावि समंपि तार-
पाहुड्डं-१८

रूवा अणुंपि तुल्लावि उप्पिंपि तारारूवा अणुंपि तुल्लावि ता अत्थि ता कहं ते चंदिमसूरियाणं देवाणं हिड्डंपितारारूवा अणुंपि तुल्लावि समंपि तारारूवा अणुंपि तुल्लावि उप्पिंपि तारारूवा अणुंपि तुल्लावि ता जहा- जहा णं तेसि णं देवाणं तव-नियम-बंधेराइं उस्सियाइं भवंति तहा-तहा णं तेसि देवाणं एवं भवति तं जहा- अनुत्ते वा तुल्लत्ते वा ता एवं खलु चंदिमसूरियाणं देवाणं हिड्डंपि तारारूवा अणुंपि तुल्लावि तहेव।

[१२३]ता एगमेगस्स णं चंदस्स देवस्स केवतिया गहा परिवारो पन्नत्तो केवतिया नक्खत्ता परिवारो पन्नत्तो केवतिया तारा परिवारो पन्नत्तो ता एगमेगस्स णं चंदस्स देवस्स अट्टासीतिं गहा परिवारो पन्नत्तो अट्टावीसं नक्खत्ता परिवारो पन्नत्तो ।

[१२४] छावड्डिं सहस्साइं नव चेव सताइं पंचसत्तराइं ।

एगससी परिवारो तारागणकोडिकोडीण [परिवरो पन्नत्तो] ।

[१२५]ता मंदरस्स णं पव्वयस्सकेवतियं अबाहाए जोतिसेचारं चरति ता एक्कारस एक्कवीसेजोयणसते अंबाहाए जोतिसे चारं चरति ता लोयंताओ णं केवतियं अबाहाए जोतिसे पन्नत्ते ता एक्कारस एक्कारे जोयणसते अबाहाए जोतिसे पन्नत्ते ।

[१२६]ता जंबुद्धीवे णं दीवे कतरे नक्खत्ते सव्वब्भंतरिल्लं चारं चरति कतरे नक्खत्ते सव्वबाहिरिल्लं चारं चरति कतरे नक्खत्ते सव्वुपरिल्लं चारं चरति कतरे नक्खत्ते सव्वहिड्डिल्लं चारं चरति ता अभीई नक्खत्तो सव्वब्भंतरिल्लं चारं चरति मूले नक्खत्ते सव्वबाहिरिल्लं चारं चरइ साती नक्खत्ते सव्वुपरिल्लं चारं चरति भरणी नक्खत्ते सव्वहेड्डिल्लं चारं चरति ।

[१२७]ता चंदविमाणे णं किसंठिते पन्नत्ते ता अद्धकविड्डगसंठाणसंठिते सव्वफलिहामए अब्भुग्गयमूसियपहसिए विविहमणिरयणभत्तिचित्ते जाव पडिरूवे एवं सूरविमाणे ताराविमाणे ता

चंदविमाणे णं केवतियं आयाम-विक्खंभेणं केवतियं परिक्खेवेणं केवतियं बाहल्लेणं पन्नत्ते ता छप्पन्नं एगद्धिभागे जोयणस्स आयाम-विक्खंभेणं तं तिगुणं सविसेसं परिरएणं अट्ठवीसं एगद्धिभागे जोयणस्स बाहल्लेणं पन्नत्ते ता सूरविमाणे णं केवतियं आयाम-विक्खंभेणं पुच्छा ता अडयालीसं एगद्धिभागे जोयणस्स आयाम-विक्खंभेणं तं तिगुणं सविसेसं परिरएणं चउट्ठीसं एगद्धिभागे जोयणस्स बाहल्लेणं पन्नत्ते ता गहविमाणेणं पच्छा ता अद्धजोयणं आयाम-विक्खंभेणं तं तिगुणं सविसेसं परिरएणं कोसं बाहल्लेणं पन्नत्ते ता नक्खत्तविमाणे णं केवतियं पुच्छा ता कोसं आयाम-विक्खंभेणं तं तिगुणं सविसेसं परिरएणं अद्धकोसं बाहल्लेणं पन्नत्ते ता ताराविमाणे णं केवतियं पुच्छा ता अद्धकोसं आयाम-विक्खंभेणं तं तिगुणं सविसेसं परिरएणं पंच धणुसयाइं बाहल्लेणं पन्नत्ते ता चंदविमाणं कति देवसाहस्सीओ परिवहंति ता सोलस देवसाहस्सीओ परिवहंति तं जहा- पुरत्थिमेणं सीहरूवधारीणं चत्तारि देवसाहस्सीओ दाहिणेणं गयरूवधारीणं चत्तारि देवसाहस्सीओ पच्चत्थिमेणं वसहरूवधारीणं चत्तारि देवसाहस्सीओ उत्तरेणं तुरगरूवधारीणं चत्तारि देवसाहस्सीओ परिवहंति एवं सूरविमाणंपि ता गहविमाणं अट्ठ देवसाहस्सीओ परिवहंति तं जहा- पुरत्थिमेणं सीहरूवधारीणं देवाणं दो देवसाहस्सीओ परिवहंति एवं जाव उत्तरेणं तुरगरूवधारीणं ता नक्खत्तविमाणं चत्तारि देवसाहस्सीओ परिवहंति तं जहा- पुरत्थिमेणं सीहरूवधारीणं देवाणं एक्का देवसाहस्सी परिवहति एवं जाव उत्तरेणं तुरगरूवधारीणं देवाणं ता ताराविमाणं दो देवसाहस्सीओ परिवहंति तं जहा- पुरत्थिमेणंसीहरूवधारीणं देवाणं पंच देवसता परिवहंति एवं जाव उत्तरेणं तुरगरूवधारीणं ।

पाहुडं-१८

[१२८] एतेसि णं चंदिम-सूरिय-गहगण-नक्खत्त-तारारूवाणं कयरे कयरेहिंतो सिग्घगती वा मंदगती वा ता चंदेहिंतो सूरा सिग्घगती सूरुहिंतो गहा सिग्घगती गहेहिंतो नक्खत्ता सिग्घगती नक्खत्तेहिंतो तारा सिग्घगती सव्वप्पगती चंदा सव्वसिग्घगती तारा ता एतेसि णं चंदिम-सूरिय-गहगण-नक्खत्ता-तारारूवाणं कयरे कयरेहिंतो अप्पिड्ढिया वा महिड्ढिया वा ता ताराहिंतो नक्खत्ता महिड्ढिया नक्खत्तेहिंतो गहा महिड्ढिया गहेहिंतो सूरा महिड्ढिया सूरुहिंतो चंदा महिड्ढिया सव्वप्पिड्ढिया तारा सव्वमहिड्ढिया चंदा ।

[१२९] ता जंबुद्धीवे णं दीवे तारारूवस्स य तारारूवस्स य एस णं केवतिए अबाधाए अंतरे पन्नत्ते ता दुविहे अंतरे पन्नत्ते तं जहा- वाघातिमे य निव्वाघातिमे य तत्थ णं जेसे वाघातिमे से णं जहण्णेणं दोण्णि छावट्ठे जोयणसते उक्कोसेणं बारस जोयणसहस्साइं दोण्णि बाताले जोयणसते तारारूवस्स य अबाधाए अंतरे पन्नत्ते तत्थ णं जेसे निव्वाघातिमे से णं जहण्णेणं पंच धणुतसताइं उक्कोसेणं अद्धजोयणं तारारूवस्स य तारारूवस्स य अबाधाए अंतरे पन्नत्ते ।

[१३०] ता चंदस्स णं जोतिसिंदस्स जोतिसरण्णो कति अग्गमहिसीओ ता चत्तारि अग्गमहिसीओ पन्नत्ताओ तं जहा- चंदप्पभा दोसिणाभा अच्चिमाली पभंकरा तत्थ णं एगमेगाए देवीए चत्तारि-चत्तारि देवीसाहस्सी परिवारो पन्नत्तो पभू णं ताओ एगमेगा देवी अण्णाइं चत्तारि-चत्तारि देवीसहस्साइं परिवारं विउव्वित्तए एवामेव सपुव्वावरेणं सोलस देवीसहस्सा सेत्तं तुडिए ता पभू णं चंदे जोतिसिंदे जोतिसराया चंदवडिंसए विमाणे सभाए सुहम्माए तुडएणं सद्धिं दिव्वाइं भोगभोगाइं भुंजमाणे विहरित्तए नो इणट्ठे समट्ठे ता कहं ते पुच्छा चंदस्स णं जोतिसिंदस्स जोतिसरण्णो चंदवडिंसए विमाणे सभाए सुधम्माए माणवए चेतियखंभे वडरामएसु गोलवट्ठसमुग्गएसु बहवे जिणसकधा सण्णिक्खित्ता

चिद्वंति ताओ णं चंदस्स जोतिसिंदस्स जोतिसरण्णो अण्णेसिं च बहूणं जोतिसियाणं देवाण य देवीण य अच्चणिज्जाओ वंदणिज्जाओ पूयणिज्जाओ सक्कारणिज्जाओ सम्माणणिज्जाओ कल्लाणं मंगलं देवयं चेइयं पज्जुवासणिज्जाओ एवं खलु नो पभू चंदे जोतिसिंदे जोतिसराया चंदवडिंसए विमाणे सभाए सुधम्मए तुडिएणं सद्धिं दिव्वाइं भोगभोगाइं भुंजमाणे विहरित्तए, पभू णं चंदे जोतिसिंदे जोतिसराया-चंदवडिंसए विमाणे सभाए सुहम्मए चंदंसि सीहासणंसि चउहिं सामाणियसाहस्सीहिं चउहिं अग्गमहिसीहिं सपरिवाराहिं तिहिं परिसाहिं सत्तहिं अणिएहिं सत्तहिं अणियाहिवईहिं सोलसहिं आयरक्खदेवसाहस्सीहिं अण्णेहिं य बहूहिं जोतिसिएहिंदेवेहिं देवीहि य सद्धिं महयाहयनट्ट-गीय-वाइय-तंती-तल-ताल-तुडिय-धण-मुडंग-पडुप्पवाइयरेवणं दिव्वाइं भोगभोगाइं भुंजमाणे विहरित्तए केवलं परियारणिड्डीए नो चेव णं मेहुणवत्तियं ता सूरस्स णं जोतिसिंदस्स जोतिसरण्णो चत्तारि अग्गमहिसीओ पन्नत्ताओ तं जहा-सूरप्पभा आतवा अच्चिमाली पभंकरा सेसं जहा चंदस्स नवरं-सूरवडेंसए विमाणे जावनो चेव णं मेहुणवत्तियाए ।

[१३१]जोतिसिया णं देवाणं केवतियं कालं ठिती पन्नत्ता ता जहण्णेणं अट्ठभागपलिओवमं उक्कोसेणं पलिओवमं वाससतसहस्समब्भहियं ता जोतिसिणीणं देवीणं केवतियं कालं ठिती पन्नत्ता ता जहण्णेणं अट्ठभागपलिओवमं उक्कोसेणं अद्धपलिओवमं पन्नासाए वाससहस्सेहिं अब्भहियं ता चंदविमाणे णं देवाणं केवतियं कालं ठिती पन्नत्ता ता जहण्णेणं चउब्भागपलिओवमं उक्कोसेणं पलिओवमं वाससय-सहस्समब्भहियं ता चंदविमाणे णं देवीणं केवतियं कालं ठिती पन्नत्ता ता जहण्णेणं चउब्भागपलिओवमं उक्कोसेणं अद्धपलिओवमं पन्नासाए वाससहस्सेहिं अब्भहियं ता सूरविमाणे णं देवाणं केवतियं कालं ठिती पाहुडं-१८

पन्नत्ता ता जहण्णेणं चउब्भागपलिओवमं उक्कोसेणं पलिओवमं वाससहस्समब्भहियं ता सूरविमाणे णं देवीणं केवतियं कालं ठिती पन्नत्ता ता जहण्णेणं चउब्भागपलिओवमं उक्कोसेणं अद्धपलिओवमं पंचहिं वाससएहिं अब्भहियं ता गहविमाणे णं देवाणं केवतियं कालं ठिती पन्नत्ता ता जहण्णेणं चउब्भागपलिओवमं उक्कोसेणं पलिओवमं ता गहविमाणे णं देवीणं केवतियं कालं ठिती पन्नत्ता ता जहण्णेणं चउब्भागपलिओवमं उक्कोसेणं अद्धपलिओवमं ता नक्खत्तविमाणे णं देवाणं केवतियं कालं ठिती पन्नत्ता ता जहण्णेणं चउब्भागपलिओवमं उक्कोसेणं अद्धपलिओवमं ता नक्खत्तविमाणे णं देवीणं केवतियं कालं ठिती पन्नत्ता ता जहण्णेणं अट्ठभागपलिओवमं उक्कोसेणं चउब्भागपलिओवमं ता ताराविमाणे णं देवाणं पुच्छा ता जहण्णेणं अट्ठभागपलिओवमं उक्कोसेणं चउब्भागपलिओवमं ता ताराविमाणे णं देवीणं पुच्छा ता जहण्णेणं अट्ठभागपलिओवमं उक्कोसेणं साइरेगअट्ठभागपलिओवमं ।

[१३२]ता एसि णं चंदिम-सूरिय-गह-नक्खत्त-ताराराणं कतरे कतरेहितो अप्पा वा बहुया वा तुल्ला वा विसेसाहिया वा ता चंदा य सूरा य -एते णं दोवि तुल्ला सव्वत्थोवा नक्खत्ता संखेज्जगुणा गहा संखेज्जगुणा तारा संखेज्जगुणा ।

• मुनि दीपरत्नसागरेण संशोधितः सम्पादित्तश्च अट्टारसमं पाहुडं समत्तं •

▣ एगूणवीसइमं पाहुडं ▣

[१३३]ता कति णं चंदिमसूरिया सव्वलोयं ओभासंति उज्जोएंति तवेति पभासेंति आहितेति वएज्जा तत्थ खलु इमाओ दुवालस पडिवत्तीओ पन्नत्ताओ तत्थेगे एवमाहंसु-ता एगे चंदे एगे सूर

सव्वलोयं ओभासति जाव पभासेति-एगे पुण एवमाहंसु-ता तिण्णि चंदा तिण्णि सूरा सव्वलोयं ओभासंति जाव पभासेति-एगे पुण एवमाहंसु-ता आहुट्ठि चंदा आहुट्ठिं सूरा सव्वलोयं ओभासंति जाव पभासेति-एगे पुण एवमाहंसु-एतेणं अभिलावेण नेतव्वं-सत्तं चंदा सत्त सूरा दस चंदा दस सूरा बारस चंदा बारस सूरा बातालीसं चंदा बातालीसं सूरा बावत्तरिं चंदा बावत्तरिं सूरा बातालीसं चंदसतं बातालीसं सूरसतं बावत्तरं चंदसतं बावत्तरं सूरसतं बातालीसं चंदसहस्सं बातालीसं सूरसहस्सं बावत्तरं चंदसहस्सं बावत्तरं सूरसहस्सं सव्वलोयं ओभासंति जाव पभासेति-वयं पुण एवं वदामो-ता अयण्णं जंबुद्धीवे दीवे सव्वदीवसमुद्धानं सव्वब्भंतराए जाव परिक्खेवेणं पन्नत्ते ता जंबुद्धीवे दीवे दो चंदा पभासेसु वा पभासेति वा पभासिस्संति वा दो सूरिया तवइंसु वा तवइंति वा तवइस्संति वा छप्पन्नं नक्खत्ता जोयं जोएसु वा जोएंति वा जोइस्संति वा छावत्तरिं गहसत्तं चारं चरिंसु वा चरंति वा चरिस्संति वा एगं सयसहस्सं तेत्तीसंच सहस्सा नव यसया पन्नासा तारागणकोडिकोडीणं सोभं सोभेसु वा सोभेति वा सोभिस्संति वा ।

[१३४] दो चंदा दो सूरा नक्खत्ता खलु हवंति छप्पण्णा ।

छावत्तरं गहसतं जंबुद्धीवे विचारी णं ।

[१३५] एगं च सयसहस्सं तेत्तीसं खलु भवे सहस्साइं ।

नव य सया पन्नासा तारागणकोडिकोडीणं ।

[१३६] ता जंबुद्धीवं णं दीवं लवणे नामं समुद्धे वट्टे वलयागारसंठाणसंठिते सव्वतोसमंता संपरिक्खित्ताणं चिट्ठति ता लवणे णं समुद्धे किं समचक्कवालसंठिते विसमचक्कवालसंठिते ता लवणसमुद्धे समचक्कवालसंठिते नो विसमचक्कवालसंठिते ता लवणसमुद्धे केवतियं चक्कवालविकखंभेणं केवतियं पाहुडं-१९

परिक्खेवेणं आहितेति वदेज्जा ता दो जोयणसतसहस्साइं चक्कवालविकखंभेणं पन्नरसजोयणसयसहस्साइं एक्कासीइं च सहस्साइं सतं च ऊतालं किंचिविसेसूणं परिक्खेवेणं आहितेति वदेज्जा ता लवणसमुद्धे केवतिया चंदा पभासेसु वा एवं पुच्छा जाव केवतियाओ तारागणकोडिकोडीओ सोभिंसु वा सोभेति वा सोभिस्संति वा ता लवणे णं समुद्धे चत्तारि चंदा पभासेसु वा पभासेति वा पभासिस्संति वा चत्तारि सूरिया तवइंसु वा तवइंति वा तवइस्संति वा बारस नक्खत्तसतं जोयं जोएसु वा जोएंति वा जोइस्संति वा तिण्णि बावण्णा महग्गहसता चारं चरिंसु वा चरंति वा चरिस्संति वा दो सतसहस्सा सतट्ठिं च सहसा नव य सता तारागणकोडिकोडीणं सोभं सोभिंसु वा सोभेति वा सोभिस्संति वा ।

[१३७] पन्नरस सतसहस्सा एक्कासीतं सतं च ऊतालं ।

किंचिविसेसूणो लवणो-दधिणो परिक्खेवो ।

[१३८] चत्तारि चेव चंदा चत्तारि य सूरिया लवणतोए ।

बारस नक्खत्तसयं गहाण तिण्णेव बावण्णा ।

[१३९] दो चेव सतसहस्सा सत्तट्ठिं खलु भवे सहस्साइं ।

नव य सता लवणजले तारागणकोडिकोडीणं ।

[१४०] ता लवणसमुद्धं धायईसंडे नामं दीवे वट्टे वलयागारसंठाणसंठिते तहेव जाव नो विसमचक्कवालसंठिते धायईसंडे णं दीवे केवतियं चक्कवालविकखंभेणं केवतियं परिक्खेवेणं आहितेति वदेज्जा ता चत्तारि जोयणसतसहस्साइं चक्कवालविकखंभेणं ईतालीसं जोयणसतसहस्साइं दस य सहस्साइं नव यएगट्टे जोयणसते किंचिविसेसूणे परिक्खेवेणं आहितेति वदेज्जा धायईसंडे दीवे केवतिया चंदा पभासेसु

वा पुच्छा तहेव ता धायइ संडे णं दीवे बारस चंदा पभासैसु वा पभासैति वा पभासिस्संति वा बारस सूरिया तवैसु वा तवैति वा तविस्संति वा तिण्णि छत्तीसा नक्खत्तसया जोयं जोएसुं वा जोएंति वा जोइस्संति वा एगं छप्पणं महग्गहसहस्सं चारं चरिसु वा चरिति वा चरिस्संति वा ।

[१४१] अट्टेव सयसहस्सा तिण्णि सहस्साइं सत्तयसयाइं ।

एगससी परिवारो तारागणकोडिकोडीणं ।

[सोभं सोभैसु वा सोभैति वा सोभिस्संति वा]

[१४२] घायइसंडपरिरओ ईताल दसुत्तरा सतसहस्सा ।

नव सया य एगद्धा किंचिविसेसेण परिहीणा ।

[१४३] चउवीसं ससिरविणो नक्खत्तसया य तिण्णि छत्तीसा

।

एग च गहसहस्सं छप्पणं घायइसंडे ।

[१४४] अट्टेव सतसहस्सा तिण्णि सहस्साइं सत्त य सताइं ।

घायइसंडे दीवे तारागणकोडिकोडीणं ।

[१४५] ता घायइसंडं णं दीवे कालोए नामं समुद्धे वट्टे वलयागारसंठाणसंठिते जाव नो विसमचक्कवालसंठाणसंठिते ता कालोए णं समुद्धे केवतियं चक्कवालविक्खंभेणं केवतियं परिक्खवेणं आहितेति वदेज्जा ता कालोए णं समुद्धे अट्ट जोयणसतसहस्साइं चक्कवालविक्खंभेणं पन्नत्ते एक्काणउतिं जोयणसतसहस्साइं सत्तरिं चसहस्साइं छच्च पंचुत्तरे जोयणसते किंचिविसेसाहिए परिक्खवेणं आहितेति वदेज्जा ता कालोए णं समुद्धे० बातालीसं चंदा पभासैसु वा पभासैति वा पभासिस्संति वा बातालीसं सूरिया पाहुडं-१९

तवैसु वा तवैति वा तविस्संति वा एक्कारस बावत्तरा नक्खत्तसया जोयं जोइंसु वा जोएंति वा जोइस्संति वा तिण्णि सहस्सा छच्च छण्णउया महग्गहसया चारं चरिसु वा चरैति वा चरिस्संति वा अट्टावीसं सयसहस्साइं बारसयसहस्साइं नवयसताइं पन्नासा तारागणकोडिकोडीओ सोभं सोभैसु वा सोभैति वा सोभिस्संति वा ।

[१४६] एक्काणउतिं सतराइं सहस्साइं परिरओ तस्स ।

अहियाइं छच्च पंचुत्तराइं कालोदधिवरस्स ।

[१४७] बातालीसं चंदा बातालीसं च दिणकरा दित्ता ।

कालोदहिंमि एते चरंति संबद्धलेसागा ।

[१४८] नक्खत्तसहस्सं एगमेव छावत्तरं च सयमण्णं ।

छच्च सयाछण्णउया महग्गहा तिण्णि य सहस्सा ।

[१४९] अट्टावीसं कालोदहिंमि बारस य सहस्साइं ।

नव य सता पन्नासा तारागणकोडिकोडीणं ।

[१५०] ता कालोयं णं समुद्धं पुक्खरवरे नामं दीवे वट्टे वलयागारसंठाणसंठिते सव्वतो समंता संपरिक्खित्ताणं चिट्ठंति पुक्खरवरे णं दीवे किं समचक्कवालसंठिते विसमचक्कवालसंठिते ता समचक्कवालसंठिते नो विसमचक्कवालसंठिते ता पुक्खरवरे णं दीवे केवतियं चक्कवालविक्खंभेणं केवतियं परिक्खवेणं ता सोलस जोयणसयसहस्साइं चक्कवालविक्खंभेणं एगा जोयणकोडी बाणउतिं च

सतसहस्साइं अउणाणउतिं च सहस्साइं अडुचउणउते जोयणसते परिकखेवेणं आहितेति वदेज्जा ता पुक्खरवरे णं दीवे केवतिया चंदा पभासेंसु वा पुच्छा तहेव ता चोतालं चंदसतं पभासेंसु वा पभासेंति वा पभासिस्संति वा चोतालं सूरियाणं सतं तवइंसु वा तवइंति वा तवइस्संति वाचत्तारि सहस्साइं बत्तीसं च नक्खत्ता जोयं जोएंसु वा जोएंति वा जोइस्संति वा बारस सहस्साइं छच्च बावत्तरा महग्गहसया चारं चरिंसु वा चरेंति वा चरिस्संति वा छण्णउतिं सयसहस्साइं चोयालीसं सहस्साइं चत्तारि य सयाइं तारागणकोडिकोडीणं सोभं सोभिंसु वा सोभेति वा सोभिस्संति वा ।

[१५१] कोडी बाणउती खलु अउणाणउतिं भवे सहस्साइं ।

अडुसता चउणउता य परिरओ पोकखरवरस्स ।

[१५२] चोतालं चंदसतं चोतालं चव सूरियाण सतं ।

पोककरवरदीवम्मि चरंति एते पभासंता ।

[१५३] चत्तारि सहस्साइं बत्तीसं चव हुंति नक्खत्ता ।

छच्च सता बावत्तर महग्गहा बारह सहस्सा ।

[१५४] छण्णउति सयसहस्सा चोत्तालीसं खलु भवे सहस्साइं

।

चत्तारि य सता खलु तारागणकोडिकोडीणं ।

[१५५] ता पुक्खरवरस्स णं दीवस्स बहुमज्झदेसभाए माणुसुत्तरे नामं पव्वते पन्नत्ते-वट्टे वलयागारसंठाणसंठिते जे णं पुक्खरवरं दीवं दुधा विभयमाणे-विभयमाणे चिड्ढंति तं जहा- अब्भित्तर-पुक्खरद्धं च बाहिरपुक्खरद्धं च ता अब्भित्तरपुक्खरद्धे णं किं समचक्कवालसंठिते विसमचक्कवालसंठिते ता समचक्कवालसंठिते नो विसमचक्कवालसंठिते ता अब्भित्तरपुक्खरद्धे णं केवतियं चक्कवालविकखंभेणं पाहुइं-१९

केवतियं परिकखेवेणं आहितेति वदेज्जा ता अडु जोयणसयसहस्साइं चक्कवालविकखंभेणं एक्का जोयण-कोडी बायालीसं च सयसहस्साइं तीसं च सहस्साइं दो अउणापन्ने जोयणसते परिकखेवेणं आहितेति वदेज्जा ता अब्भित्तरपुक्खरद्धे णं केवतिया चंदा पभासेंसु वा पभासेंति वा पभासिस्संति वा केवतिया सूरा तविंसु वा पुच्छा ता बावत्तरिं चंदा पभासेंसु वा पभासेंति वा पभासिस्संति वा बावत्तरिं सूरिया तवइंसु वा तवइंति वा तवइस्संति वा दोण्णि सोला नक्खत्तसहस्सा जोयं जोएंसु वा जोएंति वा जोइस्संति वा छ महग्गहसहस्सा तिण्णि य सया छत्तीसा चारं चरेसुं वा चरेंति वा चरिस्संति वा अडतालीससतसहस्सा बावीसं च सहस्सा दोण्णि य सता तारागणकोडीकोडीणं सोभं सोभिंसु वा सोभेति वा सोभिस्संति वा ता समयक्खेत्ते णं केवतियं आयाम-विकखंभेणं केवतियं परिकखेवेणं आहितेति वदेज्जा ता पणतालीसं जोयणसयसहस्साइं आयाम-विकखंभेणं एगा जोयणकोडी बायालीसं च सतसहस्साइं तीसं च सहस्सा-इंदोण्णि यअउणापन्ने जोयणसते परिकखेवेणं आहितेति वदेज्जा ता समयक्खेत्ते णं केवतिया चंदा पभासेंसु वा पुच्छा तहेव ता बत्तीसं चंदसतं पभासेंसु वा पभासेंति वा पभासिस्संति वा बत्तीसं सूरियाणं सतं तवइंसु वा तवइंति वातवइस्सति वातिण्णि सहस्सा छच्च छण्णउत्ता नक्खत्तसता जोयं जोएंसु वा जोएंति वा जोइस्संति वा एक्कारस सहस्सा छच्च सोलस महग्गहसता चारं चरिंसु वा चरेंति वा चरिस्संति वा अट्टासीतिं सतसहस्साइं चत्तालीसं च सहस्सा सत्त य सया तारागणकोडिकोडीणं सोभं सोभिंसु वा सोभेति वा सोभिस्संति वा ।

- [१५६] अद्वेव सतसहस्सा अब्भिंतरपुक्खरस्स विक्खंभो ।
पणयालसयसहस्सा माणुसखेत्तस्स विक्खंभो ।
- [१५७] कोडी बातालीसं सहससा दो सता अउणपन्नासा ।
माणुसखेत्तपरिरओ एमेव य पुक्खरद्धस्स ।
- [१५८] बावत्तरिं च चंदा बावत्तरिमेव दिणकरा दित्ता ।
पुक्खरवरदीवड्ढे चरंति एते पभासेता ।
- [१५९] तिण्णि सता छत्तीसा छच्च सहस्सा महग्गहाणं तु
।
नक्खत्ताणं तु भवे सोलाइं दुवे सहस्साइं ।
- [१६०] अडयालसयसहस्सा बावीसं खलु भवे सहस्साइं ।
दो य सय पुक्खरद्धे तारागणकोडिकोडीणं ।
- [१६१] बत्तीसं चंदसतं बत्तीसं चेव सूरियाण सतं ।
सयलं माणुसलोयं चरंति एते पभासेता ।
- [१६२] एक्कारस य सहस्सा छप्पि य सोला महग्गहाणं तु ।
छच्च सत्ता छण्णउया नक्खत्ता तिण्णि य सहस्सा
।
- [१६३] अट्टासीतिं चत्ताइं सयसहस्साइं मणुयलोगंमि ।
सत्त य सया अणूणा तारागणकोडीकोडीणं ।
- [१६४] एसो तारापिंडो सव्वसमासेण मणुयलोयंमि ।
बहिया पुण ताराओ जिणेहिं भणिया असंखेज्जा ।
- [१६५] एवतियं तारग्गं जं भणियं माणुसंमि लोगंमि ।

पाहुडं-१९

- चारं कलंबुयापुप्फसंठितं जोइसं चरति ।
- [१६६] रविससिगहणक्खत्ता एवतिया आहिता मणुयलोए ।
जेसिं नामागोत्तं न पागता पन्नवेहिंति ।
- [१६७] छावट्ठिं पिडगाइं चंदादिच्चाण मणुयलोयम्मि ।
दो चंदा दो सूरा हुंति एक्केक्कए पिडए ।
- [१६८] छावट्ठिं पिडगाइं नक्खत्ताणं तु मणुयलोयम्मि ।
छप्पन्नं नक्खत्ता हुंति एक्केक्कए पिडए ।
- [१६९] छावट्ठिं पिडगाइं महग्गहाणं तु मणुयलोयंमि ।
छावत्तरं गहसयं होइ एक्केक्कए पिडए ।
- [१७०] चत्तारि य पंतीओ चंदादिच्चाण मणुयलोयम्मि ।
छावट्ठिं छावट्ठिं च होंति एक्किक्किया पंती ।
- [१७१] छप्पन्नं पंतीओ नक्खत्ताणं तु मणुयलोयम्मि ।
छावट्ठिं छावट्ठिं हवंति एक्केक्किया पंती ।

- [१७२] छावत्तरं गहाणं पंतिसयं हवइ मणुयलोयंमि ।
छावट्टिं छावट्टिं हवंति य एक्केक्किया पंती ।
- [१७३] ते मेरुमणुचरंता पदाहिणावत्तमंडला सव्वे ।
अणवट्टितैहिं जोगेहिं चंदा सूरा गहगणा य ।
- [१७४] नक्खत्ततारगाणं अवट्टिता मंडला मुणेयव्वा ।
तेवि य पदाहिणावत्तमेव मेरुं अनुचरंति ।
- [१७५] रयणिकरदिणकराणं उड्ढं च अहे य संकमो नत्थि ।
मंडलसंकमणं पुणं सब्भंतरबाहिरं तिरिए ।
- [१७६] रयणिकरदिणकराणं नक्खत्ताणं महग्गहाणं च ।
चारविसेसेणं भवे सुहदुक्खविही मणुस्साणं ।
- [१७७] तेसिं पविसंताणं तावक्खेत्तं तु वड्ढते निययं ।
तेणेव कमेणं पुणो परिहायति न्क्खमंताणं ।
- [१७८] तेसिं कलंबुयापुप्फसंठिता हुंति तावक्खेत्तपहा ।
अंतो य संकुडा बाहिं वित्थडा चंदसूराणं ।
- [१७९] केणं वड्ढति चंदो परिहाणी केण होति चंदस्स ।
कालो वा जोण्हो वा केणणुभावेणं चंदस्स ।
- [१८०] किण्हं राहुविमाणं निच्चं चंदेण होइ अविरहियं ।
चउरंगुलमप्पत्तं हिट्ठा चंदस्स तं चरति ।
- [१८१] बावट्टिं-बावट्टिं दिवसे-दिवसे तु सुक्कपक्खस्स ।
जं परिवड्ढति चंदो खवेइ तं चेव कालेणं ।
- [१८२] पन्नरसइभागेण य चंदं पन्नरसमेव तं वरति ।

पाहुडं-१९

- पन्नरसइभागेण य पुणोवि तं चेव वक्कमति ।
- [१८३] एवं वड्ढति चंदो परिहाणी एव होइ चंदस्स ।
कालो वा जोण्हो वा एयणुभावेणं चंदस्स ।
- [१८४] अंतो मणुस्सखेत्ते हवंति चारोवगा तु उववण्णा ।
पंचविहा जोतिसिया चंदा सूरा गहगणा य ।
- [१८५] तेण परं जे सेसा चंदादिच्चगहतारनक्खत्ता ।
नत्थि गई नवि चारो उवट्टित्ता ते मुणेयव्वा ।
- [१८६] एवं जंबुदीवे दुगुणा लवणे चउग्गुणा हुंति ।
लावणगा य तिगुणिता ससिसूरा घायइसंडे ।
- [१८७] दो चंदा इह दीवे चत्तारि य सायरे लवणतोए ।
घायइसंडे दीवे बारस चंदा य सूरा य ।
- [१८८] घायइसंडप्पभिति उट्टिडा तिगुणिता भवे चंदा ।
आदिल्लचंदसहिता अनंतराणंतरे खेत्ते ।

- [१८९] रिक्खग्गहतरग्गं दीवसमुद्धे जतिच्छसी नाउं ।
तस्स ससीहिं गुणितं रिक्खग्गहतारग्गं तु ।
- [१९०] बहिता तु माणुसणगस्स चंदसूराणवड्ढिता जोआ ।
चंदा अभीइजुत्ता सूरा पुण हुंति पुस्सेहिं ।
- [१९१] चंदातो सूरस्स य सूरा चंदस्स अंतरं होइ ।
पन्नाससहस्साइं तु जोयणाणं अणूणाइं ।
- [१९२] सूरस्स य सूरस्स य ससिणो ससिणो य अंतरं होइ ।
बाहिं तु माणुसणगस्स जोयणाणं सतसहस्सं ।
- [१९३] सूरंतरिया चंदा चंदंतरिया य दिणयरा दित्ता ।
चित्तंतरलेसागा सुहलेसा मंदलेसा य ।
- [१९४] अट्ठासीतिं च गहा अट्ठावीसं च हुंति नक्खत्ता ।
एगससीपरिवारो एत्तो ताराणं वोच्छामि ।
- [१९५] छावड्ढिसहस्साइं नव चेव सताइं पंचसतराइं ।
एगससीपरिवारो तारागणकोडिकोडीणं ।

[१९६] अंतो मणुस्सखेत्ते जे चंदिम-सूरिय-गह जाव तारारूवा ते णं देवा किं उड्ढोववण्णगा कप्पोववण्णगा विमाणोववण्णगा चारोववण्णगा चारड्ढितिया गतिरतिया गतिसमवण्णगा ता ते णं देवा नो उड्ढोववण्णगा नो कप्पोववण्णगा विमाणोववण्णगा चारोववण्णगा नो चारड्ढितिया गतिरतिया गतिस-मावण्णगा उड्ढीमुहकलंबुयापुप्फसंठाणसंठितेहिं जोयणसाहस्सिएहिं तावक्खेत्तेहिं साहस्सियाहिं बाहिराहिं वेउच्चियाहिं परिसाहिं महताहसहस्सिएहिं-वाहय-तंती-तल-ताल-तुडिय-घण-मुड्ढंग-पडुप्पवाइयरवेणं महता उक्कुड्ढिसीहनाद-बोलकलकलरवेणं अच्छं पव्वतरायं पदाहिणावत्तमंडलचारं मेरुं अनुपरियट्ठंति ता तेसि णं देवाणं जाधे इंदे चयति से कधमियाणिं पकरंति वा चत्तारि पंच सामाणियदेवा तं ठाणं उवसंपज्जित्ताणं पाहुडं-१२

विहरंति जावण्णे तत्थ इंदे उववण्णे भवति ता इंदट्ठाणे णं केवतिणं कालेणं विरहिते पन्नत्ते ता जहण्णेणं इक्कं समयं उक्कोसेणं छम्मासे ता बहिता णं माणुस्सक्खेत्तस्स जे चंदिम-सूरिय-गह गण-नक्खत-तारारूवा ते णं देवा किं उड्ढोववण्णगा कप्पो ववण्णगा विमाणोववण्णगा चारड्ढितिया गतिरतिया गतिस-मावण्णगा ता ते णं देवा नो उड्ढोववण्णगा नो जाव गतिरतिया नो गतिसमावण्णगा पक्किट्ठगसंठाणसंठितेहिं जोयणसयसहस्सिएहिं तावक्खेतेहिं सयसाहस्सियाहिं बाहिराहिं वेउच्चियाहिं जाव रवेणं दिव्वाइं भोगभोगाइं भुंजमाणा विहरंति सुहलेसा मंदलेसा मंदायवलेसा चित्तंतरलेसा अण्णोण्णसमोगाढाहिं लेसाहिं कूडा इव ठाणठिता ते पदेसे सव्वतो समंता ओभासंति उज्जोवेंति तवेंति पभासंति ता तेसि णं देवाणं जाहे इंदे चयति से कहमियाणिं पकरंति ता चत्तारि पंच सामाणियदेवा तं ठाणं तहेव जाव छम्मासे ।

[१९७] ता पुक्खरवरं णं दीवं पुक्खरोदे नामं समुद्धे वट्टे वलयागारसंठाणसंठिते सव्वतो जाव चिट्ठति ता पुक्खरदे णं समुद्धे किं समचक्कवालसंठिते नो विसमचक्कवालसंठिते ता पुक्खरोदे णं समुद्धे केवतियं चक्कवालविक्खंभेणं केवतियं परिक्खेवेणं आहितेति वदेज्जा ता संखेज्जाइं जोयणसहस्साइं आयाम-विक्खंभेणं संखेज्जाइं जोयणसहस्साइं परिक्खेवेणं आहितेति वदेज्जा ता पुक्खरवरोदे णं समुद्धे

केवतिया चंदा पभासेंसु वा पुच्छा तहेव ता पुक्खरोदे णं समुद्धे संखेज्जा चंदा पभासेंसु वा जाव संखेज्जाओ तारागणकोडिकोडीओ सोभं सोभेसु वा सोभेति वा सोभिस्संति वा एतेणं आभिलावेणं-वरुणवरेदीवे वरुणोदेसमुद्धे खीरवरेदीवे खीरवरेसमुद्धे घतवरेदीवे घतोदेसमुद्धे खोदवरेदीवे खोदोदेसमुद्धे नंदिस्सरवरे दीवे नंदिस्सरवरे समुद्धे अरुणोदेदीवे अरुणोदेसमुद्धे अरुणवरेदीवे अरुणवरेसमुद्धे अरुणवरोभासेदीवे अरुणवरोभासेसमुद्धे कुंडलेदीवे कुंडलोदेसमुद्धे कुंडलवरेदीवे कुंडलवरोदेसमुद्धे कुंडलवरोभासेदीवे कुंडलवरोभासेसमुद्धे सव्वेसिं विक्खंभपरिक्खवो जोतिसाइं पुक्खरोदसागरसरिसाइं ता कुंडवरोभासणं समुद्धं रुपए दीवे वट्टे वलयागार-संठाणसंठिते सव्वतो जाव चिट्ठति ता रुयए णं दीवे समचक्कवालसंठिते नो विसमचक्कवालसंठिते ता रुयए णं दीवे केवतियं चक्कवालविक्खंभेणं केवतियं परिक्खेवेणं आहितेति वदेज्जा ता असंखेज्जाइं जोयणसहस्साइं चक्कवालविक्खंभेणं असंखेज्जाइं जोयणसहस्साइं परिक्खेवेणं आहितेति वदेज्जा ता रुयगे णं दीवे केवतिया चंदा पभासेंसु वा पुच्छा ता रुयगे णं दीवे असंखेज्जा चंदा पभासेंसु वा जाव असंखेज्जाओ तारागणकोडिकोडीओ सोभं सोभेसु वा सोभेति वा सोभिस्संति वा एवं रुयगे समुद्धे रुयग-वरेदीवे रुयगवरोदे समुद्धे रुयगवरोभासेदीवे रुयगवरोभासेसमुद्धे एवं तिपडोयारा नेतव्वा जाव सूरेदीवे सूरोदे-समुद्धे सूरवरेदीवे सूरवरेसमुद्धे सूरवरोभासेदीवे सूरवरोभासेसमुद्धे सव्वेसिं विक्खंभपरिक्खेव-जोतिसाइं रुयग-वरेदीवसरिसाइं ता सूरवरोभासोदणं समुद्धं देवे नामं दीवे वट्टे वलयागारसंठाणसंठिते सव्वतो समंता संप-रिक्खित्ताणं चिट्ठति जाव नो विसमचक्कवालसंठिते ता देवे णं दीवे केवतियं चक्क-वालविक्खंभेणं केवतियं परिक्खेवेणं आहितेति वदेज्जा ता असंखेज्जाइं जोयणसहस्साइं चक्कवाल-विक्खंभेणं असंखेज्जाइं जोयणसहस्साइं परिक्खेवेणं आहितेति वदेज्जा ता देवे णं दीवे केवतिया चंदा पभासेंसु वा पुच्छा तहेव तादेवे णं दीवे असंखेज्जा चंदा पभासेंसु वा जाव असंखेज्जाओ तारागण-कोडिकोडीओ सोभं सोभेसु वा सोभेति वा सोभेस्संति वा एवं देवोदे समुद्धे नागेदीवे नागोदेसमुद्धे जक्खेदीवे जक्खोदेसमुद्धे भूतेदीवे भूतोदेसमुद्धे सयंभुरमणेदीवे सयंभुरमणेसमुद्धे सव्वे देवदीवसरिसा ।

• मुनि दीपरत्नसागरेण संशोधितः सम्पादित्तश्च एगूणवीसइमं पाहुडं समत्तं •

पाहुडं-२०

॥ वीसइमं पाहुडं ॥

[१९८] ता कहं ते अनुभावे आहितेति वदेज्जा तत्थ खलु इमाओ दो पडिवत्तीओ पन्नत्ताओ तत्थेगे एवमाहंसु-ता चंदिमसूरिया णं नो जीवा अजीवा नो घणा झूसिरा नो वरबोदिधरा कलेवरा नत्थि मं तेसिं उट्ठाणेति वा कम्ममेति वा वलेति वा वीरिएति वा पुरिसक्कारपरक्कमेति वा ते नोविज्जुलवंति नो असणिं लवंति नो थणितं लवंति अहे णं बादरे वाउकाए संमुच्छति संमुच्छित्ता विज्जुंपि लवंति असणिंपि लवंति थणितंपि लवंति-एगे पुण एवमाहंसु-ता चंदिमसूरिया णं जीवा नो अजीवा धणा नो झूसिरा वरबोदिधरा नो कलेवरा अत्थि णं तेसि उट्ठाणेतिवा कम्ममेति वा बलेति वा वीरिएति वा पुरिसक्कार-परक्कमेति वा ते विज्जुंपि लवंति असणिंपि लवंति थणितंपि लवंति-वयं पुण एवं वदामो-ता चंदिमसूरिया णं देवा महिड्डिया० जाव महाणुभावा वरत्थधरा वरमल्लधरा वरामभरणधारी अवोच्छित्ति-णयट्ठयाए अण्णे चयंति अण्णे उववज्जंति ।

[१९९] ता कहं ते राहुकम्ममे आहितेति वदेज्जा तत्थ खलु इमाओ दो पडिवत्तीओ पन्नत्ताओ तत्थेगे एवमाहंसु-ता अत्थि णं से राहु देवे जे णं चंदं वा सूरे वा गेण्हति-एगे पुण एवमाहंसु-ता नत्थि णं

से राहू देवे जे णं चंदं वा सूरं वा गेण्हति-तत्थ जेते एवमाहंसु-ता अत्थि णं से राहू देवे जे णं चंदं वा सूरं वा गेण्हति ते एवमाहंसु-ता राहू णं देवे चंदं वा सूरं वा गेण्हमाणे बुद्धंतेणं गिण्हित्ता बुद्धंतेणं मुयति बुद्धंतेणं गिण्हित्ता मुद्धंतेण मुयति मुद्धंतेण गिण्हित्ता बुद्धंतेणं मुयति मुद्धंतेणं गिण्हित्ता मुद्धंतेणं मुयति वामभुयंतेणं गिण्हित्ता वामभुयंतेणं मुयति वामभुयंतेणं गिण्हित्ता दाहिणभुयंतेणं मुयति दाहिणभुयंतेणं गिण्हित्ता वामभुयंतेणं मुयति दाहिणभुयंतेणं गिण्हित्ता दाहिणभुयंतेणं मुयति तत्थ जेते एवमाहंसु-ता नत्थि णं से राहू देवे जे णं चंदं वा सूरं वा गेण्हति ते एवमाहंसु तत्थ णं इमे पन्नरस कसिणपोग्गला० सिंघाडए जडिलए खरए खतए अंजणे खंजणे सीतले हिमसीतले केलासे अरुणाभे परिज्जए नभसूरए कविलए पिंगलए राहू, ता जया णं एते पन्नरस कसिणा पोग्गला सया चंदस्स वा सूरस्स वा लेसाणुबद्धचारिणो भवंति तया णं माणुसलोयंसि माणुसा एवं वदंति-एवं खलु राहू चंदं वा सूरं वा गेण्हति ता जया णं एते पन्नरस कसिणा पोग्गला नो सया चंदस्स वा सूरस्स वा लेसाणुबद्धचारिणो भवंति नो खलु तया णं माणुसलोयम्मि मणुस्सा एवं वदंति-एवं खलु राहू चंदं वा सूरं वा गेण्हति-वयं पुण एवं वदामो ता राहू णं देवे महिड्ढिए महाजुतीए महाबले महाजसे महाणुभावे वरत्थधरे वरमल्लधरे वराभणधारी राहुस्स णं देवस्स नव नाधेज्जा पन्नत्ता तं जहा- सिंधडए जडिलए खतए खरए दद्वरे मगरे मच्छे कच्छभे कण्हसप्पे ता राहुस्स णं देवस्स विमाणा पंचवण्णा पन्नत्ता तं जहा- किण्हा नीला लोहिता हालिद्धा सुक्किला अत्थि कालए राहुविमाणे खंजणवण्णाभे पन्नत्ते अत्थि नीलए राहुविमाणे लाउयवण्णाभे पन्नत्ते अत्थि लोहिए राहुविमाणे मंजिद्धावण्णाभे पन्नत्ते अत्थि पीतए राहुविमाणेहालिद्धवण्णाभे पन्नत्ते अत्थि सुक्किलए राहुविमाणे भासरासिवण्णाभे पन्नत्ते ता जया णं राहुदेवे आगच्छमाणे वा गच्छमाणे वा विउव्वमाणे वापरियारेमाणे वा चंदस्स वासूरस्स वा लेस्संपुरत्थिमेणं आवरित्ता पच्चत्थिमेणं वीतीवयति तया णं पुरत्थिमेणं चंदे वा सूरं वा उवदंसेति पच्चत्थिमेणं राहू जया णं राहुदेवे आगच्छमाणे वा गच्छमाणे वा विउव्वमाणे वा परियारेमाणे वा चंदस्स वा सूरस्स वा लेसं दाहिणेणं आवरित्ता उत्तरेणं वीतीवयति तया णं दाहिणेणं चंदे वा सूरं वा उवदंसेति उत्तरेणं राहू एतेणं अभिलावेणं पच्चत्थिमेणं आवरित्ता पुरत्थिमेणं

पाहुडं-२०

वीतीवयति उत्तरेणं आवरित्ता दाहिणेणं वीतीवयति जया णं राहू देवे आगच्छमाणे वा जाव परियारेमाणे वाचंदस्स वा सूरस्स वा लेसं दाहिणपुरत्थिमेणं वरित्ताउत्तरपच्चत्थिमेणं वीतीवयति तया णं दाहिणपुरत्थिमेणं चंदे वा सूरं वा उवदंसेति उत्तरपच्चत्थिमेणं राहू जया णं राहू देवे आगच्छमाणे वा जाव परियारेमाणे वा चंदस्स वा सूरस्स वा लेसं दाहिणपच्चत्थिमेणं आवरित्ता उत्तरपुरत्थिमेणं वीतीवयति तया णं दाहिणपच्चत्थिमेणं चंदे वा सूरं वा उवदंसेति उत्तरपुत्थिमेणं राहू एतेणं अभिलावेणं उत्तरपच्चत्थिमेणं आवरेत्ता दाहिणपुरत्थिमेणं वीतीवयति उत्तरपुरत्थिमेणं आवरेत्ता दाहिणपच्चत्थिमेणं वीतीवयति ता जया णं राहू देवे आगच्छमाणे वा जाव परियारेमाणे वा चंदस्स वा सूरस्स वा लेसं आवरेत्ता वीतिवयति तया णं मणुस्सलोए मणुस्सा वदंति-एवं खलु राहुणा चंदे वा सूरं वा गहिते-एवं खलु राहुणा चंदे वा सूरं वा गहिते ता जया णं राहू देवे आगच्छमाणे वा जाव परियारेमाणे वा चंदस्स वा सूरस्स वा लेसं आवरेत्ता पासेणं वीतीवयति तया णं मणुस्सलोयंमि मणुस्सा वदंति-एवं खलु चंदेण वा सूरं वा राहुस्स कुच्छी भिण्णा-एवं खलु चंदेण वा सूरं वा राहुस्स कुच्छी भिण्णा ता जया णं राहुदेवे आगच्छमाणे वा जाव परियारेमाणे वा चंदस्स वा सूरस्स वा लेसंआवरेत्ता पच्चोसक्कति तया णं

मणुस्सलोए मणुस्सा वदंति-एवं खलु राहुणा चंदे वा सूरु वा वंते-एवं खलु राहुणा चंदे वा सूरु वा वंते ता जया णं राहू देवे आगच्छमाणे वा जाव परियारेमाणे वा चंदस्स वा सूरस्स वा लेसं आवरेत्ता मज्झंमज्झेणं वीतीवयति तया णं मणुस्सलोए मणुस्सा वदंति-एवं खलु राहुणा चंदे वा सूरु वा वइयरिए-एवं खलु राहुणा चंदे वा सूरु वा वइयरिए ता जया णं राहू देवे आगच्छमाणे वा जाव परियारेमाणे वा चंदस्स वा सूरस्स वा लेसं आवरेत्ताणं अहे सपक्खिं सपडिदिसिं चिद्धति तया णं मणुस्सलोयंसि मणुस्सा वदंति-एवं खलु राहुणा चंदे वा सूरु वा धत्थे-एवं खलु राहुणा चंदे वा सूरु वा धत्थे ता कतिविहे णं राहू पन्नत्ते ता दुविहे पन्नत्ते तं जहा- धूवराहू य पव्वराहू य तत्थ णं जेसे धुवराहू से णं बहुलपक्खस्स पाडिवए पन्नरसतिभागेणं पन्नरसतिभागं चंदस्स लेसं आवरेमाणे-आवरेमाणे चद्धति तं जहा- पढमाए पढमं भागं जाव पन्नरसीए पन्नरसमं भागं चरमे समए चंदे रत्ते भवइ अवसेसे समए चंदे रत्ते य विरत्ते य भवति तमेव सुक्कपक्खे उवदंसेमाणे उवदंसेमाणे चिद्धति तं जहा- पढमे पढमं भागं जाव पन्नरसीए पन्नरसमं भागं चरिमे समए चंदे विरत्ते भवति अवसेसे समए चंदे रत्ते य विरत्ते य भवइ तत्थ णं जेसे पव्वराहू से जहण्णेणं छण्हं मासाणं उक्कोसेणं बायालोसाए मासाणं चंदस्स अडतालीसाए संवच्छराणं सूरस्स ।

[२००] ता कहं ते चंदे ससी-चंदे ससी आहितेति वदेज् ता चंदस्स णंजोतिसिंदस्स जोतिसरण्णो मियंके विमाणे कंता देवा कंताओ देवीओ कंताइं आसण-सयण-खंभंभंडमत्तोवगरणाइं अप्पणावि य णं चंदे देवे जोतिसिंदे जोतिसराया सोमेकंते सुभगे पियदंसणे सुरूवे ता एवं खलु चंदे ससी-चंदे ससी आहितेति वदेज्जा ता कहं ते सूरु आदिच्चे-सूरु आदिच्चे आहितेति वदेज्जा ता सूरुदिया णं समयाति वा आवलियाति वा आणापाणूति वा थोवेति वा जाव ओसप्पिणि-उस्सप्पिणीति वा एवं खलु सूरु आदिच्चे-सूरु आदिच्चे आहितेति वदेज्जा ।

[२०१] ता चंदस्स णं जोतिसिंदस्स जोतिसरण्णो कति अग्गमहिसीओ पन्नत्ताओ ता चत्तारि अग्गमहिसीओ पन्नत्ताओ तं जहा- चंदप्पभा दोसिणाभा अच्चिमाली पभंकरा जहा हेद्धा तं चेव जाव नो चेव णं मेहुणवत्तियं एवं सूरस्सवि भाणितव्वं ता चंदिमसूरिया णं जोतिसिंदा जोतिसरायाणो केरिस कामभोगे पच्चणुभवमाणा विहरंति ता से जहानामए-केइ पुरिसे पढमजोव्वणुद्वाणबलसमत्थे पढम-जोव्व-

पाहुडं-२०

णुद्वाणबल-समत्थाए भारियाए सद्धिं अचिरवत्तविवाहे अत्थत्थी अत्थगवेसणयाए सोलसवास-विप्पवसिते से णं ततो लद्धे कयकज्जे अणहसमग्गे पुणरवि नियगधरं हव्वमागए णहाते कतबलिकम्मं कतकोतुक-मंगल-पायच्छित्ते सुद्धप्पावेसाइं मंगलाइं वत्थाइं पवर परिहिते अप्पमहग्घाभरणालंकितसरीरे मणुण्णं थाली-पागसुद्धं अट्टारसवंजणाउलं भोयणं भुत्ते समाणे तंसि तारिसगंसि वासघरंसि अंतो सचित्तकम्मं बाहीरओ दूमिय-धट्ठ-मट्ठे विचित्तउल्लोय-चिल्लियतले बहुसमसुविभत्तभूमिभाए मणिरयण-पणासितंधयारे कालागुरु-पवरकुंदुरुक्क-तुरुक्क-धूव-मघ-मघंत-गंधुद्दुयाभिरामे सुगंधवरगंधिते गंधवट्ठिभूते तंसि तारिसगंसि सयणिज्जंसि दुहओ उण्णए मज्झे नत-गंभीरे सालिंगणवट्टिए उभओ विब्बोयणे सुरम्मं गंगापुत्तिण-वालुयाउद्दालसालिसए सुविरइयरयत्ताणे ओयवियखोमियखोमदुगूलपट्टपडिच्छयाणे रत्तंसुयसंवुडे सुरम्मं आईणगरूतबूरणवणीततूलफासे सुगंधवरकुसुमचुण्णसयणोवयारकलिए ताए तारिसाए भारियाए सद्धिं सिंगा-रागारचारुवेसाए संगतगतहसितभणितचिद्धतसंलावविलासणउणजुत्तोवयारकुसलाए अनुरत्ताए अविरत्ताए मणोमुकूलाए एगंतरतिपसत्ते अन्नत्थ कत्थइ मणं अकुव्वमाणे इट्ठे सद्धफरिसरसरूवगंधे पंचविधे माणुस्साए

कामभोगे पच्यणुभवमाणे विहरेज्जा ता से णं पुरिसे विउसमणकालसमयंसि केरिसयं साता-सोक्खं पच्यणुभवमाणे विहरति ओरालं समणाउसो ता तस्स णं पुरिसस्स कामभोगेहिंतो एते अनंत-गुणविसिद्धतरा चेव वाणमंतराणं देवाणं कामभोगा वाणमंतराणं देवाणं कामभोगेहिंतो अनंतगुण-विसिद्धतरा चेव असुरिंदवज्जियाणं भवणवासीणं देवाणं कामभोगा असुरिंदवज्जियाणं भवणवासीणं देवाणं कामभोगेहिंतो अनंतगुणविसिद्धतरा चेव असुरकुमाराणं इंदभूयाणं देवाणं कामभोगा असुरकुमाराणं इंदभू-याणं देवाणं कामभोगेहिंतो अनंतगुणविसिद्धतरा चेव गहगणनक्खत्ततारारूवाणं कामभोगा गहगण-णक्खत्त-तारारूवाणं कामभोगेहिंतो अनंतगुणविसिद्धतरा चेव चंदिमसूरियाणं देवाणं कामभोगा ता एरिसए णं चंदिमसूरिया जोतिसिंदा जोतिसरायाणो कामभोगे पच्यणुभवमाणा विहरंति ।

[२०२] तत्थ खलु इमे अट्ठासीतिं महग्गहा पन्नत्ता तं जहा- इंगालए वियालए लोहितक्खे सणिच्छरे आहुणिए पाहुणइए कणे कणए कणकणए कणविताए कणसंताणए सोमे सहिते आससणे कज्जोवए कब्बडए अयकरए दुंदुभए संखे संखणाभे संखवण्णाभे कंसे कंसणाभे कंसवण्णाभे नीले नीलोभासे रूप्पे रूप्पोभासे भासे भासरासी तिले तिलुप्फवण्णे दगे दगवण्णे काए काकंधे इंदग्गी धुमकेतु हरी पिंगलए बुधे सुक्के बहस्सई राहू अगत्थी माणवगे कासे फासे धुरे पमुहे वियडे विसंधीकप्पे नियल्ले पयल्ले जडियायलए अरुणे अग्गिल्लए काले महाकाले सोत्थिए सोवत्थिए वद्धमाणगे पलंबे निच्चालोए निच्चुज्जोते सयंपभे ओभासे सेयंकरे खेमंकरे आभंकरे पभंकरे अरए विरए असोगे वीतसोगे विमले वितत्ते विवत्थे विसाले साले सुव्ते अणियट्ठी एगजडी दुजडी करकरिए रायग्गले पुप्फकेतू भावकेतू ।

- [२०३] इंगालए वियालए लोहितंके सणिच्छरे चेव ।
आहुणिए पाहुणिए कणाकसणामावि णं चेव ।
[२०४] सोमे सहिते अस्सासणे य कज्जोवए य कब्बरए ।
अयकरए दुंदुभए संखसणामावि तिण्णेव ।
[२०५] तिण्णेव कंसणामा नीले रूप्पी य हुंति चत्तारि ।
भास तिल पुप्फवण्णे दगवण्णे काय बंधे य ।
[२०६] इंदग्गि धूमकेतू य हरि पिंगलए बुधे य सुक्के य ।

पाहुंडं-२०

- बहसति राहु अगत्थी माणवए कामफासे य ।
[२०७] धुरए पमुहे वियडे विसंधिकप्पे पयल्ले ।
जडियाइल्लए अरुणे अग्गिल काले महाकाले ।
[२०८] सोत्थिय सोवत्थिय वद्धमाणग तथा पलंबे य ।
निच्चालोए निच्चुज्जोए सयंपभे चेव ओभासे ।
[२०९] सोयंकरे खेमंकर आभंकर पभंकरे य बोधव्वे ।
अरए विरए य तथा असोगे तह वीतसोगे य ।
[२१०] विमल वितत्त विवत्थे विसाल तह साल सुव्वते
चेव
अणियट्ठी एगजडि य होई बिजडी य बोधव्वे ।
[२११] कर करिए रायग्गल बोधव्वे पुप्फ भावकेतू य ।

अद्वासीति खलु गहा नेतच्वा आणुपुच्वीए ।

• वीसइमं पाहुडं समत्तं •

- [२१२] इह एस पाहुडत्था अभव्वजणहिययदुल्लहा इणमो ।
उविकत्तिता भगवती जोतिसरायस्स पन्नत्ती ।
- [२१३] एस गहितावि संति थद्धे गारविय-माणि-पडीणीए ।
अबहुस्सुए णं देया तव्विवरीते भवे देया ।
- [२१४] सद्धा-धिति-उद्वाणुच्छाह-कम्म-बल-वीरिय-पुरिसकारेहिं ।
जो सिक्खिओवि संतो अभायणे पक्खिवेज्जाहि ।
- [२१५] सो पयवण-कुल-गण-संधबाहिरो नाणविणयपरिहीणो ।
अरहंतथेरगणहरमरं किर होति वोलीणो ।
- [२१६] तम्हा धिति-उद्वाणुच्छाह-कम्म-बल-वीरियसिक्खियं नाणं ।
धारेयव्वं नियमा ण य अविणीएसु दायव्वं ।
- [२१७] वीरवरस्स भगवतो जरमरणकिलेसदोसरहियस्स ।
वंदामि विणयपणतो सोक्खुप्पाए सदा पाए ।
- [२१८] इइ संगहणी गाहा ।

• मुनि दीपरत्नसागरेण संशोधितः सम्पादित्तश्च चंदपन्नत्ति उवंगं समत्तं •

१७

चंदपन्नत्ती - छड्डं उवंगं समत्तं

Proof correction is not done